

萬 有 文 庫

第一集一千種

王 雲 五 主 編

四 庫 全 書 總 目 提 要

(四十三)

永 瑤 等 撰



商 務 印 書 館 發 行

萬有文庫

第一集一千種

總編纂者

王雲五

商務印書館發行

上海圖書館藏書




A541 212 0003 4390B

四庫全書總目提要

(四十三)

永瑢等撰



國學基本叢書

四庫全書總目提要

卷一百七十三

集部二十六

別集類二十六

【聖祖仁皇帝御製文集一百七十六卷】謹案聖祖仁皇帝御製詩文篇章繁富。前後共分四集。以次成編。自康熙二十二年癸亥以前爲初集。於時方戡定九嬰。削平三孽。而念勤訪落。化著觀文。運籌決勝之餘。寓志藝林。所存尙四十卷。自康熙三十六年丁丑以前爲二集。於時靈臺偃伯。九譯旅來。保泰持盈。勵精宵旰。萬幾餘暇。矢詠卷阿。十四年中。復積盈五十卷。自康熙五十年辛卯以前爲三集。於時四瀛不波。五緯咸若。驩心普洽。佑命重申。堯衢時游。舜歌庸作。珥筆而錄奎章者。十四年中。又積盈五十卷。皆大學士張英等所恭編也。至五十一年壬辰以後。六十一年壬寅以前。承平熙皞。棟牖松雲。壽考康寧。愈游心於翰墨。而八伯徵歌之日。正百年服教之初。我世宗憲皇帝嗣踐皇圖。始命和碩莊親王允祿編爲四集。三十六卷。通一百七十六卷。合爲一編。迄今流布鴻都。尊藏冊府。萬方傳誦。藉以仰窺聖學之萬一。至於乾規坤矩。不可測以方圓。月采日華。不可圖以藻繪。非惟仰鑽所莫罄。抑亦歌頌所難名。惟有循環雜誦。尊若六經而已。莫能更贊一詞也。別有御製詩集二十八卷。乃高士奇等所校刊。恭檢篇目。皆已編入文集。次第亦無所更易。故今未敢復繕。惟附著分合之緣起。俾來茲有考焉。

【世宗憲皇帝御製文集三十卷】謹案世宗憲皇帝御製文集。凡文二十卷。詩十卷。文分十三體。詩則前七卷。曰雍邸集。皆康熙壬寅以前作。後三卷。曰四宜堂集。則御極以後作也。欽惟世宗憲皇帝。神資天授。聖孝性成。當聖祖仁皇帝時。景命先歸。九齡預與。承眷顧者獨深。故問視宮闈。殆無虛日。而晨昏餘暇。復覃精圖籍。研悅文章。汲古之勤。爲儒生之所不及。迨乎握符合契。應運龍飛。宵旰勵精。心營四海。紫宮之所規畫。黼座之所咨詢者。天下臣庶。雖不能一一悉窺。至於硃砒諭旨。至三百六十卷。上諭內閣。至一百五十九卷。上諭八旗。及上諭旗務議覆。諭行旗務議奏。至四十八卷。則剖劖梨棗。共見共聞。仰計十三年中。固無日不親御丹毫。疇咨庶政。而寄情翰墨。遂炳然與典誥雅頌。輝映後先。蓋體協健行。心懷無逸。精明強固之氣。舉措萬化而有餘。故旁涉詞章。尙足以陶鑄百氏。如元化運轉。時行物生。而二曜五緯。三垣列宿。自然成在天之文也。豈非攝提合雒以來。超軼三五之至聖哉。

【御製樂善堂文集定本三十卷】乾隆二十三年。協辦大學士戶部尙書蔣溥等。奉敕重編。欽惟我皇

上聖聰夙擅道岸。先登學海。詞源苞涵富。昔當睿養。卽擅生知。雍正庚戌之秋。嘗訂樂善堂文鈔十四卷。乾隆丁巳。取文鈔所載存十之三。益以雍正乙卯以前續著十之七。彙爲樂善堂文集。頒示海內。詞林藝圃。弦誦相聞。至是以初刻卷帙稍繁。復指授溥等。校閱刪定。併省去制義一卷。定爲此本。伏考今之制義。卽宋之經義也。劉安節等。皆載入別集。呂祖謙選宋文鑑。亦載入總集。初刻兼錄制義。蓋沿古例。而我皇上區分體裁。昭垂矩矱。俾共知古文今文之分。睿鑒精深。逾安節祖謙等之所見。不啻萬倍。又考周必大所校歐陽修集。多至一百五十三卷。而修自定居士集。原本乃至五十卷。文獻通考。引葉適之言。稱其

每篇閱至數十過。有累日去取未決者。所撰集古錄跋尾。集本視真跡亦多所追改。我皇上奎章藻耀。籠括古今。逾修亦何啻萬倍。而釐定舊製。必審必精。聖意之謹嚴。乃與修相近。天懷沖挹。尤亘古之所無矣。易曰。日新之謂盛德。又曰。日進無疆。臣等伏讀斯編。仰見謙抑之淵衷。信聖壽彌高。而聖學彌進。良有由也。

【御製文初集三十卷二集四十四卷】謹案御製文初集三十卷。凡五百七十餘篇。爲十九門。二集四十四卷。凡四百一十餘篇。爲二十三門。門各以歲月爲次。皆萬幾餘暇。親御丹素所成。其誥敕碑記之屬。詞臣恭擬代言者不與焉。伏考三古以來。帝王著作。散見諸子百家者。大抵有韻之語爲多。如黃帝巾机銘。唐堯神人暢。虞舜南風詩。卿雲歌。禹玉牒詞。湯鑄鼎絲。以及武王丹書之戒。成王紫庭之操。古籍所傳。不可縷舉。皆詩之類也。其以文傳者。則殊不多見。呂覽記神農之教。鬻子記顓頊以下修政之語。案諸語。今本鬻子不載。見賈誼新書所引。或出追記。或出依託。未必親所撰錄也。兩漢以後諸帝王。惟梁武帝有詩賦集。又有文集。其餘亦無有專以文傳者。然武帝文集不過十卷。未爲甚富。且六朝輕豔之詞。亦未能闡聖賢之奧。媿典謨之體也。惟我皇上心契道源。學蒐文海。題詠繁富。亘古所無。而古體散文。亦迥超藝苑。凡闡明義理之作。多濂洛關閩所未窺。考證辨訂之篇。多馬鄭孔賈所未及。明政體之得失。則義深乎訓誥。示世教之勸懲。則理準乎春秋。至於體裁盡善。華實酌中。則賈董崔蔡以還。韓柳歐曾以上。號爲作者。無不包羅。豈特列朝帝王之所無。臣等上下千年。編摩四庫。所謂詞壇巨擘者。屈指而計。亦孰能希聖製之萬一哉。

063307

【御製詩初集四十八卷二集一百卷三集一百一十二卷四集一百一十二卷】謹案御製詩集三百七十二卷皆合古今體詩編年爲次已刻者凡四集自乾隆元年丙辰至乾隆十二年丁卯計詩四千一百五十餘首編爲初集四十四卷目錄四卷自乾隆十三年戊辰至乾隆二十四年己卯計詩八千四百七十餘首編爲二集九十四卷目錄六卷竝大學士蔣溥所校刊自乾隆二十五年庚辰至乾隆三十六年辛卯計詩一萬一千六百二十餘首編爲三集一百卷目錄十二卷則大學士于敏中所校刊自乾隆三十七年壬辰至乾隆四十八年癸卯計詩九千七百餘首編爲四集一百卷目錄十二卷則協辦大學士尙書梁國治侍郎董誥所校刊也統合三萬三千九百五十餘首甲辰以後未劄劄宣布者尙不知其數焉自今以往億萬斯年更不知其數焉自古吟詠之富未有過於我皇上者蓋自撫臨六幕宰制萬幾勤民莅政之餘紫殿凝神別無嗜好惟以觀書乙夜悅性怡情是以聖學通微睿思契妙天機所到造化生心如雲霞之麗天變化不窮而形容意態無一相復如江河之紀地流行不息而波瀾湍折無一相同如二氣之育物生化不已而耳目口鼻無一相類故從心所欲動合自然染翰擘牋頃刻輒數十首侍臣授簡吮墨沈思前韻未廣新題已作丹毫宣示日以爲常四十八年之中卷帙如是之浩博職是故也若夫有舉必書可以注起居隨事寓教可以觀政事聖人之德聖人之功與聖人之心無不可伏讀而見之尤獨探尼山刪定之旨非雕章繪句者所知矣考帝王有集始於漢武帝然止二卷魏晉至唐御撰詩文惟唐高宗大帝集多至八十六卷今所存者亦大抵皆纂組之詞其於聖製固猶培塿之望華嵩至王應麟玉海載宋太宗御集三百卷眞宗御集亦三百卷仁宗御集一百卷觀其目錄皆湊合雜纂書籍以充卷帙

其數旣已不確。又惟真宗集稱鏤版。然宋人書目皆不著錄。是未宣布也。太宗仁宗集則竝藏於禁中。以示人。宋人詩話說部所稱述者。太宗詩僅傳二首。真宗詩僅傳七首。仁宗僅傳二首。亦不甚工。豈如御製諸集開雕摹印。昭布寰瀛。文采煥於星漢。苞涵富於山海。爲有目所共睹也哉。

【梅村集四十卷】

通行本

國朝吳偉業撰。偉業有綏寇紀略。已著錄。此集凡詩十八卷。詩餘二卷。文二十卷。其少作大抵才華豔發。吐納風流。有藻思綺合。精麗芊眠之致。及乎遭逢喪亂。閱歷興亡。激楚蒼涼。風骨彌爲適上。暮年蕭瑟。論者以庾信方之。其中歌行一體。尤所擅長。格律本乎四傑。而情韻爲深。敘述類乎香山。而風華爲勝。韻協宮商。感均頑豔。一時尤稱絕調。其流播詞林。仰邀睿賞。非偶然也。至於以其餘技。度曲倚聲。亦復接跡屯田。嗣音淮海。王士禛詩稱白髮填詞。吳祭酒亦非虛美。惟古文每參以儷偶。旣異齊梁。又非唐宋。殊乖正格。黃宗義嘗稱梅村集中張南垣柳敬亭二傳。張言其藝而合於道。柳言其

參寧南軍事。比之魯仲連之排難解紛。此等處皆失輕重。爲倒却文章家架子。其糾彈頗常。蓋詞人之作散文。猶道學之作韻語。雖強爲學步。本質終存也。然少陵詩冠千古。而無韻之文。率不可讀。人各有能有不能。固不必一一求全矣。

【湯子遺書十卷附錄一卷】

河南巡撫採進本

國朝湯斌撰。斌有洛學編。已著錄。斌在國初。與陸隴其

俱號醇儒。隴其之學。篤守程朱。其攻擊陸王。不遺餘力。斌之學源出容城孫奇逢。其根柢在姚江。而能持新安金谿之平。大旨主於刻勵實行。以講求實用。無王學杳冥放蕩之弊。故二人異趣而同歸。今集中所載語錄。可以見其所得力。又斌雖平生講學。而康熙己未召試。實以詞科入翰林。故集中詩賦雜文。亦皆

彬彬典雅。無村塾鄙俚之氣。至其奏議諸篇。規畫周密。條析詳明。尤昭昭在人耳目者矣。蓋其著述之富。雖不及陸隴其。而有體有用。則斌尤通達於治體云。

【兼濟堂文集二十卷】直隸總督採進本 國朝魏裔介撰。裔介有孝經註義。已著錄。是編奏疏三卷。序

六卷。書牘二卷。傳誌二卷。祭文論二卷。雜著二卷。樂府古今體詩三卷。附年譜一卷。其平生著述。刻於江南者有兼濟堂集十四卷。刻於荆南者有兼濟堂集二十四卷。刻於京師者有文選二集上下二編。崑林小品上下二編。崑林外集一編。奏疏尺牘存餘七卷。其刻於林下者有文選十卷。嶼舫近草五卷。詩集七卷。樵林三筆五卷。此集乃詹明章裒輯諸本。簡汰繁冗。合刊爲一編者也。裔介立朝頗著風節。其所陳奏多關國家大體。詩文醇雅。亦不失爲儒者之言。雖不以詞章名一世。而以介於國初作者之間。固無忝焉。

【學餘堂文集二十八卷詩集五十卷外集二卷】江蘇周厚堉家藏本 國朝施閏章撰。閏章有矩齋雜記。已著錄。王士禛選感舊山木二集。所錄閏章詩最多。又取其五言近體八十二聯爲摘句圖。見所撰池北偶談中。閏章嘗語士禛。門人洪昇曰。爾師詩如華嚴樓閣。彈指即見。吾詩如作室者。領斲木石。一一就平地築起。士禛亦記於居易錄。平心而論。士禛詩自然高妙。固非閏章所及。而末學沿其餘波。多成虛響。以講學譬之王所造。如陸施所造。如朱陸天分獨高。自能超悟。非拘守繩墨者所及。朱則篤實操修。由積學而漸進。然陸學惟陸能爲之。楊簡以下一傳而爲禪矣。朱學數傳以後。尙有典型。則虛悟實修之別也。閏章所論。或亦微有所諷。寓規於頌。歟。其螻齋詩話有曰。山谷言近世少年。不冝深治經史。徒取給於詩。故致遠則泥。此最爲詩人鍼砭。詩如其人。不可不慎。浮華者浪子。叫號者粗人。寤瘠者淺。癡肥者俗。風雲

月露鋪張滿眼。識者見之。直一葉空紙耳。故曰君子以言有物。觀其持論。其宗旨可見矣。古文亦摹仿歐曾。不失矩度。然視其詩品。則少亞魏禧。爲作集序。乃置其詩。而盛許其文。非篤論也。外集二卷。一爲硯林拾遺。乃奉使廣東時。記所見端溪石品。一爲試院冰淵。則歷年典試序文及條約。今附存之。又有別集四卷。其二卷爲蠖齋詩話。二卷爲矩齋雜記。詩話別擇未精。瑕瑜參半。雜記頗涉神怪。尤爲小說家言。今析出別存其目。茲不具錄焉。

【忠貞集十卷】浙江巡撫採進本

國朝范承謨撰。承謨字覲公。號螺山。鑲黃旗漢軍大學士。文程子也。

初充侍衛。順治辛卯。詔八旗弟子。均得應試。遂以是科中式。舉人。次年壬辰。成進士。改庶吉士。授宏文院編修。官至浙閩總督。康熙壬子。逆藩耿精忠叛。承謨抗節死。賜諡忠貞。所作畫壁詩。石門吳震方嘗刻之。說鈴中。爲世傳誦。是編乃其全集。爲清苑劉可書所編。首諭祭文。御製碑文。御題祠額。附以家傳及祠堂記。共爲一卷。次撫浙奏議一卷。次督閩奏議一卷。次吾廬存彙一卷。次百苦吟一卷。次畫壁遺彙一卷。次雜著一卷。次附錄題跋哀挽詩文三卷。康熙五十七年。其子時崇。以畫壁遺彙進呈。聖祖仁皇帝親製序文。褒揚忠烈。宸章下賚。光逮幽泉。今謹敬錄冠集端。用示我國家扶植綱常。風勵臣節之至意。至承謨所上奏議。大都明白敷暢。多有關國計之言。詩文直抒胸臆。慷慨激昂。嚼齟裂眦之狀。至今猶可以想見。文以人重。承謨之謂矣。

【林蕙堂集二十六卷】浙江巡撫採進本

國朝吳綺撰。綺有嶺南風物記。已著錄。王方岐作綺小傳。稱

所著有亭臯集。藝香詞。林蕙堂文集諸編。綺沒之後。其子壽潛。蒐訪遺彙。合而編之。此本一卷至十二卷。

爲四六。卽所謂林蕙堂集也。十三卷至二十二卷爲詩。卽所謂亭臯集也。二十三卷至二十五卷爲詩餘。卽所謂藝香詞也。二十六卷則卽所作南曲附焉。國初以四六名者推綺及宜興陳維崧二人。均原出徐庾。維崧泛濫於初唐四傑。以雄博見長。綺則出入於樊南諸集。以秀逸擅勝。章藻功與友人論四六書曰。吳園次班香宋豔。接僅短兵。陳其年陸海潘江。末猶強弩。其論頗公。然異曲同工。未易定其甲乙。其詩才華富豔。瓣香在玉溪樊川之間。詩餘亦頗擅名。有紅豆詞人之號。卽所作有把酒囑東風。種出雙紅豆句也。所作院本。如嘯秋風繡平原之類。當時多被管絃。以各有別本單行。故僅以散曲九閩綴之。集末統而觀之。鴻篇鉅製。固未足抗跡古人。而跌宕風流。亦可謂一時才士矣。

【精華錄十卷】山東巡撫探進本

國朝王士禛撰。士禛有古懽錄。已著錄。其詩初刻有落牋堂集。皆少

作也。又有阮亭詩及過江入吳白門前後諸集。後刪併爲漁洋前集。而諸集皆佚。嗣有漁洋續集。蠶尾集。續集後集。南海集。雍益集。諸刻是編。又刪掇諸集。合爲一帙。相傳士禛所手定。其子啓泮跋語。稱門人曹禾盛符升。仿任淵山谷精華錄之例。鈔爲此錄者。蓋託詞也。士禛談詩。大抵源出嚴羽。以神韻爲宗。其在揚州作論詩絕句三十首。前二十八首皆品藻古人。末二首爲士禛自述。其一曰。曾聽巴渝里社詞。三閩哀怨此中遺。詩情合在空舲峽。冷雁哀猿和竹枝。平生大指具在是矣。當康熙中。其聲望奔走天下。凡刊刻詩集。無不稱漁洋山人評點者。無不冠以漁洋山人序者。下至委巷小說。如聊齋志異之類。士禛偶批數語於行間。亦大書王阮亭先生鑒定一行。弁於卷首。刊諸梨棗。以爲榮。惟吳橋竊目爲清秀。李于鱗見談龍錄。汪琬亦戒人勿效其喜用僻事新字。見士禛自作居易錄。而趙執信作談龍錄。排詆尤甚。平心而

論當我朝開國之初。人皆厭明代。王李之膚廓。鍾譚之纖仄。於是談詩者競尙宋元。旣而宋詩質直。流爲有韻之語錄。元詩縝豔。流爲對句之小詞。於是士禎等以清新俊逸之才。範水模山。批風抹月。倡天下以不著一字。盡得風流之說。天下遂翕然應之。然所稱者盛唐。而古體惟宗王孟。上及於謝朓。而止。較以十九首之驚心動魄。一字千金。則有天工人巧之分矣。近體多近錢郎。上及乎李頎。而止。律以杜甫之忠厚。纏綿沈鬱頓挫。則有浮聲切響之異矣。故國朝之有士禎。亦如宋有蘇軾。元有虞集。明有高啓。而尊之者必躋諸古人之上。激而反脣。異論遂漸生焉。此傳其說者之過。非士禎之過也。是錄具存。其造詣淺深。可以覆案。一切黨同伐異之見。置之不議可矣。

【堯峯文鈔五十卷】內府藏本。國朝汪琬撰。琬字茗文。號鈍翁。晚居堯峯。因以自號。長洲人。順治乙未。

進士。由戶部主事。陞刑部郎中。降補北城兵馬司指揮。再陞戶部主事。康熙己未。召試博學鴻詞。授翰林院編修。初琬自哀其文爲鈍翁類。彙六十二卷。續彙五十六卷。晚年又手自刪汰。定爲此編。其門人侯官林佶爲手寫。而刊之。古文一脈。自明代膚濫於七子。繼洮於三袁。至啓禎而極敝。國初風氣還淳。一時學者始復講唐宋以來之矩矱。而琬與寧都魏禧。商邱侯方域。稱爲最工。宋犖嘗合刻其文。以行世。然禧才雜縱橫。未歸於純粹。方域體兼華藻。稍涉於浮夸。惟琬學術旣深。軌轍復正。其言大抵原本六經。與二家迥別。其氣體浩瀚。疏通暢達。頗近南宋諸家。蹊逕亦略不同。廬陵南豐。固未易言。要之接跡唐歸。無愧色也。琬性狷急。動見人過。交遊罕善其終者。又好詆訶。見文章必摘其瑕類。故恆不滿人。亦恆不滿於人。與王士禎爲同年。後舉博學鴻詞時。乃與士禎相忤。其詩有區區誓墓心。豈爲一懷祖句。以王述比士禎。士

禎載之於居易錄中。又與閻若璩議禮相詬。若璩載之潛邱筭記中。皆爲世口實。然從來勢相軋者。必其力相敵。不相敵則弱者不敢。強者不屑。不至於互相排擊。否則必有先敗者。亦不能久相支柱。士禎詞章名一世。不與他人角。而所與角者。惟趙執信及琬。若璩博洽亦名一世。不與他人角。而所與角者。惟顧炎武及琬。則琬之文章學問。可略見矣。

【午亭文編五十卷】山西巡撫探進本。國朝陳廷敬撰。廷敬字子端。號說巖。澤州人。順治戊戌進士。改庶吉士。授檢討。本名敬。以是科有兩陳敬。因奉旨增廷字。官至大學士。諡文貞。嘗著尊聞堂集八十卷。晚年手定爲此編。其門人林佶繕寫付雕。廷敬有午亭山村。在陽城。因水經注載沁水逕午壁亭而名。因以名集。凡詩二十卷。雜著四卷。經解四卷。奏疏序記及各體文。共二十卷。杜律詩話二卷。廷敬論詩宗杜甫。不爲流連光景之詞。頗不與王士禎相合。而士禎甚奇其詩。所爲古文。雖汪琬性好排詆。論文少所許可。亦甚重之。生平回翔館閣。遭際昌期。出入禁闥。幾四十年。值文運昌隆之日。從容載筆。典司文章。雖不似王士禎籠罩羣才。廣於結納。而文章宿老人望所歸。燕許大手。海內無異詞焉。亦可謂和聲以鳴盛者矣。卷首有廷敬自序。謂於汪王不苟雷同。然蹊逕雖殊。而分途竝鶩。實能各自成家。其不冝步趨二人者。乃所以能方駕二人歟。此固非依門傍戶。假借聲譽者所知也。

【讀書齋偶存彙四卷】江蘇巡撫探進本。國朝葉方藹撰。方藹字子吉。號訥菴。崑山人。順治己亥進士。官翰林院學士。兼禮部侍郎。加禮部尙書銜。卒諡文敏。方藹釋褐後。即以文章受知世祖。章皇帝其授學士。述懷詩所云。敢道齊賢留異日。屢稱蘇軾是奇才。記是事也。後復蒙聖祖仁皇帝召入內廷。矢音廣唱。

歌咏昇平。故其詩格亦進而益上。未遇時嘗著有觚齋集。得第後棄不復存。此本皆在朝及告歸時所作。不分體。不編年。疑爲方藹所自定。故篇什雖少。而一一皆其菁華。王原祁序稱方藹詩宗蘇陸。文宗眉山。生平服膺王士禎之詩。汪琬之文。實兼有二家之長云云。今是稟不及雜文。而詩則諸體具備。雖未及士禎之秀骨天成。而和雅春容。颯颯乎盛世之音。與士禎亦各擅其長焉。

【松桂堂全集二十七卷延露詞三卷南泚集三卷】江蘇巡撫採進本 國朝彭孫遹撰。孫遹字駿孫。自號羨門生。海鹽人。順治己亥進士。官中書舍人。康熙己未舉博學鴻詞。召試擢第一。授編修。歷官吏部侍郎兼翰林院學士。洪惟我聖祖仁皇帝武功耆定。六幕大同。黼黻昇平。右文稽古。旁求俊乂。肇舉制科。於時景運方隆。人文蔚起。懷才抱藝之士。雲蒸鱗集。咸詣金門。司校閱者。雖有李霽杜臻。葉方藹。馮溥四人。而甲乙次第。皆稟睿裁。如王士禎池北偶談所記。施閏章省耕詩中。誤書旗字爲旂字。詔降置次等一事。仰見睿鑒精詳。不遺纖芥。故得人之盛。今古罕儔。而孫適遭際昌期。實冠是選。文章聲價。紙貴一時。今觀是集。才學富贍。詞采清華。館閣諸作。尤瑰瑋絕特。知其獨邀甄拔。領袖羣才。不偶然也。孫適所著南泚集。香奩倡和集。金粟詞。延露詞。俱先有刊本。惟全集未刊。孫適沒後五十年。至乾隆癸亥。其孫景曾始爲開雕。併以舊刊南泚集延露詞附錄於後云。

【曝書亭集八十卷附錄一卷】通行本 國朝朱彝尊撰。彝尊有日下舊聞。已著錄。此集凡賦一卷。詩二十二卷。皆編年爲次。始於順治乙酉。迄於康熙己丑。凡六十五年之作。其紀年皆用爾雅歲陽歲陰之名。從古例也。詞七卷。曰江湖載酒集。曰茶煙閣體物集。曰蕃錦集。雜文五十卷。分二十六體。附錄葉兒樂府。

一卷。則所作小令也。彝尊未入翰林時。嘗編其行藁爲竹垞文類。王士禛爲作序。極稱其永嘉詩中南亭西射堂孤嶼瞿溪諸篇。然是時僅規橛。王孟未盡所長。至其中歲以還。則學問愈博。風骨愈壯。長篇險韻。出奇無窮。趙執信談龍錄論國朝之詩。以彝尊及王士禛爲大家。謂王之才高而學足以副之。朱之學博而才足以運之。及論其失。則曰朱貪多。王愛好。亦公論也。惟暮年老筆縱橫。天真爛漫。惟意所造。頗乏剪裁。然晚景類唐杜陵不免。亦不能苛論彝尊矣。至所作古文。率皆淵雅。良由茹涵既富。故根柢盤深。其題跋諸作。訂譌辨異。本本元元。實跨黃伯思樓鑰之上。蓋以詩而論。與王士禛分途。各驚未定。孰先以文而論。則漁洋文略固不免瞠乎後耳。惟原本有風懷二百韻詩。及靜志居琴趣長短句。皆流宕豔冶。不止陶潛之賦閒情。夫綺語難除。詞人常態。然韓偓香奩集。別有篇帙。不入內翰集中。良以文章各有體裁。編錄亦各有義例。溷而一之。則自穢其書。今併刊除。庶不乖風雅之正焉。

【政書八卷】山西巡撫採進本 國朝于成龍撰成龍有于山奏牘已著錄。是集皆其歷仕所紀。曰羅城書。令羅城時藁也。曰合州書。知合州時藁也。曰武昌書。同知黃州署武昌府時藁也。曰黃州書。知黃州府時藁也。曰八閩書。歷任福建監司時藁也。曰畿輔書。巡撫直隸時藁也。曰兩江書。總督兩江時藁也。任監司以前。皆申詳條議。札檄誠諭之作。任巡撫以後。始列奏疏。共七卷。其第八卷曰吟咏書。則其所作各體詩。併以文六首附於後。成龍以清節著名。而自起家令牧。至兩膺節鉞。安民戢盜。諸政績亦皆綽有成算。其經濟頗有足傳。今觀是書。其平生規畫。猶可見其本末也。

【愚菴小集十五卷】庶吉士祝堃家藏本 國朝朱鶴齡撰。鶴齡有尙書埤傳已著錄。此集凡賦一卷。諸

體詩五卷。雜著文九卷。末附傳家質言十三則。鶴齡始專力於詞賦。自顧炎武勛以本原之學。始研思經義。於漢唐註疏。皆能爬梳抉摘。獨出心裁。故所作文章。亦悉能典雅醇實。不蹈剽竊摹擬之習。其邴鄘衛三國禹貢三江震澤太湖蟠冢漢源諸辨。多有裨於考證。嘗箋註杜甫李商隱詩集。故所作韻語。頗出入二家之間。而寄興清遠。能不自掩其神韻。與錢謙益爲同郡。初亦以其詞場宿老。頗與倡酬。既而見其首鼠兩端。居心反覆。薄其爲人。遂與之絕。所作元裕之集後一篇。稱裕之舉金進士。歷官左司員外郎。及金亡。不仕。隱居秀容。詩文無一語指斥者。裕之於元。既足踐其土口。茹其毛。即無反詈之理。非獨免咎。亦誼當然。乃今之訕辭詆語。曾不少避。若欲掩其失身之事。以誑國人者。非徒諄也。其愚亦甚云云。其言蓋隱指謙益輩而發。尤可謂能知大義者矣。

【抱犢山房集六卷】江蘇巡撫探進本

國朝嵇永仁撰。永仁字留山。別號抱犢山農。無錫人。康熙十三

年。耿精忠作亂。永仁在總督范承謨幕。同被拘繫。承謨遇害。永仁亦死難。四十七年。追贈國子監助教。是集前三卷曰吉吉吟。曰百苦吟。皆其陷獄時與承謨及同難諸人唱和詩。曰和淚譜。則爲同難諸人所作。小傳也。第四卷曰葭秋集。第五卷曰竹林集。乃其舊刻。第六卷附錄同難會稽王龍光華亭沈天成二人之詩文。雍正中。其子曾筠編次付梓。竝以誥敕及諭祭文等弁於卷首。永仁以諸生佐幕。尙未授官。而抗節殞身。義不從逆。可以愧劉秉政等於九泉。案逆藩耿精忠叛時。劉秉政以巡撫降賊。其所爲詩文。皆縷述當時實事。獄中不得筆墨。以炭屑畫於四壁。閩人重其人品。錄而傳之。得存於世。今誦其詞。奕奕然猶有生氣。與承謨畫壁諸詩。同爲忠臣孝子之言。爭光日月。不但以文章論矣。

【文端集四十六卷】通政司使張若渚家藏本 國朝張英撰。英有易經衷論已著錄。此乃其詩文全集。

凡存誠堂應制詩四卷。存誠堂詩集二十五卷。篤素堂詩集七卷。篤素堂文集十卷。英遭際昌辰。仰蒙聖祖仁皇帝擢侍講。幄入直禁廷。簪筆雍容。極儒臣之榮遇。矢音賡唱。篇什最多。其閒鼓吹昇平。黼黻廊廟。無不典雅和平。至於言情賦景之作。又多清微淡遠。抒寫性靈。臺閣山林二體。古難兼擅。英乃兼而有之。其散體諸文。稱心而出。不事粉飾。雖未能直追古人。而原本經術。詞旨溫厚。亦無忝於作者焉。

【西河文集一百七十九卷】浙江巡撫採進本 國朝毛奇齡撰。奇齡著述之富。甲於近代。沒後其門人

子姪編爲西河合集。分經集史集文集雜著四部。凡四百餘卷。其史問以奇齡有遺命不付剞劂。語見經問第五卷。景泰帝條下。餘亦不盡行於世。此本爲康熙庚子。其門人蔣樞所編。但分經集文集二部。經集自仲氏易以下。凡五十種。已別著錄。文集凡二百三十四卷。而策問一卷。表一卷。集課記一卷。續哀江南賦一卷。擬廣博詞連珠詞一卷。皆有錄無書。其中如王文成傳本二卷。制科雜錄一卷。後觀石錄一卷。越語寫繁錄一卷。何御史孝子祠主復位錄一卷。湘湖水利志三卷。蕭山縣志刊誤三卷。杭志三詰三誤辨一卷。天問補註一卷。勝朝彤史拾遺記六卷。武宗外紀一卷。後鑒錄七卷。韻學要指十一卷。詩話八卷。詞話二卷。外附徐都講詩一卷。本各自爲書。今亦分載於各部。其當編於集部者。實文一百一十九卷。詩五十三卷。詞七卷。統計一百七十九卷。奇齡之文。縱橫博辨。傲睨一世。與其經說相表裏。不古不今。自成一格。不可以繩尺求之。然議論多所發明。亦不可廢。其詩又次於文。不免傷於猥雜。而要亦我用我法。不屑隨人步趨者。以餘事觀之可矣。

【陳檢討四六二十卷】庶吉士祝塋家藏本 國朝陳維崧撰。程師恭註。維崧有兩晉南北史集珍。已著錄。國朝以四六名者。初有維崧及吳綺。次則章藻功。思綺堂集。亦頗見稱於世。然綺才地稍弱。於維崧藻功。欲以新巧勝二家。又遁爲別調。譬諸明代之詩。維崧導源於庾信。氣脈雄厚。如李夢陽之學杜。綺追步於李商隱。風格雅秀。如何景明之近中唐。藻功刻意雕鐫。純爲宋格。則三袁鍾譚之流亞。平心而論。要當以維崧爲冠。徒以傳誦者太廣。草擬者太衆。論者遂以膚廓爲疑。如明代之詬北地。實則才力富健。風骨渾成。在諸家之中。獨不失六朝四傑之舊格。要不能以擗擗玉溪。歸咎於三十六體也。師恭此註。成於康熙癸酉。王士禎古夫于亭雜錄曰。昔人云。一人知己。可以不恨。故友陽羨陳其年。諸生時老於場屋。小試亦多不利。己未博學鴻詞之舉。以詩賦入翰林。不數年病卒。京師及歿。而其鄉人蔣京少景祁。刻其遺集。無隻字遺失。皖人程叔才師恭。又註釋其四六文字。以行於世。此世人不能得之子孫者。而一以桑梓後進。一以平生未面之人。而收拾護惜。其文章如此云云。其推獎師恭。頗至。然師恭所註。往往失其本旨。如銅雀瓦賦。彈碁愛子句。自用曹丕巾角彈碁事。而但引藝經。註彈碁引陸機弔魏武帝文。註愛子。傅粉佳兒句。自用曹植傅粉對邯鄲淳事。而引魏志武帝欲以何晏爲子。及文帝疑晏傅粉事。皆似是而非。又如述祖德賦。況彼鯉庭句。自用楊汝士桃李新陰在鯉庭事。而但引論語伯魚事。愴園賦。雙丁詎擬句。自用梁武帝賜到漑詩。漢世重雙丁語。而但引文士傳丁儀兄弟事。皆知其一。不知其二。至於毛貞女墮樓詩序。空空實下天之狀句。自用李斯奏秦始皇鑿之空空如下天狀語。而補註引劍俠傳妙手空空兒。尤爲乖謬。如是之類。不一而足。且任淵史容註黃庭堅集。於作詩本事及年月。俱一一詳核。故爲善本。師恭去

維崧最近文中事實緣起。可以考知。如璿璣玉衡賦序之烏空楚幕。鵠去巴江句。因聖祖召試博學鴻詞。在己未歲。正平定湖廣四川之後。故維崧云云。師恭不註其故。則突入此語。是何文義哉。特以四六之文。非註難明。而師恭摭摭故實。尙有足資考證者。故併存之。以備參稽焉。

【蓮洋詩鈔十卷】兩江總督採進本

國朝吳雯撰。雯字天章。本遼陽人。順治六年。其父允升任蒲州學

正卒於官。雯兄弟孤弱不能歸。遂寄籍於蒲州。康熙己未。薦舉博學鴻詞。不中選。其卒也。刑部尙書王士禛爲誌墓。稱初見其詩。有泉繞漢祠外。雪明秦樹根。濃雲溼西嶺。春泥沾條桑。至今堯峯上。猶見堯時日。諸句吟諷不絕於口。所作居易錄中。又亟稱雯西城別墅諸篇。趙執信懷舊詩序。亦稱雯拙於時藝。困躓場屋。體貌巖醜。衣冠垢敝。或經歲不盥浴。人咸笑之。然詩才特超妙。其詩一刻於吳中。再刻於都下。三刻於津門。後士禛爲刪定。存千餘首。亦見墓誌中。因雯沒之後。未及刊行。故懷舊詩序曰。蓮洋卒後。阮翁爲作墓誌。且刪定其集。迄今將二十年。未行於世。意其時阮翁耄而多忘。未幾遂亡。未及歸諸吳氏也。池北書庫散失殆盡。蓮洋集從可知矣。云云。然其集實已歸吳氏。乾隆辛未。汾陽劉組曾哀其全彙刻之。又以士禛所評者。別刊一小冊。竝行。越十三年。甲申。蒲州府同知山東孫諤始從雯姪敦厚得士禛所定原本。簡汰重刊。詳載士禛之評。併以劉本所遺者。補刻於後。以所見墨迹補之。其士禛所刪。而劉本誤刻者。咸爲汰去。凡得古詩二卷。近體五卷。補遺一卷。詩餘一卷。文一卷。冠以墓誌。而附以同時唱和題詠之作。即此本也。雯天才雄駿。其詩有其鄉人元好問之遺風。惟熟於梵典。好拉雜堆砌。釋氏故實。是其所短。劉本無所別擇。故頗傷冗濫。此本沿新城之派。又以神韻婉約爲宗。一切激昂沈著之作。多見屏斥。反似鄰於

清弱亦不足盡其所長。然終較劉本爲簡潔。故置彼錄此。惟雯詩本足自傳。不藉士禎之評爲輕重。而刊此本者。牽於俗見。務引士禎以重雯。所載士禎評語。繁碎特甚。如題汪如輪看劍圖詩下附記云。原本評語奇作二字。似阮亭先生筆蹟。胸有造化四字。非阮亭先生筆蹟。刻本併作一處誤。又如城曲眺望詩下附記原本題下有墨筆評劉長卿之詩也。不知何人評。阮亭先生改作似劉長卿云云。此亦何關宏旨。而字句異同。乃如其考證。今悉刪除。以廓清耳目焉。

【張文貞集十一卷】江蘇巡撫探進本。國朝張玉書撰。玉書字素存。丹徒人。順治辛丑進士。選庶吉士。官至大學士。謚文貞。是集有儲大文序。不分卷帙。亦無目錄。其繕寫格紙。版心皆有松蔭堂字。蓋其家藏鈔本。編輯未成者也。首爲賦二篇。次爲頌三篇。表三篇。箋六篇。疏二十篇。議一篇。書一篇。考一篇。說一篇。序二十八篇。跋一篇。記九篇。紀事十篇。傳一篇。贊二篇。策問十二篇。紀功碑二篇。墓碑六篇。神道碑四篇。墓誌銘三十二篇。大抵皆春容典雅。泯泯乎盛世之音。其拖諾山狼居胥山二碑。敘述聖武功。皆爲詳贍。足以昭示萬世。其紀平定江南事。紀滅闖獻二賊事。紀三路進師下雲南事。紀平水西事。及外國紀。皆端緒詳明。得諸耳聞目見。足以彰開國之鴻烈。紀順治閒樂章及錢糧戶口三篇。皆足資掌故。而紀陝西殉難官事一篇。亦足與史傳相參。他若賜遊玉泉山記。賜遊化育溝後苑記。賜遊喀喇河屯後苑記。賜遊熱河後苑記。皆足發揚太平愷樂之象。其餘碑誌亦多。國初將相事蹟。可備考核。惟募疏祭文之屬。收載太濫。蓋其後人遇稟即錄。不暇持擇。轉爲全集之累。今悉刪除。而惟錄其賦頌以下諸篇。釐爲十二卷。庶不以榛櫟勿翦。爲將來論者所病焉。

【西陂類藁二十九卷】兩江總督採進本 國朝宋犖撰。犖有滄浪小志已著錄。是書凡詩二十二卷。詞一卷。雜文八卷。奏疏六卷。其詩之目曰古竹圃藁曰嘉禾堂藁曰柳湖草曰將母樓藁曰古竹圃續藁曰都官草曰雙江唱和集曰回中集曰西山倡和詩曰續都官草曰海上雜詩曰漫堂草曰漫堂倡和詩曰嘯雪集曰廬山詩曰述鹿軒詩曰滄浪亭詩曰迎鑾集曰紅橋集曰迎鑾二集曰清德堂詩曰迎鑾三集曰藤陰倡和集曰樂春閣詩曰聯句集凡二十有五。其初本各自爲集。晚年致仕居西陂。乃手自訂定。彙爲茲帙。惟初刻錦津山人詩集刪除不載。蓋以早年所作格調稍殊。故別爲一編。不欲使之相混也。犖雖以任子入官。不由科目。而淹通典籍。練習掌故。詩文亦爲當代所推。名亞於新城王士禛。其官蘇州巡撫時。長洲邵長蘅選士禛及犖詩爲王宋二家集。一時頗以獻媚大吏爲疑。趙執信尤持異論。併士禛而掎軋之。平心而論。犖詩大抵縱橫奔放。刻意生新。其源淵出於蘇軾。王士禛池北偶談記其嘗繪軾像。而已侍立其側。後謁選果得黃州通判。爲軾舊游地。又施元之蘇詩註。久無傳本。犖在蘇州。重價購得殘帙。爲校讎補綴。刊版以行。其宗法可以概見。故其詩雖不及士禛之超逸。而清剛雋上。亦拔戟自成一隊。其序記奏議等作。亦皆流暢條達。有眉山軌度。士禛寄犖詩有曰尙書北闕霜侵鬢。開府江南雪滿頭。當日朱顏兩年少。王揚州與宋黃州。言二人少爲卑官。即已齊名。不自長蘅合刻始。所以釋趙執信之議也。然則士禛亦未嘗不引爲同調矣。

【鐵廬集二卷外集二卷後錄一卷】江蘇巡撫採進本 國朝潘天成撰。天成字錫疇。溧陽人。寄籍桐城。爲安慶府學生。溧陽志載其幼與父母避讎相失。年十五乞食行求。遇於江西界。百計迎歸。備販以養。備

極艱苦。以其間讀書講業。竟爲積學。年七十四。汔窮餓以死。瞿源洙集有潘孝子傳。與志所言合。蓋篤志苦行之士也。是集爲其門人許重炎所編。冠以小傳年譜。第一卷爲默齋訓言。天成述其師湯之錡語也。二卷爲雜著。天成詩文也。三卷爲語錄。重炎與蔣師韓記天成語也。外集一卷。爲勿菴訓言。天成記其師梅文鼎語。二卷爲雜著。亦天成遺文補刊者。後錄一卷。則其墓記之類也。天成學問。源出姚江。以養心爲體。以經世爲用。其詩文皆抒所欲言。不甚入格。然行誼者文章之本。綱常者風教之源。天成出自寒門。終身貧賤。而天性真摯。人品高潔。類古所謂獨行者。其精神堅苦。足以自傳其文。故身歿嗣絕。而人至今重之。特錄其集。俾天下曉然知國朝立教在於敦倫紀。礪名節。正人心。厚風俗。固不與操觚之士。論文采之優劣。亦不與講學之儒。爭議論之醇疵也。

【湛園集八卷】副都御史黃登賢家藏本

國朝姜宸英撰。宸英有江防總論。已著錄。初編其文爲湛園

未定彙。秦松齡韓茨皆爲序。後武進趙同敷。摘爲西溟文鈔。此本爲黃叔琳所重編。凡八卷。宸英少習古文。年七十始得第。績學勤苦。用力頗深。集中有與洪虞鄰書。論兩浙十家古文事。謂兩浙自洪永以來。三百餘年。不過王子充。宋景濂。方希直。王陽明。三四人。其餘謝方石。茅鹿門。徐文長等。尙具體而未醇。不應浙東西一水之間。一時至十人之多。不欲以身廁九人之列。蓋能不涉標榜之習。以求一時之名者。其文閱肆雅健。往往有北宋人意。亦有以也。是集前二卷。皆應酬之作。去取之間。未必得宸英本意。然梗概亦略具於斯矣。集末札記二卷。據鄭羽達所作宸英小傳。本自單行。今亦別著於錄。不入是集焉。

【古懽堂集三十六卷附黔書二卷長河志籍考十卷】兩江總督採進本 國朝田雯撰。雯字子綸。一字

綸霞。號山蘊。德州人。康熙甲辰進士。授中書舍人。官至戶部侍郎。是集凡文二十二卷。詩十四卷。當康熙中年。王士禛負海內重名。文士無不依附。門牆求假借。其餘論。惟襄與任邱龐塏。不相辨難。亦不相結納。塏叢碧山房集。格律謹嚴。而才地稍弱。襄則天姿高邁。記誦亦博。負其縱橫排奐之氣。欲以奇麗駕士禛上。故詩文皆組織繁富。鍛鍊刻苦。不肖規規作常語。趙執信作談龍錄。嘗議其詩中無人。然偏師馳突。終能自成一隊。談藝者弗能廢也。附載黔書二卷。其爲貴州巡撫時作。又長河志。籍考十卷。德州古廣川地。隋書避煬帝諱。改長河也。王士禛居易錄。嘗稱黔書篇不一格。有似考工記者。似公穀檀弓者。似越絕書者。如觀偃師化人之戲。然與長河志。籍考。實皆祖郭憲洞冥記。王嘉拾遺記之體。是亦好奇之一證。存備文章之別格云爾。

【榕村集四十卷】福建巡撫探進本 國朝李光地撰。光地有周易觀象。已著錄。是集爲乾隆丙辰。其孫

清植所校刊。其門人李紱爲序。惟詩下註自選字。則餘皆清植排纂也。凡觀瀾錄一卷。經書筆記讀書筆錄共一卷。春秋大義。春秋隨筆共一卷。尙書句讀一卷。周官筆記一卷。初夏錄二卷。尊朱要旨。要旨續記共一卷。象數拾遺。景行摘篇。又附記共一卷。文二十五卷。詩五卷。賦一卷。所註諸書及語錄。刊本別行者不與焉。其不以詩文冠集。而冠以筭記者。光地所長。在於理學經術。文章非所究心。然即以文章而論。亦大抵宏深肅括。不雕琢而自工。蓋有物之言。固與鞞悅悅目者異矣。數十年來。屹然爲儒林巨擘。實以學問勝。不以詞華勝也。

【三魚堂文集十二卷外集六卷附錄一卷】兩江總督探進本 國朝陸隴其撰。隴其有古文尙書考。已

著錄是集爲其門人侯銓所編。凡雜著四卷。書一卷。尺牘一卷。序二卷。記一卷。墓表志銘壙記傳共一卷。外集六卷。則哀其奏議條陳表策申請公移而終之以詩。隴其行狀之類亦併附焉。目錄之末有其從子禮徵跋。言隴其平生不屑爲詩古文詞。尤以濫刻文集爲戒。故易簣時篋中無遺藁。至康熙辛巳。禮徵乃旁搜廣輯。彙成是集。而屬銓分類編次。蓋隴其沒後九年。此集乃出也。其文旣非隴其所手定。則其中或有未定之藁。與夫偶然涉筆不欲自存者。均未可知。然隴其學問深醇。操履醇正。即率爾操觚之作。其不合於道者。固已鮮矣。惟是隴其一生非徒以講明心性爲一室之坐談。其兩爲縣尹。一爲諫官。政績亦卓卓可紀。及體用兼優之學。而銓等乃以奏議公牘。確然見諸行事者。別爲外集。夫詩歌非隴其所長。列之外集可也。至於聖賢之道。本末同原。心法治法。理歸一貫。周禮皆述職官。尙書皆陳政事。周公孔子。初不以是爲粗迹。即黃榦編朱子詩文。亦未嘗薄視論政之文。揮而外之。銓乃徒知以太極論冠篇欲使隴其接迹周子。而以其循績別爲外集。尊空言而薄實政。是豈隴其之旨乎。以此本久行於世。故姑仍原刻錄之。而附糾其編次之陋如右。

【因園集十三卷】編修周永年家藏本。國朝趙執信撰。執信字伸符。號秋谷。晚號飴山老人。益都人。雍正中分益都置博山縣。今爲博山人。康熙己未進士官。至左春坊左贊善。其詩集流傳頗夥。諸本往往不同。此本曾經落水。紙墨渝敝。末有乾隆辛酉執信門人丁際隆跋。稱是秋重謁秋谷先生於因園時。先生病目彌甚。不作詩者六年矣。從仲君羹梅得先生手定詩藁。分十三集。錄副未及校。而羹梅遂索原本。以去歲寒無事。乃校一過。曩見手書濟南竹枝及宿法慶寺二律。皆不在。蓋所刪多矣。云云。羹梅者常熟仲

是保之字。爲執信門人之冠。最爲篤契。則是集爲執信晚年定本。手授之者矣。十三集者。一曰并門集。二曰閑齋集。三曰還山集。四曰觀海集。五曰鼓柅集。六曰涓流集。七曰葑溪集。八曰紅葉山樓集。九曰浮家集。十曰金鵝館集。十一曰回帆集。十二曰懷舊集。十三曰磻菴集。集各一卷。以存其舊。不復以篇頁多寡爲分也。執信娶王士禎之甥女。初相契重。相傳以求作觀海集序。士禎屢失其期。遂漸相詬厲。離隙終身。今觀還山集中。尚有酬士禎詩二首。又爲士禎作西城別墅十三咏。至鼓柅集中。渡江一首。已有祇應羨詩老。持節問岷源句。註曰。謂阮翁。又悼吳孝廉一首。有漁洋未識名先著句。其詞氣已不和平。自是以還。遂互相排擊。則謂二人之釁。生於作觀海集時。其說當信。迨其後沿波逐流。遞相祖述。堅持門戶。入主出奴。曉曉然迄無定說。平心而論。王以神韻縹緲爲宗。趙以思路劖刻爲主。王之規模闊於趙。而流弊傷於膚廓。趙之才力銳於王。而末派病於纖小。使兩家互救其短。乃可以各見所長。正不必論甘而忌辛。好丹而非素也。

【懷清堂集二十卷】浙江巡撫採進本

國朝湯右曾撰。右曾字西厓。仁和人。康熙戊辰進士。官至吏部

右侍郎。兼翰林院掌院學士。少以詩見賞於王士禎。康熙五十二年。聖祖仁皇帝問掌院學士揆敘。聞湯

右曾工詩。令以其集進呈。揆敘遂以右曾所作文光果詩。上達睿覽。蒙御製賜和。今刻冠斯集之首。實千

古儒者之至榮。是集刻於乾隆乙丑。論者稱浙中詩派。前推竹垞。後推西厓。兩家之間。莫有能越之者。今

觀二家之集。朱彝尊學問有餘。而才力又足以運掉。故能鎔鑄變化。惟意所如。右曾才足肩隨。而根柢深

厚。則未免稍遜。齊驅竝駕。似未易言。然亦近人之卓然挺出者也。

【二希堂文集十二卷】福建巡撫探進本

國朝蔡世遠撰。世遠字聞之。漳浦人。康熙己丑進士。官至禮

部侍郎。諡文勤。是編乃其所作雜文。冠以耕籍賦。聖主親詣太學頌。青海平定詩序。日月合璧五星連珠頌。河清頌。樂善堂文鈔序。共六篇。爲卷首。志榮遇也。其餘序四卷。記一卷。傳一卷。論說書共二卷。墓表誌銘。行狀共一卷。祝文祭文共一卷。雜著一卷。目錄之後。有其門人寧化雷鉉附跋。稱其堂所以名二希者。世遠嘗自作記。言學問未敢望朱文公。庶幾其真希元乎。事業未敢望諸葛武侯。庶幾其范希文乎。其務以古賢自期。見於是矣。前有雍正庚戌。皇上在藩邸時親製序一篇。稱其講學鼇峯。教人以忠信孝弟仁義。發明濂洛關閩淵源。有自也。及立朝而風采議論。嘉言讜議。足以爲千百世治世之良規。則又國家棟梁之任也。今觀其文。溯源於六經。闡發周程張朱之理。而連以韓柳歐蘇之法度。所謂蘊之爲德行。行之爲事業。發之爲文章者。吾於先生見之。煌煌天語。載在簡端。睿鑒品題。昭示中外。非惟一時之恩遇。實亦千古之定論矣。迨我皇上龍飛御極。於甘盤舊學。篤念彌深。乾隆己卯。諭正文體。舉世遠之文爲標準。爰已詔編纂四庫全書。世遠著作。又蒙襲錄。且絲綸宣示。均字而不名。寵禮儒臣。於斯爲極。今讀其集。大抵理醇詞正。具有本原。仰見遭際聖時。契合非偶。其上邀知遇。固不僅在文字間矣。

【敬業堂集五十卷】

浙江巡撫探進本

國朝查慎行撰。慎行有周易玩辭集解。已著錄。是編哀其生平

之詩。隨所游歷。各爲一集。凡慎旃集三卷。過歸集西江集共一卷。踰淮集一卷。假館集二卷。人海集春帆集。獨吟集各一卷。竿木集題壁集共一卷。橘社集勸酬集溢城集雲霧窟集各一卷。客船集竝轡集共一卷。冗寄集一卷。白蘋集秋鳴集共一卷。敝裘集酒人集共一卷。游梁集皖上集中江集各一卷。得樹樓集

近遊集共一卷。賓雲集一卷。炎天冰雪集。垂橐集共一卷。杖家集。過夏集各一卷。偷存集。繙經集共一卷。赴召集。隨輦集。直廬集。考牧集。甘雨集。西阡集。迎鑾集。還朝集。道院集各一卷。槐籬集二卷。棗東集。長告集。待放集。計日集。齒會集。步陳集。吾過集各一卷。夏課集。望歲集共一卷。粵游集二卷。附載餘波詞二卷。自古喜立集名。以楊萬里爲最多。慎行此集。隨筆立名。殆數倍之。其中有以二十四首爲一集者。殊傷煩碎。然亦微其無時無地。不以詩爲事矣。集首載王士禎涼序。稱黃宗羲比其詩於陸游。士禎則謂奇創之才。慎行遜游。綿至之思。游遜慎行。又稱其五七言古體。有陳師道元好問之風。今觀慎行近體。實出劍南。但游善寫景。慎行善抒情。游善隸事。慎行善運意。故長短互形。士禎所評良允。至於後山古體。悉出苦思。而不以變化爲長。遺山古體。具有健氣。而不以靈敏見巧。與慎行殊不相似。核其淵源。大抵得諸蘇軾爲多。觀其積一生之力。補註蘇詩。其得力之處可見矣。明人喜稱唐詩。自國朝康熙初年。窠臼漸深。往往厭而學宋。然粗直之病亦生焉。得宋人之長。而不染其弊。數十年來。固當爲慎行屈一指也。

【望溪集八卷】

江蘇巡撫採進本

國朝方苞撰。苞所作周官集註。已著錄。其古文雜著。生平不自收拾。

莫多散失。告歸後。門弟子始爲哀集成編。大抵隨得隨刊。故前後頗不以年月爲詮次。苞於經學研究較

深。集中說經之文最多。大抵指事類情。有所闡發。其古文則以法度爲主。嘗謂周秦以前文之義法。無一

不備。唐宋以後。步趨繩尺。而猶不能無過差。是以所作上規史漢。下倣韓歐。不胥少軼於規矩之外。雖大

體雅潔。而變化太少。終不能絕去町畦。自關門戶。然其所論古人渠度。與爲文之道。頗能沈潛反覆。而得

其用意之所以然。雖蹊徑未除。而源流極正。近時爲八家之文者。以苞爲不失舊軌焉。

【存硯樓文集十六卷】江蘇巡撫採進本 國朝儲大文撰。大文字六雅。宜興人。康熙辛丑進士。官翰林院編修。大文初以制藝名。歸田後乃潛心古學。尤究心於地理。故全集十六卷。而論形勢者居七卷。凡山川阻隘。邊關阨塞。靡不詳究。如荊州論至十一篇。襄陽論至七篇。廣陵西城一篇。推求古今城郭異地。山川異名。援據史籍。如繪圖聚米。當年進退攻守之要。成敗得失之由。皆口講而指畫之。他家作史論者。多約略大概。以談兵作地志者。多憑藉今名而論古。國朝百有餘年。惟閻若璩明於沿革。大文詳於險易。顧祖禹方輿紀要考證史文。雖極博洽。往往以兩軍趨戰中途相遇之地。即指爲兵家所必爭。不及二人之精核也。惟邊塞以外。如西域諸部。蜀徼各番。驗之往往不合。蓋常道路未通。異域傳聞。圖經不備。不能及今日天威者。定得諸目睹之真勢。使之然。固不足怪耳。其他雜文。閒有隸事太繁之失。而徵引典博。終勝空疎。但取其所長可矣。

【香屑集十八卷】江蘇巡撫採進本 國朝黃之雋撰。之雋字石牧。號唐堂。華亭人。康熙辛丑進士。官至右春坊右中允。是編皆集唐人之句爲香奩詩。凡古今體九百三十餘首。前有自序。亦集唐人文句爲之。凡二千六百餘言。集句爲詩。始晉傅咸。今載於藝文類聚者。皆寥寥數句。聲韻僅諧。劉勰明詩不列是體。蓋繼之者無其人也。有唐一代。無格不備。而自韋蟾妓女續楚詞兩句之外。是體竟亦闕如。至北宋石延年王安石。閒以相角。而未入於集。孔武仲始以入集。而別錄成卷。尙未單行。南宋李龔之梅花裙剪綃集。文天祥之集杜詩。始別著錄。然卷帙亦無多。之雋是編。雖取諸家之成句。而對偶工整。意義通貫。排比聯絡。渾若天成。且惟第二卷無題五言長律中。重用杜甫二句。陸龜蒙二句。餘雖纒纒鉅篇。亦每人惟取一

句不相重複。且有疊韻不已。至於倒押前韻。而一一如自己出。可謂前無古人。後無來者。雖其詞皆豔冶。千變萬化。不出於綺羅脂粉之間。於風騷正軌。未能有合。而就詩論詩。其記誦之博。運用之巧。亦不可無一之才矣。

【鹿洲初集二十卷】江蘇巡撫探進本 國朝藍鼎元撰。鼎元有平臺記略。已著錄。是集爲其友曠敏本所編。初定於雍正丙午。越六年壬子。又合其續稟。重汰定之。仍爲二十卷。故前有敏本序。序後又有敏本紀。各述其始末。鼎元喜講學。尤喜講經濟。於時事最爲留心。集中如論閩粵黔諸省形勢。及征勦臺灣事宜。皆言之鑿鑿。得諸閱歷。非紙上空談。至於所敘忠孝節烈諸事。亦點染生動。足裨風教。其中如論直隸水利之類。生長南方。不能達北方水性。未免掇拾陳言。與顧太史書之類。自雪冤謗。雜以輕薄謔詈。尤所養不純。然文筆條暢。多切事理。在近人文集中。猶可謂有實際者也。

【樊榭山房集二十卷】浙江巡撫探進本 國朝厲鶚撰。鶚有遼史拾遺。已著錄。是集因所居取唐皮日休句。題曰樊榭山房。是以爲名。生平博洽羣書。尤熟於宋事。嘗撰宋詩紀事一百卷。南宋院畫錄八卷。東城雜記二卷。又與同社作南宋雜事詩七卷。皆考證詳明。足以傳後。其詩則吐屬嫺雅。有修潔自喜之致。絕不染南宋江湖末派。雖才力富健。尙未能與朱彝尊等抗行。而恬吟密咏。綽有餘思。視國初西泠十子。則翛然遠矣。前集詩分甲乙丙丁戊己庚辛八卷。附以詞分甲乙二卷。爲康熙甲午至乾隆己未之作。續集亦詩八卷。而以北樂府一卷。小令一卷附焉。則己未至辛未作也。

【果堂集十二卷】江蘇巡撫探進本 國朝沈彤撰。彤博究古籍。精於考據。所著有周官祿田考。三經小

疏皆已著錄。是集多訂正經學文字。如周官頌田異同說。五溝異同說。井田軍賦說。釋周官地征等篇。皆援據典核。考證精密。其於禮經服制。多所考訂。尤足補漢宋以來注釋家所未備。其釋骨一篇。雖爲醫家而作。然非究貫蒼雅。兼通靈素者不能也。其論堯典星辰。不兼五緯。蓋主孔安國傳。又於在璿璣玉衡以齊七政。力闢史記斗杓之解。雖未必盡爲定論。然各尊所聞。亦足見其用意之不苟矣。集雖不尙詞華。而頗足羽翼經傳。其實學有足取者。與文章家又別論矣。

【松泉文集二十卷詩集二十六卷】工部侍郎汪承霈進呈本。國朝汪由敦撰。由敦字師茗。安徽休寧人。以商籍補浙江學士。故又爲錢塘籍。雍正甲辰進士。由編修官至吏部尙書。贈太子太師。謚文端。由敦記誦淹博。文章典重有體。自爲諸生。即以才學著聲。及登第以後。策名詞館。橐筆講幃。荷蒙皇上特達之知。洵加拔擢。入直禁廷。每應制。輒吟奉敕撰述。無不仰承聖訓。指示塗轍。藝林溯本。學海知源。所業日以益進。晚年遺藁頗夥。未及編次。其子工部右侍郎臣汪承霈。謹加排次。都爲二集。文集分二十三門。詩集自戊子迄丁丑。凡五十年之作。共成四十六卷。繕本進呈。復蒙特賚宸章。曲加評騭。嘉詩篇之雅正。許文律之清醇。御藻親搗。光垂不朽。此固由敦之績。學能文。榮膺稽古。而人臣私集。得以上邀天獎。題詞弁首。實千古未有之殊施。尤海內承學之士。所爲敬誦奎文。交相感頌者爾。

右別集類九百六十一部。一萬八千零三十八卷。皆文淵閣著錄。

案諸史著錄。但有別集總集之分。文獻通考。始於別集之內。析出詩集歌詞奏議三門。考奏議皆闕。國政宜與詔令竝爲一類。不宜列之於集。詩集亦屬別集。必欲區分。則有文無詩者。將又立文集一

門。彌滋繁碎。今移奏議入史部。而別集詩集。則不復區分。惟歌詞體卑而藝賤。則從馬氏之例。別立詞曲一門焉。

卷一百七十四

集部二十七

別集類存目一

【董子文集一卷】編修朱筠家藏本。漢董仲舒撰。仲舒有春秋繁露。已著錄。隋書經籍志。載仲舒集一卷。又註曰。梁二卷亡。舊唐書經籍志。新唐書藝文志。俱仍載二卷。宋史藝文志。又作一卷。後兩本竝佚。明正德己亥。巡按御史盧雍。行部至景州。爲仲舒故里。因修復廣川書院。祀仲舒。竝哀其逸文。以成是集。然自採錄本傳外。僅益以西京雜記古文苑所載數篇。不及張溥百三家集之完備。故僅存其目於此焉。

【諸葛丞相集四卷】內府藏本。國朝朱璘編。璘字青巖。常熟人。官至南陽府知府。是編首卷所錄諸葛亮遺文一卷。陳壽所上目錄皆不載。蓋撫拾三國志註。及諸類書而成。其黃陵廟記。明楊時偉作。諸葛書嘗以撫用。蘇軾大江東去詞語。駁辨其僞。今考陸游入蜀記。作於乾道六年。記黃牛廟事。引古諺。及李白歐陽修詩。張詠贊甚詳。獨一字不及亮記。袁說友所刻成都文類。作於慶元五年。亦無此文。然則屢託之本。出於南宋以後。明甚璘。乃仍然載入。絕無考訂。至心書五十條。顯然僞託。亦取以苟充卷帙。且武侯十六策。其僞與心書同。晁氏讀書志著錄。則猶出宋人之手。旣取心書。又不取是策。何也。二卷以下。皆爲附

錄所列八陳圖及分野諸條，猥雜尤甚。末一卷全爲璘及其子瑞圖詩文，是非刻亮集，乃刻璘家集矣。

【陶詩析義二卷】福建巡撫探進本

明黃文煥撰。文煥有詩經考，已著錄。崇禎中文煥以召試擢翰林。

會其鄉人黃道周以論楊嗣昌陳新甲逮問，詞連文煥，同下詔獄。獄中箋註楚辭聽直八卷，竝著此書。自序所謂首夏之廿五日，襪被就白雲者是也。其析義之例有三：一曰練句練章，不專平淡；一曰憂時念亂，不徒隱逸；一曰理學標宗，聖賢自任。每首附批句下，而又總論於篇末。陶詩之妙，所謂寄至味於淡泊，發纖穠於簡古，其神理在筆墨之外，可以涵泳與化而不可一字一句求之於町畦之內。如伯英逸少之蹟，不可鉤摹以波磔，襄陽雲林之畫，不可比量以形象。文煥遭逢世難，借以寓意，則可必謂得陶之精微，則不然也。別本或作四卷，又附以文煥自作赭留集一卷，雖意求附驥，而事類續貂，今析出別著於錄焉。

【陶詩箋五卷】

戶部尙書王際華家藏本

國朝邱嘉穗撰。嘉穗有考定石經大學經傳解，已著錄。是編

乃所註陶潛集，摸索語氣，全類時文批語。其力辨潛不信佛，爲能崇正學，遠異端，尤爲拘滯潛之可重。在於人品志節，其不入白蓮社，特蕭散性成，不耐禪儀拘束，非有儒佛門戶在其意中也。嘉穗刻意講學，故以潛不入慧遠之社爲千古第一大事，不知唐以前人正不以是論賢否耳。

【陶詩彙註四卷】

江蘇周厚堉家藏本

國朝吳瞻泰撰。瞻泰字東巖，歙縣人。是編成於康熙乙酉，首卷

載宋吳仁傑王質二家年譜，末卷附詩話百餘條。其詩註則採宋湯漢、元劉履、明何孟春、張爾躬、黃文煥諸家之說，履未嘗註陶詩，蓋自其文選補遺摭出也。其中如辨辛丑歲遊斜川詩之開歲倏五日，今仍舊註，未爲特解，辨讀山海經詩之形天無千歲句，則持疑於曾季狸周必大二家之說，不能遽斷案，精衛本

屬銜冤。故借以寓忠臣志士之報復。若刑天爭帝不成。本屬亂賊。化形而舞。仍爲妖魄。正可爲卓犖之流。逆常干紀之比。山海經之文。班班可考。潛何取而反尙其猛志耶。瞻泰不考其本。而徒爭於字形疑似之間。未爲得也。又贈長沙公族祖一首。吳仁傑張續往復考證。終與世系不合。惟楊時偉所訂陶集。謂序首長沙公於余爲族。當讀一句。祖同出大司馬。當讀一句。其題中族祖二字。乃後人誤讀。序文祖字爲句。因而妄增詩題。其說頗確。而瞻泰不引。豈偶未見其本乎。集中歸田園詩末首。據遜齋閒覽。定爲江淹詩。有文選可證。問來使詩題一首。據七修類彙。定爲蘇舜欽詩。有蘇子美集可證。其四時一章。但據許顥彥周詩話。定爲顧愷之詩。而愷之詩於古書別無所見。似尙當存疑。未可遽刪也。讀史述九章。舊本不入詩集。瞻泰以其爲四言韻語。移於卷末。然畫扇諸贊。亦四言韻語。何獨舍彼取此乎。

【漫叟拾遺一卷】浙江范懋柱家天一閣藏本。是編選錄唐元結之文。不著編輯者名氏。卷末有竹岡居士跋云。元次山全集。廣東近已重刻。湛甘泉太史序之詳矣。茲復何言。顧此數篇。於警策人心。感激時事。頗切。故別錄之。非有所去取也。末署戊寅冬季。不著年號。以湛若水官翰林年月計之。蓋正德十三年也。

【李詩鈔述註十六卷】福建巡撫採進本。明林兆珂撰。兆珂有詩經多識編。已著錄。兆珂守衡州時。曾刻杜詩鈔述註。茲其守安慶時所刊。以白游蹟多在皖。猶在衡刻甫詩意也。其書亦分體選鈔。每篇首箋。故實終加闡發。亦頗以考訂爲事。欲突過蕭士贇張齊賢舊本。然其中有本詩誤者。如王昭君詩。一上玉關道。玉關與西域相通。非漢與匈奴往來之道。懷子房詩。我來圯橋上。東楚謂橋爲圯。不應於圯下加橋。

字有傳寫誤者。如擬古因之寄金徽。據漢書和帝紀。唐書地理志。金徽當作金微。乃山名。聽新鶯百轉歌。還過菑石聽新鶯。據西都賦。菑石當作菑若。乃殿名。今註內皆未辨及。至於詩之必須註而後明者。如擬古之蒼然五情熱。乃用爾雅春蒼天郭註。萬物蒼蒼然生語。言五情蒼然而生也。開元寺贈衡嶽僧之五峯秀其骨。乃用傳燈錄慧可大師一日頭痛其頂骨如五峯秀出事。今註內亦未證明。文義便不可曉。凡此不一而足。尙未可謂之善本也。

【杜律註二卷】內府藏本。舊本題元虞集撰。集有平遙記。已著錄。是編所註杜詩。凡七言近體一百四十九首。卷首楊士奇序。稱其解題桃樹一篇。瞭然於仁民愛物之旨。深得杜意。必伯生所爲。然歐陽元撰集墓碑。不載其有此書。觀其詞意。亦皆淺近。考元趙沔學詩於集。而所註杜詩。乃無一語及其師。董文玉爲趙註作序。亦疑虞註之非真。然不云實出誰手。案曹安瀾言長語。稱元進士臨川張伯成著杜律演義。曾昂夫作傳。有此名。又有刊版。惜其少傳。往往誤以爲虞伯生。李東陽懷麓堂詩話。亦云徐竹軒以道。嘗謂予曰。杜律非虞伯生註。宣德初已有刊本。乃張姓某人註。渠所親見。合二家之言觀之。則此註實出張伯成手。特後人假集之名以行耳。王士禎池北偶談。謂伯成名性。江西金谿人。嘗註尙書補傳。吳伯慶有輓詩云。箋疏定令傳杜律。誌銘誰與繼唐碑。此尤可爲明徵也。

【讀杜愚得十八卷】通行本。明單復撰。復字陽元。會稽人。千頃堂書目。作嵯縣人。洪武中爲漢陽河泊官。又云一名復亨。舉懷才抱德科。授漢陽知縣。傳聞異詞。未能孰是。是編前有宣德九年黃淮序。稱楊士奇得其本於湖湘。以授江陰朱善慶兄弟刻之。考黃伯思東觀餘論。稱嘗撰杜詩編年集。則編年實始自

伯思其本今已不傳。後魯豈黃鶴諸家穿鑿字句。鉤稽歲月。率多未安。是編冠以新定年譜。亦未免附會。其箋釋典故。皆剽掇千家註。無所考證。註後墜括大意。略爲訓解。亦循文敷衍。無所發明。至每篇仿詩傳之例。註興也。賦也比也。字尤多所牽合矣。

【杜詩通十六卷本義四卷】安徽巡撫探進本 明張縵註。縵字世文。千頃堂書目作字世昌。疑傳寫誤也。高郵人。正德癸酉舉人。官至光州知州。是編因清江范德機批點杜詩三百十一篇。每首先明訓詁名物。後詮作意。頗能去詩家鉤棘穿鑿之說。而其失又在於淺近。本義四卷皆釋七言律詩。大抵順文演意。均不能窺杜之藩籬也。

【杜律意註二卷】陝西巡撫探進本 明趙統撰。統字伯一。臨潼人。嘉靖乙未進士。官至戶部郎中。是編詮釋杜甫七言律詩。首論拗體。謂爲杜之粗律。是全然不解聲調者。所詮釋亦皆臆度。不甚得作者之意。凡例稱所見杜詩。惟虞註二卷。故雖頗有所校正。而漫無考證。如崔氏東山草堂詩以芹字爲出韻。是未知唐韻般字。附真不附文。至宋賈昌朝乃移之。許觀東齋紀事。王應麟玉海皆可考也。

【杜詩鈔述註十六卷】福建巡撫探進本 明林兆珂撰。兆珂官西曹時。即手纂是帙。及守衡州。遂刊刻之。謂甫嘗遊衡。刻甫詩於衡。所以爲衡重也。自敘以爲博擷羣書。增釋未備。時或附以己見。分體選註。成十六卷。然甫詩全集凡一千四百餘首。巨製名章。往往不錄。而於杜鵑行。虢國夫人二詩。向因黃鶴陳浩然二本誤入者。反竝登選。其秦州雜詩二十首。則僅錄八首。遊何氏山林十首。則僅錄六首。竟以其一二標寫次第。似原詩止有此數。尤不可解。至註中援引事實。多不註出典。此又明代著述之通病。非獨兆

珂一人矣

【杜律意箋二卷】福建巡撫採進本。明顏廷集撰。廷集字範卿，永春人。官九江府通判，終岷府左長史。是編取杜甫詩七言律一百五十一首，先用疏釋，次加證引，名曰意箋。蓋取以意逆志之義，其譏僞虞註之草草，持論良是。然核其所解，與僞虞註正復相等也。

【杜詩分類五卷】內府藏本。明傅振商撰。振商字君雨，汝陽人。萬歷丁未進士，官至南京兵部尚書。杜詩分類，始於王洙千家註，振商此編，則又因千家註本，小爲更定，殊無所取也。

【杜詩解八卷】浙江巡撫採進本。明楊德周撰。德周有澹圃芋紀，已著錄。是編哀詩家之論杜詩者，爲第一篇。蓋即蔡夢弼草堂詩話之意，推而廣之，然分類不免於瑣屑，其最不檢者，如八卷補註例第一條云：韓昌黎曰：人各有能有不能，抑而行之，必發狂疾。故杜云：束帶發狂欲大叫。如此註，那得不補云云。是杜詩乃用韓語，天下寧有是事。他如楊慎辨槎字一條，既全載於訂譌字中，又復見於正譌例中，如斯之類，亦往往失之嗜博也。

【杜律註評二卷】浙江巡撫採進本。明陳與郊撰。與郊有檀弓集註，已著錄。是編因元張性杜律演義，略施評點，每首皆有劄批，注文亦時有塗乙，大致皆劉辰翁之緒論也。

【杜詩說十二卷】內府藏本。國朝黃生撰。生有字詒，已著錄。此書以杜甫詩分體註釋，於句法字法，皆逐一爲之割別，大旨謂前人註杜，求之太深，皆出於私臆，故著此以闢其謬。其說未嘗不是，然分章別段，一如評點時文之式，又不免失之太淺。中如謂行經昭陵詩，非祿山亂後所作，寄裴施州詩，據文苑英華

本增遙憶書樓碧池映七字於末。雖亦閒有考證。然視其字詁義府。相去不止上下牀矣。蓋深於小學。而疎於詩法者也。

【讀書堂杜詩註解二十卷】直隸總督採進本 國朝張潛撰。潛字上若。磁州人。順治壬辰進士。官翰林院庶吉士。是編乃其晚年家居所作。以千家註爲本。而稍節其冗複。凡稱原註者。皆千家註。每詩下評語及圈點。則潛所增入也。自稱起己丑。迄癸丑。閱二十四寒暑。五易藁而成。其用功甚勤。然多依傍舊文。尙未能獨開生面。

【杜詩會粹二十四卷】內府藏本 國朝張遠撰。案康熙中有兩張遠。其一侯官人。有超然詩集。別著錄。此張遠字邇可。蕭山人。由貢生官縉雲縣教諭。朱彝尊曝書亭集有送遠之桂林詩。即其人也。是書採諸家之註而成。故曰會粹。其分析段落。訓釋文意。頗便初學。然不免尋行數墨。詩依年譜編次。與諸本互有異同。考核亦未爲詳審。

【杜詩論文五十六卷】內府藏本 國朝吳見思撰。見思字齊賢。武進人。是編成於康熙壬子。據其凡例。蓋擬舉杜詩典故。別爲一書。名曰杜詩論事。故此編但詮釋作意。謂之杜詩論文。夫箋註典故。所以明文義也。論事自論事。論文自論文。是已兩無據矣。而所論之文。又皆敷衍。即以開卷言之。望嶽詩。齊魯青未了。正極寫望字耳。其註乃云。行至於齊。初見岱色。及行至於魯。岱色依然。故曰青未了。過宋員外之間。舊莊詩。杜甫自註曰。員外季弟執金吾。見知於代。故有下句。其語已明矣。其註乃云。落到執金吾結。如此之類。皆頗嫌於詞費。重題鄭氏東亭詩。華亭入翠微句。爾雅。山未及上曰翠微。古有明訓。其註乃云。山曰翠

微秋山也。如此之類。考證亦多未詳。首列章法。句法。字法。諸論。其三折句法一條。引塵中老盡力歲晚病傷心一聯。謂塵中字歲晚字一折。老字病字一折。盡力字傷心字一折。已嫌破碎。又引峽雲籠樹小湖日落船明一聯。謂峽字湖字一折。雲籠字日落字一折。樹小字船明字一折。詩家有是句法乎。

【杜詩闡三十三卷】江蘇周厚堉家藏本。國朝盧元昌撰。元昌有左傳分國纂略。已著錄。是書成於康熙壬戌。前有自序。稱杜詩有因註而顯者。有因註反晦者。一晦於訓詁之太雜。一晦於講解之太鑿。一晦於援引之太繁。反是者又爲膚淺凡庸之詞。曰吾以杜註杜也。則太陋。其持論甚當。然其註如四書講章。其評亦如時文批語。說詩不當如是。說杜詩尤不當如是也。

【杜律疏八卷】沈馬劉樞之家藏本。國朝紀容舒撰。容舒有唐韻考。已著錄。此書因顧宸所撰辟疆園杜詩註解繁碎太甚。又多穿鑿。乃汰其蕪雜。參以己意。以成是編。初名杜詩詳解。其後以所解皆律詩。又字字句句。備爲詮釋。體近於疏。因改今名焉。

【讀杜心解六卷】通行本。國朝浦起龍撰。起龍有史通通釋。已著錄。此書雖總題六卷。而卷首分上下二冊。不入卷數。卷一分子卷六。卷二分子卷三。卷三分子卷六。卷四分子卷二。卷五分子卷五。卷六分子卷二。實二十六卷也。自昔註杜詩者。或分體。或編年。起龍是編。則於分體之中。又各自編年。殊爲繁碎。如江頭五詠。以二首編入五言古詩。三首編入五言律詩。尤割裂失倫。其賦及雜文。舊本皆繫卷末。起龍亦散附各詩之後。如雜述附送孔巢父詩後。秋述附秋雨嘆後。祭房琯文附別琯墓詩後。說旱附大雨詩後。封西岳賦附贈獻納使田舍人詩後。事尙相屬。以三大體賦附贈崔國輔子休烈詩後。因詩中有謬稱三

賦在句。以皇甫淑妃碑附宴鄭駙馬宅詩後。因公主爲淑妃所生。以華州試進士策問附洗兵馬後。因所問乃中興之政。已爲牽合。至以天狗賦附靈湫詩後。以雕賦附義鷁行後。以畫太乙天尊圖文附李道士松樹障子歌後。則強綴之甚矣。自有別集以來。無此編次法也。其閒考訂年月。印證時事。頗能正諸家之疎舛。而句下之註。漏略特甚。篇末之解。繳繞亦多。又詮釋之中。每參以評語。近於點論。時文彌爲雜糅。與所撰史通通釋評與註釋夾雜成文者。同一有乖體例。殆好學深思之士。而不善用所長者歟。

【類箋王右丞集十卷附文集四卷】浙江范懋柱家天一閣藏本。明顧起經撰。起經字長濟。更字元緯。無錫人。嘉靖中以國子監生官廣東鹽課副使。是集以王維詩分類重編。五言古詩分十一門。七言古詩分六門。五言律師分十一門。五言排律分八門。五言絕句分七門。七言絕句分五門。各爲箋註。而以劉辰翁評散附句下。冠以本傳年譜。別以外編遺詩及同詠贈答畫評附後。其文集四卷。則絕無箋註。大都區別繁碎。更甚於王洙之割裂杜詩。王十朋之竄亂蘇集。如清如玉壺冰詩。雖題出鮑照白頭吟。然實省試之作。列之閨情。殊爲不類。配隸尤多乖舛也。

【樊紹述集註二卷】浙江巡撫探進本。

國朝孫之騷撰。之騷所輯尙書大傳。已著錄。樊宗師之文。見稱

於韓愈。愈所爲墓誌。稱其書號魁紀公者三十卷。曰樊子者又三十卷。春秋集傳十五卷。表箋以下雜文。凡二百九十一篇。又雜銘二百二十。賦十。詩七百一十九。唐書藝文志云。樊宗師集二百九十一卷。而今傳於世者。止此二卷。絳守居園池記。舊有宋王晟劉忱所註。至元時已不傳。其載於輟耕錄者。凡有二本。其一爲灤陽趙仁舉字伯昂者所箋註。其一不著註者姓名。然宗儀亦僅著其句讀。而不盡著其箋註。此

本以宗儀所得前本爲主。而以後一本及他本註釋并題跋附焉。至綿州越王樓詩序一篇。則得自計有功唐詩紀事。舊無句讀。之駮以意創補之。宗師文故爲詭異。本非正軌。韓愈以交游之故。曲以文從字順許之。然所謂二百九十一卷者。卒以無傳。則是非之公。雖愈不能奪也。之駮乃掇拾廢棄。爲之註釋。謂之好奇。則可。如謂有當於文章。則未也。故特存舊註。絳守居園池記一篇。示好奇之戒。而此則附存目焉。

【香山詩鈔二十卷】內府藏本

國朝楊大鶴編。大鶴字芝田。武進人。康熙己未進士。官至左春坊左諭

德。是編用明馬元調所刊白氏長慶集本。錄十之三四。芟其所分門目。但以五言七言分古今體編之。

【玉川子詩集註五卷】浙江巡撫採進本

國朝孫之騷撰。盧仝詩唐書藝文志一卷。書錄解題作二卷。

又外集一卷。明正德中刊本作二卷。蓋無外集。全唐詩增多二十二篇。編爲三卷。之騷又增入櫛銘一篇。月詩一篇。編爲五卷。然月詩見錦繡萬花谷。其詞不類。櫛銘則僅與梳銘異數字。乃一詩而譌爲兩題。不常重入。且彭叔夏文苑英華辨證。據羅袞四銘小序。知櫛銘乃袞所作。唐文粹誤題爲盧仝。之騷均未能訂正。殊考之未詳也。案朱彝尊明詩綜以櫛銘爲明人所作。僅刪去二兮字。尤爲舛謬。併附訂於此。全詩故爲粗獷。非風雅之正聲。之騷嗜奇。故特註之。卷首月蝕一篇。考據元和庚寅時事。箋註最詳。然後幅天若不肖。信試喚皋陶鬼一問。而今三台文昌宮云云。應以問字爲句。之騷乃以而今字爲句。殊爲割裂。其他註亦多支蔓。如客荅蛺蝶一首。引羅隱詩以釋黃雀字。不顧其人之在全後。亦未免失檢矣。

【西崑發微三卷】江蘇巡撫採進本

國朝吳喬撰。喬一名及。字修齡。太倉人。是編乃所說李商隱詩案。

唐書商隱傳。稱與溫庭筠段成式俱以四六得名。號三十六體。則商隱所作。別無西崑之名。楊億西崑倡

酬集序稱取玉山冊府之義名曰西崑則西崑之名又非商隱所作此書標題先已失考其所說凡無題之詩又無一不歸於令狐綯如錦瑟一首劉攽中山詩話以爲令狐楚青衣之名其說本謬計有功唐詩紀事稱爲令狐丞相青衣蓋沿此文特省書楚名耳喬不考其源但據丞相之文亦執爲綯之青衣他如少年一首明言外戚平羌第一功富平少侯一首明言十三身襲富平侯可嘆一首明言趙后樓中赤鳳來與綯何與皆鍛煉入之然則柳枝五首非商隱明作一序亦必謂爲綯作矣

【李長吉歌詩彙解五卷】浙江巡撫探進本 國朝王琦撰琦有李太白詩註已著錄註昌谷集者宋有

吳正子明有徐渭董懋策曾益余光姚佺又有宋劉辰翁評本然賀詩鏤心劇腎意匠多在筆墨之外往往可以意會不可言詮諸家多鑽研字句以求之失之愈遠琦此註兼採諸家之本故曰彙解亦不免尋行數墨之見或附會穿鑿或引據失當如鴈門太守行塞土臙脂凝夜紫句舊註引古今註紫塞爲解本不爲謬而琦必從別本作塞上引王勃煙光凝而暮山紫句以就凝紫二字是豈塞上夜景耶又如勉愛行洛郊無俎豆弊廡慙老馬句舊本誤慙爲斬曾益註遂云斬老馬以祖別直謂殺馬食客固非事理余光註斬爲絕謂廡中無馬可乘亦牽強未安琦不從之是矣然不知此用陶潛詩馬廡講肆之意明儒者之不得志而以爲無俎豆以餞行即乘馬亦非強壯仍郢書燕說也至蘇小小墓詩油壁車久相待冷翠燭勞光彩西陵下風吹雨下與雨叶乃用古音集中如讀來爲釐押入支韻之類不一而足琦乃易末句爲風雨改以就待彩二韻尤失古法矣此類不可枚舉與諸家亦魯衛之政也

【豐溪存稟一卷】安徽巡撫探進本 舊本題唐呂從慶撰前有任啓運所撰小傳稱從慶字世膺大梁

人從其祖。伸官於金陵。廣明元年。黃巢攻金陵。從慶走歙之場田。及朱溫篡唐。遂遁居旌德。萬山中隱。居不仕。稱唐遺民。至南唐時乃卒。年九十七。其集歷代史志書目。皆不著錄。此本爲乾隆庚申。其裔孫積祚所刊。稱其從叔高祖元進所手錄。黃之雋邵泰儲大文皆爲之序。稱其湮沒八百年而始顯。然其書晚出。授受源流。渺不可考。越宋元明至今。忽傳於世。論者頗以爲疑。其詩如賊警之何以慰時。勿遊多寶寺之先供座佛。歛村徑。即景之啼鳥斷還仍。及長此樂清禱。草堂坐雨之憊黍轉餘精。薄暮步村徑之飛蟲搏澗舞。鳴鵲抱巢修。醉臥田閒。里人扶歸之垂手引模糊。咏菊之風雨困秋曦。皆不似晚唐五代人語。又其中有懷嚴子陵前輩一題。案李肇國史補。稱進士互相推敬。謂之先輩。無稱人以前輩之事。杜甫詩。畫手看前輩。吳生遠擅場。又前輩飛騰入。餘波綺麗爲。亦僅用爲詞藻。無稱人以某前輩之事。況遠隔千年。忽被此目。唐人諸集。實未前聞。又春雪往柵山題。中有敲詩驢子背上語。案賈島咏推敲二字不定。見唐摭言。鄭繁言詩思在灞橋風雪中。驢子背上。見唐詩紀事。在今日則爲典故。在唐末猶爲近事。不應從慶用之。且稱吟詩爲推敲。已屬割裂。至改爲敲詩。明以前人實無此語。疑爲贗鼎。蓋亦有由矣。

【譚藏用詩集一卷集外詩一卷】江蘇巡撫採進本 舊本題唐譚用之撰。用之字藏用。其履貫時代。不見於史。新唐書藝文志。載有譚藏用詩一卷。次於劉言史黃滔之前。全唐詩亦載用之詩一卷。謂爲五代末人。而宋史文苑傳。又云開寶初。有穎贇劉從義。善爲文章。張翼譚用之。善爲詩。張之翰善箋啓。則又當爲宋初人。厲鶚宋詩紀事。遂系之於宋。衆說紛紛。莫能考定。今此集前題姑蘇吳岫家藏本。悉依宋鈔十字。後有譚氏子孫札一通。稱集本元人鈔。宋版鈔。書家珍藏。罕行於世云云。是其書當出於明之中葉。

而全唐詩所載之七律四十首。則別爲集外詩。附之於後。蓋亦其子孫所題。以別於本集者。然自宋以來。閱數百年。收藏者從未著錄。而忽得於吳岫家。又集外諸詩。皆本於唐詩鼓吹。當時郝天挺所選錄。已不爲少。乃無一篇出於本集。其故頗不可解。且反覆檢勘。頗多疑竇。如經歷官名。不特唐百官志所無。即宋代亦未曾置。至元時始有此職。而集中夢祝直詩。乃有忽夢潯州祝經歷句。其可疑者一也。又吳真人奉旨求賢詩。不似唐人語。考元時有道士吳全節。被遇成宗。仁宗英宗。封崇文宏道真人。見於元史。而延祐中。嘗命真人王壽衍求訪道行之士。與此所云奉旨求賢者。情事相近。似當爲吳全節作。其可疑者二也。又集中贈胡守詩。鋪敘時事極詳。其大略云。因思閩廣間。壤地有深阻。兇豪據深洞。老幼負戈弩。幸逢天子聖。元帥復神武。詔書一日下。海內盡歌舞。橫算罷舟車。求賢復科舉。而金盤山詩。又有貞元紀年。案貞元爲德宗年號。距唐末百餘歲。時代大不相及。而證諸唐書。亦無閩廣作亂之事。惟元史載成宗元貞元年。昭賀藤豈。禮全。衡柳吉。贛南安等處。蠻寇竊發。二年上思州叛賊黃勝。許攻剽水口。思光寨。其後屢見於本紀。似與閩廣兇豪之語相合。而仁宗皇慶二年。始行科舉。與求賢復科舉語亦相近。蓋元代未嘗有此制。仁宗始法古舉行。故謂之復。若唐則科舉一代不絕。不可謂之復矣。貞元年號。恐當是元貞之譌。特元貞盡二年。而此作七年。爲不相符耳。其可疑者三也。又送趙容詩云。武林楊柳舊依依。甲第樓臺有是非。莫道天涯龍已化。但看雲際鶴還飛。其意指南宋之亡。若唐末五代時。則錢氏據有臨安。勢方全盛。安得有此語。其可疑者四也。豈用之遺集。散佚殘闕。其子孫剽他人所作。攙雜其間。以足卷帙。故牴牾如是歟。

【范文正公尺牘三卷】浙江巡撫探進本 宋范仲淹撰。仲淹有范文正集。已著錄。是編皆其平生手簡。爲家書二十六首。交游八十一首。蓋其家子孫所輯。宋時已於集外別行。後有張栻及朱子所作文正書帖跋語二則。當亦後人所附入。原本五卷。今止三卷。則陳振孫所改編也。

【曾樂軒集一卷】兵部侍郎紀昀家藏本 宋張維撰。維烏程人。仁宗時官衛尉寺丞。都官郎中。張先之父也。先嘗摘維所自愛詩十首。繪爲十詠圖。孫覺爲之序。周密齊東野語備載其詩。及覺序。併述是圖始末甚詳。此本乃安邑葛鳴陽所刊。即從齊東野語錄出。原圖殘闕。佚其第五首。故此亦惟存九首焉。

【別本公是集六卷】山東巡撫探進本 宋劉敞撰。敞有春秋傳。已著錄。其文集久佚。今始從永樂大典編次成帙。此本乃錢塘吳允嘉從諸書中搜輯而成。考宋文鑑。尙有敞所作續諡法一篇。唐順之右編。有奏議六篇。此集均未收入。又誤載劉敞詩。及詩文重複。文同題異者數篇。又舜讓禹以下三篇。鈔錄舛錯。原目亦頗失先後之序。然較之新喻所刻三劉集。採摭稍富。故今仍存其目。不沒其蒐輯之勞焉。

【陳副使詩一卷】浙江巡撫探進本 宋陳洎撰。洎字亞之。彭城人。即師道之祖也。皇祐中官至三司鹽鐵副使。宋國史實錄皆不爲立傳。故宋史亦失載其人。此本僅詩十二首。金侃跋語謂陸繩仲從宋人墨蹟卷錄出者。前有熙寧九年曲阜顏復序。後有張徽司馬光蘇軾任希夷李璣五跋。復序謂其事業在卿大夫者。以補國利民。傳稟跋亦謂景行懿文。知者蓋鮮。曲阜長道顏公。侯官宏中鄭公。而下諸大賢。表而出之。輯成巨軸。蓋皆當時就題卷中者。璣跋作於嘉定癸酉。自皇祐改元。至是一百六十餘年。賢士大夫猶相與珍其遺篇。景企不置。則洎之爲人可知矣。金侃又謂跋其後者。尙有林希孫覺蘇轍徐積錢世雄。

諸人惟遺侯官鄭宏中一跋。今希等諸跋竝佚不存。則已非侃所見之本。又顏復稱詩二十二篇。蘇軾稱詩二十五篇。今所存僅及其半。亦不知何時散失。厲鶚宋詩紀事載洎詩十三篇。較此本多過項羽廟過田文墓二篇。惟此本所有之黃鵠詩。鶚失採耳。

【居士集五十卷】

內府藏本

宋歐陽修撰。前列蘇軾序。及年譜。舊本每卷有熙寧五年子發等編次數

字。而軾序謂得於其子棐。乃次而論之。蓋序作於元祐六年。時發已卒。故序中不及耳。慶元中周必大編次修集。自居士集外有外集等九種。通一百五十三卷。此編僅三之一。然出自修所手輯。文獻通考引葉夢得之言曰。歐陽文忠公晚年取平生所爲文。自爲編次。今所謂居士集者。往往一篇閱至數十過。有累日去取未決者。則其選擇爲最審矣。此本又取淳熙閒孫益謙所校。重鐫卷末。列諸本字句異同。極爲詳核。又一本爲明代朝鮮所刊。校正亦極精審。以周必大所編文忠集已全部收入。無庸復錄。故今惟存其目焉。

【歐陽遺粹十卷】

編修勵守謙家藏本

明郭雲鵬編。雲鵬爵里未詳。卷首有嘉靖丁未雲鵬自敘。以陳

亮歐陽文粹。僅錄一百三十篇。所收太隘。乃補錄八十三篇。附刻其後。然亮所錄持擇精審。與本集多有異同。宋人舊本存之。可以備參考。此則全從本集採出。字句旣無可互證。又其精不及亮所錄。而其博又不及修所自定居士集。實兩無所取。故析出別存其目焉。

【老泉文鈔】

無卷數

編修勵守謙家藏本

明郭祥鵬編。祥鵬泰和人。成化辛丑進士。是集於蘇洵集

中。摘取權書十篇。衡論十篇。箋策二篇。別爲一集。案洵全集具存。其文章之妙。豈止於此。此選亦無謂甚。

矣。

【東坡外集八十六卷】江蘇巡撫採進本。不著編輯者名氏。前有焦竑序。稱世傳東坡集。多亂以他人之作。如老蘇水官九日上魏公。送僧智能三詩。叔黨颺風思子臺二賦。人知其謬。至和陶擬古九首。大悲圓通閣記。本子由作。見欒城遺言。虛飄飄三首。公與黃秦倡和。見少游集。睡鄉記。擬無功醉鄉記。而作。今竝屬子瞻。代滕甫辨謗。王銍謂爲其父作。四六話。備載其文。大率紀次無倫。眞贗相雜。最後得外集讀之。多前所未載。而卷帙有序。如題跋一部。游行詩文字畫等。各以類從。而盡去志林仇池筆記之目。最爲精核。其本傳自祕閣云云。考和陶擬古九首。雖見於欒城遺言。其實軾轍各自有詩。所謂客從遠林薄。依牆種楊柳者。轍詩也。有客叩我門。繫馬門前柳者。軾詩也。竑所糾摘。未爲盡確。又轍所作軾墓誌。載所作凡六集。晁陳二家所錄。多應詔集十卷。宋史藝文志所載。凡十一集。皆無此八十六卷之本。且外集之名。以別內集。軾之詩文。旣已全載於此。別無所謂內集。則外集之名。殊無根據。竑稱得之祕閣。不知明代之書。盡於楊士奇張萱所錄。二家之目不載。竑又何從而得之。此直竑以意刪併。託之舊本耳。

【黃樓集二卷】兩淮馬裕家藏本。明魯點編。胡廷宴補。點有齊雲山志。已著錄。廷宴漳州人。點書成於萬歷甲辰。廷宴補刊。則在丁未。相距二三年。而廷宴序。稱歲久浸壞。漸以失次。殆不可曉。蓋明代朝覲官入都。例以重貨賂津要。其餘朝官。則刊書一部。佐以一帕。致餽。謂之書帕。其書即謂之書帕本。其倉卒不暇自刊者。則因舊官所刊。稍改面目而用之。動以舊刊漫漶爲詞。而偶忘其相去不久也。宋熙寧十年。蘇軾守徐州。值河決澶淵。南溢於泗。城幾沒。軾捍禦。百方。城以無恙。乃取土剋水之義。即城東門爲樓。聖以

黃士名曰黃樓。其弟轍及秦觀皆爲之賦。陳師道爲之銘。軾亦有九日黃樓黃樓觀月諸詩。遂爲古蹟。點官徐州。因哀軾詩文作於徐州者爲一集。題曰黃樓集。實非皆爲黃樓作也。入之地理。名實不倫。今仍入之別集。附軾集後焉。

【東坡守膠西集四卷】浙江巡撫採進本

明閻士選編。士選字立吾。綏德州人。萬歷庚辰進士。官至山

東按察使。是編乃士選爲萊州府知府時採蘇軾在膠西詩文刻爲一帙。以尙有挂漏。及官按察使時補完之。其王宗稷年譜亦僅摘錄熙寧八年乙卯軾到密州及十年丁巳自密移知河中府復改知徐州一段。蓋借軾以重膠西也。

【蘇文奇賞五十卷】江蘇周厚堉家藏本

明陳仁錫編。仁錫有繫辭十篇書。已著錄。是編取東坡七集。

分體選錄。一以時文之法批點之。至於志林之屬亦皆摘錄。不知是固不以文章論也。颶風賦乃蘇過之作。後人誤題其父。仁錫因而錄之。亦漫無考證矣。

【東坡禪喜集十四卷】浙江巡撫採進本

明凌濛初編。濛初有聖門傳詩嫡家。已著錄。先是徐長孺嘗

取蘇軾談禪之文彙集成編。唐文獻序而刊之。濛初以其未備。更爲增訂。萬歷癸卯。濛初與馮夢禎遊吳閩。攜是書舟中。各加評語於上方。至天啓辛酉。與山谷禪喜集並付之梓。濛初喜取前小品。以套版刻之。剞劂頗工。而無裨藝苑。此亦其一種也。

【東坡養生集十二卷】內府藏本

國朝王如錫編。如錫字武工。江寧人。是編前有王思任序。則當成於

前明之末。然又有康熙甲辰邱象升序。蓋書成於崇禎中。批點行世。則出象升手也。其書取蘇軾詩文雜

著有關於閒適頤養者。分飲食。方藥。居止。游覽。服御。翰墨。妙理。調攝。利濟。述古。志異。十二門。軾以文章氣節。雄視百代。其游戲諸作。大抵患難中有託而逃。如錫乃惟錄其小品。所謂飛鴻翔於寥廓。而弋者索之。藪澤也。使軾僅以此見長。則軾亦一明季山人而已矣。何足以爲軾乎。

【蘇詩摘律六卷】內府藏本。舊本題長垣縣知縣無錫劉宏集註。不詳時代。惟取蘇軾集七言律詩註之。潦草殊甚。

【呂次儒集一卷】編修汪如藻家藏本。宋呂南公撰。南公有潛園集。已於永樂大典中裒輯成編。此本乃後人採掇而成。僅麻姑山詩二十四首。福山詩一首。文三首。仍以符行中原序冠之。其麻姑山詩。蓋出麻姑山志。前有小引。西江詩話所載之葛仙峯詩。即在其中。而題作上葛仙壇。標目小異。其錢鄧州不燒楮鏹頌一首。則自呂祖謙宋文鑑中錄出者也。篇帙寥寥。採撫殊爲寒窘。今旣別編巨帙。此爲廢棄矣。

【支離子集一卷】浙江鮑士恭家藏本。一曰竹堂集。宋道士黃希旦撰。希旦邵武人。一名晞。字姬仲。自號支離子。熙寧中嘗召至京師。典太乙宮事。後病卒。其徒傳爲仙去。無可證驗也。此集爲淳祐己酉。九龍觀道士危必升所編。後附小傳云。希旦爲九天彌羅真人。掌上帝章奏。語甚怪妄。其詩亦凡近無深致。不類出世有道者之言。且希旦沒於熙寧甲寅。不云有詩。越一百七十五年。是集忽出於羽流。則非惟仙去之說事涉荒誕。并此集殆亦依託矣。

【山谷刀筆二十卷】編修汪如藻家藏本。宋黃庭堅撰。庭堅全集已著錄。此乃所著尺牘也。以年爲次。自初仕至館職四卷。居憂時三卷。在黔州三卷。戎州七卷。荊渚二卷。宜州一卷。皆於全集中摘出別行者。

然是編向有宋槧本。非後人所爲。考宋史藝文志。楊億亦以刀筆別行。蓋當時風氣。有此一體云。

【精華錄八卷】浙江鮑士恭家藏本

舊本題宋任淵編。淵有山谷內集註。已著錄。是集皆摘錄黃庭堅

詩文。前有淵序。不著年月。又有朱承爵題詞。稱嘗得其目錄。蓋宋元祐閒刻版。而亡其文。心寶其名。而竊病其實。久之始獲。功稽載籍。緣目尋詞。以還故物。若太史大全詩。宋文鑑文苑英華文翰類選光岳英華諸集。悉掇拾無遺云云。考庭堅卒於徽宗崇寧四年乙酉。是書之選。雖無年月。然稱黃太史山谷集幾萬篇。嘗節其略而謬註三十之一也。則成於所註內集後。內集註中。已稱徽宗爲徽考。鄱海許尹敘內集註。亦稱作於紹興時。此集既刻於元祐中。何以反在其後。且錄中詩文。以本集年月核之。已有崇寧中作。何以預刻於元祐時。集中之目。亦往往與本集不合。如夜發鄂渚。曉泊漢陽。親舊攜酒追送一題。是時庭堅自武昌赴宜州。貶所。故親舊追送。至於漢陽。此本割裂其文。作漢陽親舊追送。則親舊屬之漢陽。追送字不可通矣。又用前韻贈高子勉一題。乃庭堅自用其韻。本集可考。此本乃作和高子勉。則事實全乖矣。謝公定和二謝秋懷。邀予同作一題。有末四字。乃見倡和之意。此本無此四字。則謝公定自和二謝。與庭堅無關矣。甚至雙井茶詩。人閒風日不到處。四句。乃七言古詩之前半。而割爲絕句。改其題曰內直觀化。第十一首之竹筍初生一絕。改其題曰二月江南。修水記一篇。乃取庭堅書幽芳亭一篇。摘其中一段。而略增末數語。其餘竄亂。不可勝數。淵所註內集。年經事緯。考證詳明。何以此集憤憤至此。至於所錄集中。不載諸詩。西湖徙魚和蘇公二首。乃陳師道三首之二。見後山集中。淵亦嘗註師道詩。何以兩集並收。漫無一語之訂正。其新竹一首。乃陸游詩。題曰東湖新竹。見劍南集中。淵何以能於數十年前預見之。其爲僞

託固可不攻而破。且承爵序既稱緣目尋詞集中一題數首者目中竝無明文云摘選某首何以摘選者較多。又稱所採之詩有文苑英華乃宋太宗時宋白等奉敕編撰所錄詩文止於唐代何以有庭堅之作排律之名唐宋元人皆無之舊集具存可以覆案至元末楊士宏所選唐音始以排律標目明初高棅選唐詩品彙仍之不改乃沿用至今何以此本刊於宋時已有五言排律其爲承爵依託爲之亦確鑿無疑何景明曰山谷精華錄任淵選者其所採取多不愜人意王士禛曰精華錄八卷有天社任淵自序錄中取舍未愜人意張宗柝亦曰觀其錄取大意祇以備體且多闌入游戲之作非上選也宗柝所見者稱嘉靖閒摹宋槧本土禎所見者稱明章邱李開先家宋槧本皆在承爵之後何景明雖正德時人而比承爵亦差後蓋皆即承爵此刻託諸宋槧觀士禛所記任淵序與此本不異一字而承爵之序與淵序貌爲軋苗如出一手其作僞之蹟固了然矣向來藏書之家珍爲祕笈蓋以名取之未及一一核其實耳

【山谷禪喜集二卷】內府藏本 明陶元柱編元柱始末未詳是集於黃庭堅集中錄其闡發禪理者別爲一書蓋欲以配東坡禪喜集也

【后山詩集十二卷】江蘇巡撫採進本 宋陳師道撰師道有全集已著錄此本爲雍正乙巳嘉善陳唐所刊正集六卷仍魏衍所編之舊逸詩五卷詩餘一卷則唐蒐輯諸書補所未備者也正集舊有任淵註今皆削去別本各行未爲不可唐同里吳淳爲作序乃極論其註當削則謬之甚矣

【襄陽遺集一卷】兩淮馬裕家藏本 明范昉泰編昉泰有米襄陽外紀已著錄此乃所輯米芾遺文考芾寶晉英光集世有傳本明泰蓋未之見故蒐采各書裒爲此編然闕略殊甚至於倒書心經咒語一則

本佛書舊文。非芾所撰。亦登簡牘。則更誤矣。

【斜川集十卷】江蘇蔣曾瑩家藏本

舊本題宋蘇過撰。過軾之季子。字叔黨。斜川其自號也。事蹟附載

宋史蘇軾傳。其集文獻通考作十卷。世無傳本。王士禎香祖筆記稱康熙乙酉有書賈來益都之顏神鎮。攜蘇過叔黨斜川集。僅二冊。價至二百金。有奇。惜未得見之。其存佚今不可知。然士禎所記多傳聞之詞。未必確也。此集乃近時坊間所刊。其本但有邊闌而不界。每行之烏絲。此本染紙作古色。每頁補畫烏絲。而僞鐫虞山汲古閣毛子晉圖書一印。印於卷末。蓋欲以宋版炫俗。然考晁說之所作蘇過墓誌。過卒於宣和五年。此集中所稱乃嘉泰開禧諸年號。以及周必大姜堯章韓侂胄諸人。過何從見之。其中所指時事亦皆在南渡以後。尤爲乖刺。案劉過龍洲集中所載之詩。與此盡同。蓋作僞者因二人同名爲過。而鈔出冒題爲斜川集。刊以漁利耳。龍洲集已別著錄。此本本不足存。以世傳刊本鈔本不一而足。且卷數與文獻通考所載相合。恐其燧聽。故存其目而辯之焉。

【雙峯存藁六卷】江西巡撫探進本

舊本題宋進士舒邦佐平叔撰。宋志及諸家書目皆不著錄。厲鶚

宋詩紀事亦不載其名。前有自序。稱早困舉子業。竊第後方學四六語。又稱尙書劉公會爲辛丑省試官。余以晚出門生之禮事之。辛丑爲徽宗宣和三年。則邦佐當爲北宋末人。集中有和洪龜父歲晏詩。龜父黃庭堅甥。洪朋字也。庭堅最賞其詩。而劉克莊後村詩話稱其早卒。則邦佐與之倡和。又在徽宗以前。序末題甲子歲四月。而中云投綬西歸。老於三徑。甲子爲高宗紹興十四年。則其老而退休。在南宋之初。而集中有賀黃察院啓。在紹熙四年。迎潭帥朱殿撰啓。在紹熙五年。上距高宗甲子。凡五十年。邦佐當已百

有餘歲。乃復在仕途。似無此理。況邦佐及見洪朋。則與蘇軾陳師道僧道潛皆同時人。特相距先後。聞耳自序稱願借後山向來一瓣香。敬爲曾南豐句。則陳師道語也。真隱集序稱遞相傳寫。不無魚魯。謹守昔人白鷗沒浩蕩。採菊見南山之戒。則蘇軾語也。其詩復云。不如陶靖節。客至空持甌。不如蘇東坡。勝敗兩忘憂。又云。大蘇文章繼老蘇。魏徵勳業付魏謩。又云。參寥已似絮沾泥。天女雖來煖非肉。皆作典故用之。尤爲可疑。他如池平初鬪蛤。柳老半藏鴉。即軾詩之夜涼初吠蛤。柳老半書蟲也。早爲挂銅鉦。即軾詩之樹頭初日挂銅鉦也。小雨止還作。虛窻暗又明。即軾詩之微雨止還滴。小窻幽且妍也。蜜熟花蜂亦慣營。即軾詩之蜜熟黃蜂亦懶飛也。卷地風來忽吹散。即軾詩之蕊地風來忽吹散也。即刻意學步。不應雷同至此。其爲撫軾詩贗作。痕迹顯然。至於宋璟梅花賦。宋已不傳。故李綱集有補作。其序甚明。今集中有讀廣平梅花賦詩。知其出在劉墀隱居通議之後。梅子又生仁句。乃以唐寅詩試嘗梅子又生仁句。截去二字。知其出於唐寅之後。是殆近時之所爲耳。

【別本海陵集一卷】浙江巡撫採進本 宋周麟之撰。麟之海陵集二十三卷。外集一卷。已著錄。此本僅詩六十三首。文四篇。即外集一卷。書賈削去標題。外集字別作僞帙。以售欺耳。

【李忠定集選四十四卷】福建巡撫採進本 宋李綱撰。綱有梁溪集。已著錄。此本凡錄奏議十五卷。文十六卷。詩六卷。靖康傳信錄三卷。建炎進退志四卷。冠以本傳一卷。行狀三卷。明萬歷中閩人李嗣元所選。其凡例稱限於貲。不及全刊也。兵燹版佚。國朝康熙己酉。建寧李榮芳又重刊之。稱購得三舊本。皆有殘闕。合之乃成完帙。其用力頗勤。梁溪全集。大抵藏書舊家始有之。世不多見。今行於世者。惟此本。故附

存其目不沒剗之功云。

【林泉結契五卷】編修汪如藻家藏本

宋王質撰。質有詩總聞。已著錄。是編乃商邱宋肇摘紹陶錄中

山友辭。山友續辭。水友辭。水友續辭。山水友續辭。各爲一卷。謂其有玩物適情之趣。改題此名。其文則無所增損也。

【北山律式二卷附王炎詩一卷晁冲之詩一卷】浙江鮑士恭家藏本

宋葉夢得所選程俱詩也。夢得

有春秋傳。俱有麟臺故事。皆已著錄。是編前有夢得序。稱致道北山集四十卷。旣爲之序。人皆知致道之文。而不知其詩。即知其詩。亦僅知其古風。而不知其律詩之妙。及門鄭晦。係致道同里人。初學韻語。予謂其何舍近而就遠也。因選錄致道近體詩二卷。名曰北山律式云云。其文淺鄙。不似夢得他作。北山集已別著錄。此爲駢拇枝指。無論真僞矣。卷後附錄王炎雙溪類稿十數首。晁冲之具茨集數首。尤不解其何意。大抵雜湊之本。姑充插架之數者也。

【別本汪文定集十三卷】江蘇巡撫探進本

宋汪應辰撰。應辰全集。已於永樂大典內裒輯成編。別著

於錄。此本乃明程敏政以內閣藏本選錄而成。非其完帙。

【延平文集三卷附錄二卷】編修汪如藻家藏本

宋李侗撰。侗有朱子所輯延平問答。已著錄。此本乃

侗裔孫葆初更彙詩文一卷。附綴於後。改題此名。故宋志不載。前三卷均標曰朱熹編。其實朱子惟編問答。未編詩文。特借以爲重耳。後二卷爲附錄。則朱子所爲行狀之類也。

【別本蘆川歸來集六卷】編修汪如藻家藏本

宋張元幹撰。是集已於永樂大典中裒輯成編。別著於

錄此本凡詩二卷。雜文三卷。末附幽巖尊祖事實一卷。詩僅有近體。又編次無緒。至以題米元暉瀑布橫軸一詩。題蘇養直絕句後一詩。題江天暮雨圖一詩。題江貫道絕壁古松一詩。入之雜文跋類中。蓋殘闕掇拾之本也。

【陳文恭公集十三卷】浙江鮑士恭家藏本。舊本題宋陳康伯撰。康伯字長卿。弋陽人。宣和三年中上舍。丙科。仕終尙書左僕射。同中書門下平章事。諡文恭。事蹟具宋史本傳。是集爲其裔孫以範編次。并以誥敕及諸書文字。有涉於康伯者。彙附於後。然遺文僅二卷。而附錄乃十一卷。末大於本。殊非體例。且遺文亦多僞作。如所載謝敕命修家譜表稱。昨進家譜。敕令史院編修。填諱自古以來。無是事理。其謝語稱伏惟聖躬保重。聖壽隆長。而首稱臣康伯叩頭拜謝曰。末稱臣等不勝欣躍。無任感戴叩謝之至。尤不曉宋人章表體例。又首載原序一篇。稱乾道七年。新安門人朱熹頓首拜書於碧落洞天。其詞鄙陋。殊甚。朱子年譜具在。不言有此師。朱子集中亦無此文。蓋無往而不僞也。

【志道集一卷】浙江鮑士恭家藏本。舊本題宋顧禧撰。禧字景繁。吳郡人。居於光福山。閉戶誦讀。不求仕進。紹興間有司以遺逸薦。不起。後築室邳村。表曰漫莊。凡田居五十年而終。嘗與吳興施宿註蘇軾詩行於世。陸游序所謂助以顧君景繁之賅洽是也。茲編稱禧子宏聞。搜求遺藁。從江浙提刑轉運任某鈔得若干首。取魯論隱居求志之義。題曰志道集。然莫知其所自來。卷首有禧姪長卿序。稱禧以文章擅名。爲里中同學所忌。指作周世宗宮詞禍。幾不解會。以遺逸薦得白。於是杯酒釋奠。盡焚生平所著述。凡百餘卷。無復隻字存者。其敘述禧生平頗具。惟序末署至元壬辰。乃元世祖即位之二十九年。禧爲宋高

孝時人相距一百餘年。安得有其姪尚在爲之作序。又考集中多載洪興祖倡和之作。興祖當紹興中。以忤秦檜貶死。禧正與之同時。又似乎真出禧手。惟贈行省任古一首。宋時無此官名。而序中則作提刑轉運任公。復與宋制相合。其長卿結銜。稱石泉書院山長。福州路教授。又非宋官。殊參錯不可解。詩僅三十餘首。且多俚句。疑其出於依託焉。

【千慮策二卷】江西巡撫探進本。宋楊萬里撰。萬里有誠齋易學。已著錄。是編凡君道三策。國勢三策。治原三策。人才三策。論相二策。論將二策。論兵二策。馭吏三策。選法二策。刑法二策。冗官二策。民政三策。前有自序。已載於誠齋集中。此江西所刊別行本也。本傳稱虞允文爲相。見此策薦爲國子博士。則當時已別行矣。

【錦繡論二卷】永樂大典本。舊本題宋楊萬里撰。考宋貢舉條式。第二場試論一道。限五百字以上。則此編蓋當時應試程式也。然體例拘陋。未必真出於萬里。疑併書中國子監批點。皆坊賈託名耳。

【分類誠齋文贈後集十二卷】副都御史黃登賢家藏本。不著編輯者名氏。其書分三十二類。取楊萬里易傳千慮策中之語。摘錄標題。各加批點。殊爲庸俗。又有題見此集。而註云文見前集者。亦非完書。相其版式。乃麻沙舊刻。蓋宋末書坊陋本也。

【藥閣集一卷】兩淮馬裕家藏本。舊本題宋辛棄疾撰。棄疾有美芹十論。已著錄。是編集六朝及唐人詩句。爲五七言近體。平聲上下三十韻。韻爲一首。前有棄疾自序。今案唐韻及宋禮部韻。皆上平二十八部下平二十九部。至理宗末平水劉淵始併爲上下平各十五部。棄疾當高孝光寧之朝。平水韻未出。安

得而用其部分。且平韻分上下。自廣韻已然。集中顧以一先爲十六先。至咸韻爲三十。此向來韻書所無。又據魏了翁之說。唐韻下平作二十九先。而小變之者也。至集句始於晉傅咸。宋王安石武仲。皆有其體。今序首卽云集韻非古。又舍王孔而獨舉陳后山林莆田。尤極疎舛。文筆亦頗類明末竟陵一派。決不出棄疾之手也。

【別本攻媿文集三十二卷詩集十卷】兵部侍郎紀昀家藏本 宋樓鑰撰。鑰有攻媿集。已著錄。此本前後無序跋。又文集有目。而詩集無目。較原集少七十八卷。蓋後人選錄而成。然世所傳寫。大抵此本。今亦附存其目焉。

【朱子大同集十三卷】江蘇巡撫採進本 宋陳利用編。明林希元增輯。希元有易註存疑。已著錄。是編皆朱子官同安時所作。考朱子年譜二十四歲爲同安主簿。越二年。受學於李侗。又四年。秩滿而歸。凡莅事七年。其稱大同者。唐貞觀中。於安同置大同場。宋時亦有大同驛。從古名也。詩文皆全集所載。問荅亦語錄所收。別無新異。徒以賢者所莅。人爭攀附以爲重。故同安之人。哀刻以夸飾其地。實不足以盡朱子。而朱子亦不藉此表章也。

【晦菴文鈔續集四卷】安徽巡撫採進本 明崔銑編。銑有讀易餘言。已著錄。宣德中常熟吳訥。有晦菴文鈔六卷。旣以其未備。復爲續輯。而略釋大意於每篇之末。蓋與訥書相輔而行。目錄以七卷爲始。亦合訥書計之也。

【朱子文集大全類編一百一十卷】兵部侍郎紀昀家藏本 國朝朱玉編。玉建陽人。朱子十六代孫也。

是編以朱子正續別三集。合而爲一。俾諸體各以類從。每體之中。又以編年爲先後。分爲八冊。一冊爲道學淵源。世系題贊事實年譜。祭文行狀。褒典祠廟。及門人姓氏附錄。凡三卷。二冊爲賦詩詩餘。凡十卷。三冊爲封事奏劄。凡二卷。四冊爲政蹟宮觀經筵表文疏文。凡十一卷。五冊爲書劄。凡十四卷。六冊爲問荅著書目。凡二十一卷。每卷各爲之引述。其用力頗勤。然割裂煩瑣。究不及大全集之原本。爲能存其舊也。

【別本象山文集十六卷】江西巡撫採進本。宋陸九淵撰。舊本題九淵門人傅子雲編。首卷爲年譜。次卷爲講學語錄。後四卷爲詩文。末附以謚議行狀。前有萬歷乙卯金谿傅文兆重刻序。稱文集已經七刻。殊無善本。友人周希旦得全集而刻之。金陵集中不敢刊削一字。又稱吾家子雲與先生同里。云云。考九淵子持之所作年譜云。開禧元年乙丑。持之編遺文爲二十八卷。外集八卷。楊簡序之。三年丁卯。撫州守括蒼高商老刊於撫州。是爲初本。又云嘉定五年壬申八月。張衍編遺文成。傅子雲序之。未言刊版與否。是爲第二本。是年九月。江西提舉袁燮刊其文集三十二卷於倉司。稱爲持之所裒益。是爲第三本。紹熙四年辛卯。燮之子甫文重刊之。是爲第四本。文獻通考作象山集二十八卷。外集四卷。與三十二卷數合。併載燮序於後。宋史藝文志亦同。無所謂六卷之本。亦無所謂傅子雲編之事。其文僅全集五分之一。則不敢刊削一字之說。尤爲誕妄。蓋後人選刻之本。文兆以宗族之故。借張衍本有子雲作序一事。遂題其名。實非當日之舊。其年譜亦多所竄亂。如載形家占其先墓之言。有糊糊塗塗生一個大孔夫子之語。顯爲不學者所妄加也。

【別本緣督集十二卷】浙江鮑士恭家藏本。宋曾丰撰。丰集久無完本。近始採永樂大典所載。葢綴成帙。已著於錄。此本爲其十世孫自明所輯。萬歷癸未。詹事講爲選而刻之。據事講自序。其先本曾氏裔也。所選僅詩三卷。文九卷。挂漏頗多。今已採其中永樂大典所未載者。編入新本。故附存其目。不更繕錄焉。

【止齋論祖五卷】浙江鮑士恭家藏本。宋陳傅良撰。傅良有春秋傳。已著錄。初傅良講學城南茶院時。以科舉舊學。人無異辭。於是芟除宿說。標發新穎。學者翕然從之。此論五卷。蓋卽爲應舉而作也。首列作論要訣八章。中分四書諸子通鑑君臣時務五門。凡爲論九十二篇。考止齋文集。卷末附錄雜文數首。編內守令文章民論三篇存焉。餘皆削而不錄。疑傅良當日自悔其少作。故其門人編次之時。不以入集。特別錄此本。私存爲程試之用耳。

【南塘四六一卷】浙江巡撫採進本。宋趙汝談撰。汝談字履常。太宗八世孫。居於餘杭。淳熙十二年進士官至權刑部尙書。事蹟具宋史本傳。汝談在當時頗以詩名。歷掌制誥。亦以文章典雅見稱。其嘉定賀玉璽表。有函封遠致。不知何國之白環。瑒刻孔彰。咸曰寧王之大寶四語。王應麟困學紀聞極稱之。今全篇在集中。然他作不盡如是也。

【別本後樂集十卷附錄二卷】江蘇巡撫採進本。宋衛涇撰。涇集本五十卷。刊於元代。歲久散佚。今從散見永樂大典中者。編次成帙。已著於錄。此本乃其十四世孫楫所輯。以志乘諸傳及遺像弁卷首。而以廷試策爲卷一。奏疏爲卷二至卷九。各以時代編次。其末卷則涇與人往還書及所題詩。而以後人祠記之類附焉。楫之大旨。以奏疏爲主。故詩別錄於末。然與後人之文雜編。究非體例。其搜採頗爲未周。亦不

及新編之完備也。

【騷略三卷】浙江汪啓淑家藏本

宋高似孫撰。似孫有剡錄。已著錄。是編皆所擬騷賦。凡三十三篇。其

後款乃詞一篇。集杜甫詩八句。柳宗元詩四句爲之。殊讖詭也。

【棠湖詩藁一卷】浙江鮑士恭家藏本

舊本題宋岳珂撰。珂有金陀稗編。已著錄。茲編乃所作宮詞一

百首。皆咏北宋之事。前有珂自序。稱棠湖綸釣之暇。適有猶子從軍自汴歸。誦言宮殿鐘簾儼然猶在。慨想東京盛際。文物典章之偉觀。聖君賢相之懿範。輒用王建體。成一百首。以示黍離宗周之末志云云。其

本爲鮑氏知不足齋所刊。宋以來公私書目。悉不著錄。不知其所自來。珂序亦無年月。考珂程史。稱紹熙

壬子年十歲。則端平甲午金亡之歲。其年僅五十二。固猶及見宋師之入汴。又據所作玉楮集。珂以紹定

癸巳坐黜。至嘉熙戊戌乃重召。則滅金時珂正閒居。與序亦合。然汴京圖籍。盡入於金。史有明文。詩中乃

云卷帙異書三十萬。至今光采動奎星。所謂今者何時也。且褚摹蘭亭。終存己法。蘇和陶詩。不掩本色。珂

玉楮集。具存其詞。與此迥殊。雖酷學唐人。未必遽失故步。至於如此。又王建王珪花蕊夫人宋徽宗楊皇

后諸家宮詞。今或有不省爲何語者。蓋宮禁舊事。載籍不能備錄。往往無徵。此一百首。則檢點宋人說部。

無不可註其端委。何珂之所述。盡今人之所知也。昔厲鶚作宋詩紀事。凡鮑氏藏書。無不點勘。今所進本。

標識一一具存。獨無一字及此書。則出在鶚後矣。疑鶚及符曾等七人。嘗合作南宋雜事詩。而其北宋雜

事詩。則未及成書。或遺藁偶存好事者。嫁名於珂耶。

【松垣集十一卷】衍聖公孔昭煥家藏本

舊本題宋幸元龍撰。元龍字震父。高安人。宋史不爲立傳。據

集中所言嘗舉進士。理宗朝任朝奉郎。郢州通判。以論史彌遠爲陳咳所劾罷歸。是集宋志亦不著錄。所載凡疏三篇。書四篇。記事六篇。序一篇。行狀一篇。墓誌銘一篇。詩十首。前有像贊及傳。今已佚。後爲事蹟一卷。載所判岳飛。萬俟卨。子孫爭田事。不知何人所記。疑卽集中稱濱谷居士者所爲。濱谷名鳴鶴。卽元龍後裔。搜輯遺藁。編成此帙者也。詩文各繫以評語。閒有註釋。亦頗疎略。元龍事蹟無考。其題曰幸清節公。亦莫詳其得謚之由。首篇論國是疏內。自引所作與陳咳劉之傑二律。而終之曰二詩之意切矣。殊非臣子對君之體。他文亦多鄙淺。而詩謂一篇爲一韻。尤古無是例。殆出依託。其事蹟類中載萬俟卨子孫與岳飛家爭田。委問一十三州府縣不能決。理宗御批金牌敕賜諸侯劍阜纛旗。袞龍筆架。玳瑁硯。委公裁斷。又稱判畢奏聞。上大喜。賜緋魚袋。一象笏。一玉帶。一金帛百端。梅花金臺盞一副。是直委巷之語矣。古來有是事乎。

【臞軒四六二卷】浙江鮑士恭家藏本。宋王邁撰。邁有臞軒集。已於永樂大典中裒輯成編。別著於錄。此乃所作駢體。凡一百五首。蓋卽從原集中摘出。別行者也。

【獻醜集一卷】浙江巡撫採進本。宋許棐撰。棐有梅屋集。已著錄。是集前有嘉熙丁酉自序。僅短文十篇。樵談三十則。載左圭百川學海中。似非完本。詞旨淺俗。亦無可取。

【漁父詞集句二卷】永樂大典本。宋釋少嵩撰。少嵩字亞愚。其序曰。嘉定壬申。予年十九。其秋自穆湖買船。由鄱陽九江之巴河。往來凡數月。每遇景感懷。因集句作漁父詞。以自適。所集不甚工。亦李萇翦緝集之流亞耳。

【斷腸集二卷】浙江鮑士恭家藏本。宋朱淑真撰。淑真錢塘女子，自號幽棲居士，嫁爲市井民妻，不得志以沒。宛陵魏端禮輯其詩爲斷腸集，即此本也。其詩淺弱，不脫閨閣之習，世以淪落哀之，故得傳於後。前有田藝衡紀略一篇，詞頗鄙俚，似出依託。至謂淑真寄居尼菴，日勤再生之請，時亦牽情於才子，尤爲誕語。殆因世傳淑真生查子詞附會之。其詞乃歐陽修作，今載在六一詞中，曷可誣也。語詳詞曲類。斷腸詞條下。王士禛記康熙辛亥，見淑真紹定二年手書璿璣圖記一篇，備錄其文於池北偶談中，且稱斷腸集不載此文，諸家撰閨秀詩筆者皆未之及，云云。然流傳墨蹟，千僞一真，此文出淑真與否，無從考證，疑以傳疑，姑存是一說可矣。

【巽齋四六一卷】浙江鮑士恭家藏本。宋危昭德撰。昭德字子恭，昭武人。寶祐元年進士，官至權工部侍郎，事蹟具宋史本傳。昭德所著有春山集，今已久佚。此本摘錄其駢體，僅四十九首，非完本也。

【石堂遺集四卷】福建巡撫探進本。宋陳普撰。普有全集，已著錄。此本以渾天儀論十六條及各體文爲第一卷，賦三首，詞四首，歌二首，及各體詩爲第二卷，其三、四兩卷，七言絕句二百餘首，皆詠史之詩，末附以雜纂十二條，乃明天啓中普里人阮光寧所選刻，非完帙也。

【東澗集一卷】江西巡撫探進本。宋湯漢撰。漢字伯紀，安仁人，以薦授信州教授。度宗時官至工部尚書，諡文清。事蹟具宋史儒林傳。史稱漢文集六十卷，今惟所編妙絕古今，尚有傳本，而文集則久佚。此本不知何人所輯，雜掇史傳所載奏疏七段，皆非全文，又益以陶靖節詩註序一篇，重修楊龜山舊宅記一篇，真西山讀書記序一篇，石鼓書院記一篇，妙絕古今序一篇，遺詩三首，附以諸家題跋及告身，其於原

帙蓋泰山一毫芒矣

【翦緝集二卷】編修汪如藻家藏本 宋李龔撰龔字和父號雪林潯澤人是編皆集唐人之句上卷凡二十八首惟五言律一首餘皆古體下卷凡九十首則皆七言絕句殆以艱於屬對故耶不及石延年王安石孔平仲所集多矣

【汪水雲詩鈔一卷】江蘇巡撫採進本 宋汪元量撰元量有湖山類藁已著錄此本末有崇禎辛未舊跋稱夏日晒書理雲閒人鈔詩舊冊得水雲詩二百二十餘首錄成一帙其劉辰翁所批點刊行者藏書家必有全本當與好事者共購之云云蓋其時湖山類藁尙無刊本故所見止此所附錄元納新原本作迺賢今改正讀水雲集詩并序稱其多記亡國時事及與文天祥獄中唱和之作此本無與天祥唱和之詩蓋亦從金臺集中鈔入非原本所有也

【須溪記鈔八卷】副都御史黃登賢家藏本 宋劉辰翁撰辰翁有評點班馬異同已著錄其集本一百卷明代已不傳獨存記七十篇其十八世孫葵等重刻之即此本也今全集於永樂大典中重爲裒輯業已成帙此殘闕之本可無庸復錄以孤行已久姑附存其目焉

【雞肋集一卷】江西巡撫採進本 宋何希之撰希之撫州樂安人咸淳甲戌進士署零陵教授宋亡後遁跡以終此本首冠以廷試省試策二篇後附以詩文五十餘篇皆其子孫搜輯而成故體制舛錯編次殊爲無法文格亦多平行蓋闕帙之餘其菁華已不復存矣

【牧萊脞語十二卷二藁八卷】浙江鮑士恭家藏本 宋陳仁子撰仁子字同甫號古迂茶陵人咸淳十

年漕試第一。宋亡不仕。是集名曰牧萊。言牧牛於草萊閒也。初彙題其門人李懋宣編。二彙題其門人譚以則編。觀卷首余恁鄧光薦蕭龍友序。則仁子蓋自定之。託於門人耳。仁子作文選拾遺。襲真德秀文章正宗之說。進退古今作者。若有特識。今觀所作。則殊爲猥濫。諸序皆推其南岳賦。特以壓卷。鄧光薦比之相如。蕭龍友比之班固。然賦所云卓高岡兮爭長。走平壠兮要荒。方各有山。山各有綱。譬諸觀水勢之濤洄者。必航大海。七澤之汪洋。訊花譜之繁麗者。必諏上林。良岳之低昂。恐馬班決無是語。又多以表啓駢詞語錄俚字入之古文。如與衡陽鄒府教書。通體皆散文。而其中忽曰。士修於身。將用於天子之庭。春風莘野之耕。而升陟之規模已定。夜月礪溪之釣。而牧野之體段已成。云云。不惟自韓歐以來。無此文格。即春風夜月四字。尙可謂之有根據乎。殆好爲大言者耳。

【寶峯集二卷】

兩淮鹽政探進本

宋趙偕撰。偕字子永。慈谿人。自以宋宗室入元不仕。隱居大寶山東麓。是集爲其外孫顧恭所編。後兵燹散失。明嘉靖中。其裔孫廣東僉事繼宗得舊本於楊昔濟。向純夫處。

重梓行之。今所鈔傳。即其本也。上卷多與邑令陳文昭所論治縣規條。下卷皆古今體詩。亦多陳腐。蓋其學以楊簡爲宗。故不免以語錄爲文云。

【方韶卿集一卷】

江蘇巡撫探進本

舊本題宋方鳳撰。鳳有全集。已著錄。此集前有曹溶圖記。蓋其家

藏鈔本。然前半卷全採宋遺民錄。後半卷錢塘詩。以下則皆汪元量作。蓋書賈僞鈔。以射利。溶不辨而收之也。

【待清遺藁二卷】

浙江巡撫探進本

宋潘音撰。音字聲甫。天台人。自咸淳之末。遭逢世亂。即隱居不仕。

題所居曰待清軒。入元以後，仍隱遯以終。其集舊無傳本。明嘉靖閒，其後人從敗篋中得遺藁，屬徐雲卿校定而序之。詞氣頗涉麤率，未知果音之手蹟否也。

【心史七卷】江蘇巡撫採進本。舊本題宋鄭思肖撰。思肖有題畫詩、錦錢集，及所著雜文，併附載其父震菊山清雋集後。已著於錄。此書至明季始出。吳縣陸坦、休寧汪駿聲皆爲刊行。稱崇禎戊寅冬，蘇州承天寺狼山中房浚井，得一鐵函，發之，有書緘封。上題大宋孤臣鄭思肖百拜封十字。因傳於時。凡咸淳集一卷、大義集一卷、中興集二卷，皆各體詩歌。久久書一卷、雜文一卷、略敘一卷，皆記宋亡時雜事。後附自序、自跋、盟言及療病咒一則。文詞皆蹇澀難通。紀事亦多與史不合。如雜文卷中於魏徵避仁宗諱作證，而李觀則不避高宗諱。又記蒲壽庚作蒲受耕，原本果思肖親書，不應錯漏至此。其載二王海上事，謂少保張世傑、奉祥興皇帝奔遁，或傳今駐軍離婁衛王溷海。當時國史野乘所記皆同。思肖尤不宜爲此無稽之談。此必明末好異之徒，作此以欺世，而故爲眩亂其詞者。徐乾學通鑑後編考異以爲海鹽姚士粦所僞託，其言必有所據也。

【羅滄洲集五卷】編修勵守謙家藏本。舊本題宋羅公升撰。案厲鶚宋詩紀事載公升字時翁，永豐人。大父開禮，從文天祥勤王，兵敗被執，不食死。公升以軍功授本邑尉，北遊圖恢復，不果。有滄洲先生集云：「其文不甚了了，天祥旣敗，所謂軍功者何功？所謂本邑尉者何人所授？且宋亡之後，子然一匹夫，何以北上圖恢復，皆於事理不甚近。毋乃據地志家乘之文，疑以傳疑乎？」此本有曹溶名字二印，蓋其所藏。題曰宋禮部侍郎鄧中齋中甫批點，明翰林國史修撰七世孫倫校正。首載賦一篇，以下各體分編，而每體

之中分無名集還山藁抗塵集癡業集北行卷五名各爲標題其體例旣爲繁碎而以絕句居律詩前律詩居古體前亦爲倒置意者其初五集自爲卷帙其後人以體分之故雜亂如是耶第二卷之首有皇帝閣春帖子二首端午帖子一首皇后閣春帖子一首夫人閣春帖子一首端午帖子一首考帖子詞爲翰林學士之職公升一縣尉何由得有此作且其祖旣於宋末殉節則其孫必不及南宋承平之盛而其詞乃皆治世之音殊爲可疑又第一卷末有得家問二首一曰乍喜平安報俄增放逐愁又曰東風嚴瀨水不是冷扁舟公升未放逐嚴州也一曰萬里平泉夢惟憐創業難又曰長平門下客知復幾任安公升亦非故將相也又皆與其生平不合至於燕城俗吏諸作詞氣鄙俚如出二手殆其子孫所爲以裝點其忠義者蓋竄亂失真其爲果出公升與否殊在影響之間矣

【林屋山人集一卷】浙江鮑士恭家藏本 宋俞琬撰琬有周易集說已著錄是集詩僅一冊附雜文數首率淺俗不足觀其題楊妃圖絕句一首及食鰻辨一篇尤爲鄙俚蓋琬以數學著不以文章著也後人重其高名搜錄遺篇存之轉爲疵累耳

【遺山詩集二十卷】江蘇巡撫探進本 金元好問撰好問全集已著錄此詩集二十卷乃毛晉從全集摘出刊於十元人集中者別行已久姑附存其目案好問雖入元而未仕元晉以爲元人殊誤顧嗣立元百家詩選初集以好問詩爲冠又沿晉之失今仍題曰金人從其實焉

【水雲村泯藁二卷】編修汪如藻家藏本 元劉壎撰壎有隱居通議已著錄又有水雲村藁亦著錄此集上卷凡賦三篇記十一篇傳一篇題跋四十九篇碑二篇墓表二篇壙志一篇墓誌銘五篇贊十四篇

銘五篇。啓二十篇。書十一篇。詩九十篇。筆記七則。下卷則皆其筆記。疑筆記在當日自爲一卷。傳寫者誤割數段入上卷也。考其詩文皆水雲村彙所載。其筆記亦隱居通議所載。蓋洪武癸丑孫瑛摘錄二書併爲一帙。非其舊本也。下卷載有瑛跋二段。雜於書中。疑後人傳寫誤亂其次。又周密齊東野語一段。突出不倫。亦瑛所附錄。誤合於堽書耳。

【別本松雪齋集二卷】編修汪如藻家藏本。元趙孟頫撰。孟頫全集十卷。又外集一卷。已著錄。此本爲明江元禧所刊。後有萬歷甲寅跋。稱文敏文集湮沒。因檢枕中所藏。益以耳目所睹。記流通之。蓋元禧未見全集。故復搜輯爲此本也。

【安南卽事詩一卷】浙江巡撫採進本。元陳孚撰。孚有觀光交州玉堂三彙。已著錄。此集詩及自註。皆自孚交州集中鈔出。別題此名。蓋書賈鬻僞之本。藏弄者不辨而收之也。

【輝山存藁一卷】浙江鮑士恭家藏本。元蕭國寶撰。國寶字君玉。號輝山。山陰人。流寓吳江。其集乃至順二年。其嗣子英所編次。而孔東濤爲之序。稱其詩清新警策。句律整嚴。然此本所載僅二十四首。爲明崇禎閒。其裔孫雲程重編。疑舊藁散佚。雲程掇拾成之。故所存止此也。書僅五頁。不成卷帙。已見於顧嗣立元詩選中。故不復錄焉。

【草廬吳先生輯粹六卷】浙江范懋柱家天一閣藏本。明王蒙所選。吳澄文也。蒙有忠義錄。已著錄。是編以草廬全集浩繁難竟。乃擇其尤精者。錄爲六卷。以便誦讀。澄之學誦說程朱。而源實出於陸九淵。蒙金谿人。與九淵爲同里。故力爲表章云。

【吳草廬文鈔】無卷數 副都御史黃登賢家藏本 不著編輯者名氏前署甲辰春退谷手選蓋康熙三年孫承澤所定本也於吳澄支言集中鈔其十分之一前後無序跋亦無目錄又不分卷帙蓋偶然繕寫未及成編之本耳

【剡源文鈔四卷】江蘇蔣曾瑩家藏本 國朝黃宗義編宗義有易學象數論已著錄其時戴表元剡源集傳本尙稀因選其記十六首序三十六首墓誌銘四首題後九首宗義亦閒有點定其持擇頗精審然不足以盡表元也

【趙仲穆遺藁一卷】兩淮馬裕家藏本 舊本題元趙雍撰雍字仲穆孟頫子也官至集賢待制同知湖州路總管府事是集凡詩十七首詞十七首卷末題延祐元年春正月寄呈德璉姊丈後有文徵明跋稱此卷行楷兼作轉益妍美從烏程王天羽借觀因題其後蓋從墨蹟鈔出者詩詞皆淺弱如所謂坐對荷花三兩朵紅衣落盡秋風生者殊不多得徵明跋又云德璉孟頫婿王國器也長於樂府楊鐵崖亟稱之云云疑好事者依託雍作竝假借國器名也顧嗣立元詩選已附錄其父孟頫詩末今姑存其目焉

【清江碧嶂集一卷】浙江鮑士恭家藏本 元杜本撰本字伯原清江人事蹟具元史隱逸傳父謙在文天祥幕中嘗毀家以佐軍本讀書能文頗留心於經世吳越歲饑本上救荒策江浙行省丞相布呼密用其言米價頓平遂薦於武宗召至京已而去居武夷山文宗即位再徵不起終於家嘗輯宋遺民詩爲谷音一卷鑒別極精而所自作詩乃粗淺不入格顧嗣立元百家詩選譏其多應酬俚近之作非苛論也

【太平金鏡策八卷】兩江總督探進本 元趙天麟撰天麟自稱東平布衣其始末無考書中有國家道

光五葉語。則當仁宗之世矣。其書以建八極。修八政。運八樞。樹八事。暢八脈。宣八令。示八法。舉八要。爲綱而繫以六十四子目。其文皆儷偶之詞。無所建白。蓋延祐間。初復科舉。坊賈射利之本。卷首題經進字。又冠以進表一篇。語意舛鄙。如云。若國家使隨流待詔。更傾三峽之波濤。若國家使無罪容身。自有五湖之煙月。自古以來。豈有此對揚之體。至末云。謹上書死赦以聞。尤爲無理。殆詭題以炫俗目耳。

【水鏡集一卷】兩淮馬裕家藏本

元元淮撰。淮字國泉。號水鏡。臨川人。至元初。以軍功顯於閩。官至溧

陽路總管。是編一名金困集。困古淵字。與仇遠金淵集同名。蓋遠亦嘗官溧陽教授。均取義於投金瀨耳。

其詩有擊壤集之風。而理趣不逮。視遠詩則不可同日語矣。

【農務集三卷】編修汪如藻家藏本

舊本題元王楨撰。楨有農書。已著錄。此集凡賦五首。詩一百九十

四首。贊銘七首。皆農書所已載。蓋即從農書中鈔出。詭立此名也。其第二卷四言民社詩。乃農書祭社稷之祝詞。三卷繭館贊。乃農書之先蠶壇贊。農書撻詩下有稷詩一首。此集不載。又鐵搭賦佚其首句。則爲後人採掇舛漏。非楨所自編明矣。

【山林清氣集一卷續集一卷】浙江巡撫採進本

元釋德淨撰。德淨字如鏡。錢塘人。泰定天歷間。嘗與

仇遠馮子振白珽諸人遊。其詩皆五七言律體。又續集僅詩七十六首。而咏物者至五十三首。格調亦皆淺弱。末有附集一卷。皆同時諸人酬贈之作。前有三山王都中題五言律詩一首。又一首署蒙古作。亦和王韻。蓋即集中所稱錢蒙古松壑僉事也。

【道園集】無卷數 江蘇巡撫採進本

元虞集撰。集有平猿記。已著錄。此集不列卷數。惟分八冊。前七

冊題曰道園學古錄。後一冊題曰類彙選。然前七冊非學古錄之全本。後一冊亦非類彙之全本。蓋坊刻摘錄。疎漏實多。且每則之首皆題曰崇仁虞集。考集雖寓居崇仁。而其平生詩文皆自稱蜀人。不當以僑寓之地改其祖貫。此必撫州書賈所爲。欲引集以重其鄉土。不足據也。

【虞伯生詩續編二卷】浙江范懋柱家天一閣藏本。元虞集撰。僅詩九十餘首。目錄末有至元後庚辰劉氏日新堂識語一則。稱是集乃學士晚年所作。尤爲得意。敬刻與騷壇共之。云云。考至元後庚辰者。順帝之至元六年也。是年集年六十九歲。李本訪集中。編其詩文爲學古錄者。即是冬之事。本所爲序。則在明年辛巳之十二月。是學古錄尙未出。不識何以有續編之目。中間題目字句亦往往舛譌。此必當時坊賈以集負重名。故掇拾其詩數十篇。梓以射利之本耳。

【范文白詩集六卷】山東巡撫探進本。元范梈撰。梈詩別有七卷之本。題范德機集者。乃臨川葛誰所編。刊於閩中。已著錄。是編爲明楊翬所選。所取纔十之六。其刪汰亦不盡當。

【揭曼碩遺文一卷】江蘇巡撫探進本。元揭傒斯撰。傒斯有全集。已著錄。是編記序碑述凡九篇。爲宜黃劉肇虞所輯。前有肇虞序。稱揭集版兵燹燬沒。今不可遽購。因於諸書所散見者。撫拾若干。不復別擇。概爲編次。云云。蓋不知原集猶存也。惟其中吳澄墓誌一篇。爲全集之所未收。然已刻於支言集首矣。

【鼇溪文集二卷】江西巡撫探進本。元周聞孫撰。聞孫字以立。廬陵人。是集前有永樂辛丑鄒緝序。稱其年三十五舉進士。會試中乙榜。揭傒斯薦入史館。以論修宋史不合。出爲鼇溪書院山長。復爲貞文書院山長。遭亂還鄉里。薦於行省。以便宜授白鷺書院山長。改教授袁州。未及赴而亂益甚。遂不仕。所著書

凡二十卷。無復存者。此本乃明正統壬戌。其曾孫翰林院侍讀叙所輯。僅詩文各一卷而已。文末附奏修三史。以宋爲正統論一篇。全文已佚。僅載其略。鄒緝序所論宋史不合者此也。自晉以來。南北史竝傳。朱子作綱目。亦南北朝分註。聞孫必尊宋比蜀漢。而抑遼金不得比北魏。不知遼金各自立國。與曹氏孫氏以漢之臣子。乘時篡竊不同。聞孫所執。殊爲偏駁。以此去官。未見其有當也。

【王魯公詩鈔一卷】編修汪如藻家藏本。元王士熙撰。士熙字繼學。東平人。翰林學士承旨構之子。以文學世其家。歷官中書省參知政事。在館閣日。與虞集袁桷等唱和。論者比之唐岑賈宋楊劉。爲有元盛世之音。此本不知何人所鈔。與顧嗣立元詩選所載士熙江亭集八十餘首。一一相同。惟次第小異。疑即書賈從元詩選鈔出。僞爲舊本射利耳。

【存復齋集十卷】浙江鮑士恭家藏本。元朱德潤撰。德潤字澤民。睢陽人。流寓吳中。延祐末。以薦授翰林應奉文字。兼國史院編修官。尋授鎮東行省儒學提舉。召見獻雪獵賦稱旨。時集善書者以金泥寫梵書。遂以德潤總其事。後移疾歸。至正閒起爲江浙行中書省照磨官。參軍事。守杭湖二郡。攝守長興。是集有虞集題詞黃潛序。皆見微詞。惟合沙俞焯序。稱其文理到而辭不凡。差得其實。詩則膚淺少深致。益非其所長矣。

【吟嚙集一卷】內府藏本。元宋无撰。无有翠寒集。已著錄。是集始於禹鼎。終於雷夢炎。每事爲七言絕句一章。凡一百一首。各叙其始末於詩後。如自註然。詠史詩肇於班固。厥後詞人閒作。往往一唱三嘆。託意於語言之外。至周曇胡曾詞旨淺近。古法遂微。无詩頗可觀。而此集亦不免以論爲詩之病。其中如金

明池龜胡琴婢勝兒之類。旁摭小說，亦殊泛濫也。

【論範二卷】兩淮馬裕家藏本。題元進士歐陽起鳴撰。起鳴不知何許人。其書雜取經史諸子之語爲題，各繫以論，而史事爲多，共六十篇。所見多乖僻，不足採錄。

【書林外集七卷】浙江鮑士恭家藏本。元袁士元撰。士元字彥章，鄞縣人。即袁珙之父也。以薦授縣學教諭，尋擢翰林國史院檢閱官，不赴。其詩危素序之，稱其清麗可喜。然往往粗淺多累句，如壽呂瀛海詩云：我方而立足先弱，公到古稀鬢未蒼。又其甚者也。

【黃楊集二卷補遺一卷】浙江鮑士恭家藏本。元華幼武撰。幼武字彥清，無錫人。平生篤於孝友，不樂仕進，構春草堂以奉母。凡力可以娛其親者，無不爲之。性好吟咏，友人陳方題其集曰黃楊，蓋爲其愛詩甚篤而奪於多事，故勉其無厄於閨也。然其詩未足名家，世以重其人品傳之耳。

【肅離集一卷】浙江鮑士恭家藏本。舊本題元女子鄭允端撰。允端字正淑，平江人。宋丞相清之五世孫女。歸同郡施伯仁。至正丙申，張士誠入平江，家爲兵所破，貧病悒悒而卒。年僅三十。集首有敘傳，紀其始末。集爲允端沒後，伯仁哀其遺孀而成。錢塘錢惟善、青城杜寅爲作前後序。明嘉靖中，其五世孫仁始刻之。其詩詞意淺弱，失粘落韻者不一而足。錢惟善等皆一代勝流，不應濫許。至是考集中桃花集句，所謂從教一簇開無主，終不畱題崔護詩者。楊循吉吳中往哲記以爲蘇州李氏女子所作，或正德閒是集。未刻。循吉偶爾傳譌，至於碧筒一首，作於王夫人席上者，結有可笑狂生楊鐵篋，風流何用飲鞮盃句。鐵篋，楊維禎號也。與允端雖同時人，然瞿宗吉歸田詩話稱維禎過宗吉叔祖士衡家，以香奩八題見示，依

其體作八詩以呈。維楨稱賞。因以鞮盃命題。宗吉作沁園春云云。宗吉雖不著年月。而鐵崖復古詩中香奩八詠。有維楨自序。稱至正丙午春三月。宗吉先和詩。而後詠鞮盃。又必在丙午之後。以允端小傳考之。是時已沒十年矣。安得聞鞮盃之事。此殆允端原有詩集。歲久散佚。而其後人贗撰刊行。但知維楨鞮盃事在元末。而不知有年月可考也。又有萬歷丁酉江盈科序。稱改題其名曰姑蘇鄭姬詩。尤爲妄作。如以姬爲鄭姓。則其事太古。漢唐以下無此例。如以姬爲女子之美稱。則見與蔡京等矣。今仍以原名肅雝集存其目焉。

【倪雲林詩集六卷】兩江總督採進本。元倪瓚撰。瓚有清閼閣集。已著錄。此本爲明潘瓚校刻。凡四言古詩五言古詩一卷。七言古詩一卷。五言律詩一卷。七言律詩一卷。五言絕句六言絕句一卷。七言絕句一卷。不及新本之完善也。

【韓山人集】無卷數。浙江巡撫採進本。元韓奕撰。奕有易牙遺意。已著錄。其詩古體傷於淺率。近體如新秋次韻云。豐年稻熟村如畫。南國蓴生水亦香。送縣學教諭云。官清便似居高品。任久長如在故鄉。東湖放舟云。樹影不隨流水去。荷香常帶遠風來。晚晴云。西風颯颯林間葉。乍聽猶疑是雨聲。一知半解。尙稍得宋人格律。其瓣香當在劍南。然如桃源小隱云。山迴水轉疑無路。樹密花深別有香。則全襲陸游舊句。不免生吞活剝矣。

【九靈山房遺藁五卷】副都御史黃登賢家藏本。元戴良撰。良有九靈山房集。已著錄。初良集世罕傳。本國朝康熙閒。其里人張以培蒐採諸書。輯爲此本。傅旭元爲刊版。而秀水曾安世。又爲校訂編次。今海

內藏書咸登祕府。良之全集復出。此本掇拾殘闕。已可不錄。以世所通行。且以培等掇拾補綴之勤。亦不可沒。故附存其目焉。

【書山遺集二十卷】江西巡撫探進本 元吳會撰。會字慶伯。金谿人。至正三年。嘗舉鄉薦第一。入明不仕。至洪武戊辰。乃卒。以一足病廢。自稱獨足先生。所作詩文。即名獨足雅言。凡二十卷。李夢陽懷麓堂詩話。尚引其輓張性詩。證杜律註。非虞集作。則正德閒尚存。近世已久無傳本。是集爲其裔孫尚綱所蒐輯。以已非原本。故改題曰書山遺集。而仍編爲二十卷。以存其舊。原刻獨足雅言解一篇。仍冠於首。曾自序云。和樂暢易。清平時所著爲最先。愁促感激。辟地時所著其次也。超逸邁放。學仙時所著爲最後也。今觀其詩。雕績有餘。而興寄頗淺。在元末明初。尙未能獨立一幟。卷首載明初潭王梓一序。文理俚謬。又稱會卒之後。見夢於梓。而求作其事。荒怪不經。殆不足辨。或好事者爲之也。

【高閒雲集六卷】兩淮鹽政探進本 元董養性撰。養性有周易訂疑。已著錄。養性入明不仕。作高閒雲賦。以自況。因以名集。前有洪武中王翌序。盛推其文及詩。此本僅詩五卷。賦一卷。文則已佚。其詩頗清澹。而淺於比興。往往意言竝盡。少含蓄深婉之致。

【程梅軒集四卷】湖北巡撫探進本 元程從龍撰。從龍字登雲。別號漢章。嘉魚人。自元末隱居教授。入明仍不仕以終。是集爲其孫鑑所編。前有其門人李德庸序。及從龍小傳。又有王進王愷二序。及鑑跋。皆永樂中所作。鑑跋稱從龍著作散佚。所存惟此。前三卷凡賦二首。詞七首。餘皆古今體詩。後一卷爲雜文。僅八篇。詩文皆清而過淺。未足抗行於作者之閒。

【茶山老人遺集二卷】浙江孫仰曾家藏本

元沈貞撰。貞字元吉。自號茶山老人。長興人。入明不仕。勞

鉞湖州府志。稱所著茶山彙十二卷。而顧應祥長興志。則稱所著茶山集凡五十卷。朱彝尊編明詩綜。僅搜得樂神曲一十三首。尙多闕文。則原集之佚久矣。此本凡詩一卷。文一卷。乾隆戊午。長興知縣鮑鈺與吳江王藻。歸安姚世銓。姚世鍾。蒐輯而成。鈺序稱縣志所載寥寥。惟從書賈船中購得。顧箸溪長興舊志。所載稍多。因刺取諸書編錄。梓之。然所刺取之書。不著其名。未免無徵不信。靜志居詩話。稱其人品高於楊維禎。至其詩文。則頗涉粗淺。不逮維禎遠甚。如南川軍砦詩。關嚴虎豹。千山月。埜宿貔貅。萬竈煙。一聯對句。全用蘇軾語。出句改令嚴爲關嚴。改鐘鼓爲虎豹。改三更月爲千山月。乃點金成鐵。了白嶺詩。彭殤等齊皆妄作。何爲更泣牛山衣。襲用杜牧語。而牛山衣字更拙。疑後人有所附會。非盡貞之舊彙矣。

【得月臺四卷】

兩淮鹽政探進本

元呂不用撰。不用字則耕。上虞人。元亡不仕。洪武初舉教諭。以龔辭。

自號石鼓山龔。是集爲其孫鳳所編。凡詩三卷。文一卷。前有洪武九年曾衍王霖二序。推之甚。然詩多粗俚。文尤冗漫。

【拱和詩集一卷】浙江鮑士恭家藏本

元曹志撰。志字伯康。自號拱和居士。金華人。至正末。遭亂隱居。

洪武中以遺逸薦。不起。終於家。是集乃其家刻。前有二序。不署年月。亦不署撰人。末附拱和詩序及志小傳。又附其家傳三篇。惟曹倅傳稱六世孫服撰。曹光遠傳稱姚坦撰。曹煜傳稱野史氏容。不著其姓。餘併不知誰作。其文格則如出一手。又附曹光遠誥一篇。後有呂祖謙贊曹彬誥一篇。後有米芾贊。終以竹卷記一篇。又爲志作編次。絕無體例。其詩惟近體。無古體。大抵流連光景。千篇一律云。

【蘭雪集一卷】浙江鮑士恭家藏本。元松陽女子張玉孃撰。玉孃明慧知書，少許字沈侄。既而父母有違言，玉孃不從，適侄屬疾，玉孃折簡貽侄，以死自誓。侄卒，玉孃遂以憂死。葉子奇草木子深以其通問爲非，至嘉靖中，邑人王詔得其遺詩於道藏中，乃爲作傳以表其事，而引無鹽孟光爲比，要其失禮之咎，自不可掩，而其志則可哀已。詩格淺弱，不出閨閣之態。卷首題張獻集錄，蓋玉孃之族孫也。

【荻溪集二卷】編修汪如藻家藏本。舊本題元王偕撰。前有洪武癸亥馮原智序，稱偕字叔與，瑯琊人。官崑山學教授，善繪事。元亡不仕，寓居荻溪之西。以荻溪翁自號。今檢集中所與唱酬者皆國朝順治間常熟諸文士，又嘗入京師，有慈仁寺雙松歌。慈仁寺建於明代，亦與偕時世不相合。惟詩中有歲暮還荻溪諸題，當必國初人寓居荻溪者。集名偶同坊賈遂妄取原智序冠之，指爲偕作，以售欺耳。

卷一百七十五

集部二十八

別集類存目二

【明宣宗詩文一卷】浙江范懋柱家天一閣藏本。案明史藝文志載宣宗文集四十四卷，今未見傳本。此冊僅廣寒殿記一篇，玉簪花賦一首，詩歌詞曲三十九首，非其全帙也。朱彝尊明詩綜所錄宣宗詩多此冊所未載，意者彝尊尙及見其集歟。

【御製回文詩一卷】左都御史張若淮家藏本。案此集載朱當泗所輯國朝典故中，惟題曰御製，不著

朝代明史藝文志不著錄。不知何帝所作。其詩以春夏秋冬四景爲題。有龍文連環八卦諸體。凡二十八首。蓋偶然遊戲之作。流傳於外。與他書宣示頒賜。見諸國史者有殊。故史不載也。

【元宮詞一卷】浙江巡撫採進本

不著撰人名氏。前有自序。稱永樂元年。欽賜余家一老嫗。年七十矣。

乃元宮之乳姆女。知宮中事爲最悉。閒嘗細訪之一。一備陳其事故。余詩中所錄。皆元宮之實事云云。末題永樂四年夏四月朔日。蘭雪軒製。後有毛晉跋。亦不知爲何許人。案朱彝尊靜志居詩話曰。元宮詞百首。宛平劉效祖序。稱周恭王所撰。考定王以洪武十四年之國。洪熙元年薨。序題永樂四年。則爲定王無疑矣。定王名橚。太祖第五子也。明史周王橚傳。用彝尊之說。蓋以所考爲允矣。詩凡一百首。其中如東風吹綻牡丹芽。一首。燈月交光照綺羅。一首。玉京涼。早是初秋。一首。深宮春暖。日初長。一首。二十餘年備掖庭。一首。月明深院有霜華。一首。珊瑚枕冷象牙牀。一首。金鴨燒殘午夜香。一首。惻惻輕寒透鳳幃。一首。憔悴花容只自知。一首。小樓春淺杏花寒。一首。御溝春水碧如天。一首。燕子泥香紅杏雨。一首。春情只在兩眉尖。一首。白露橫空殿宇涼。一首。纖纖初月鵝黃嫩。一首。夢覺銀臺畫燭殘。一首。曉燈垂焰落銀釭。一首。尋常宮怨之詞。殆居五分之一。非惟語意重複。且歷代可以通用。不必定屬於元。頗爲冗泛。其他切元事者。皆無註釋。後人亦不盡解。不及楊允孚灤京雜詠多矣。

【楓林集十卷】安徽巡撫採進本

明朱升撰。升有周易劄註。已著錄。是編前八卷皆詩文。而以官誥及

太祖手敕編入第一卷首。與升文相連。殊爲非體。第九卷載徽州府志本傳一首。廖道南所撰詩贊一首。竝翼連節略十餘則。第十卷爲附錄。皆當時投贈詩文也。升於明興之初。參贊帷幄。兼知制誥。一切典制。

多出其手。與陶安、宋濂等名望相埒。陳敬則明廷雜記嘗稱其李善長徐達常遇春劉基四語。惜明文衡未及收入。明史本傳載太祖大封功臣制詞多升撰。時稱典核。蓋據是文。然統觀全集。文章乃非所長。詩學擊壤集而不成。頗近鄙俚。故朱彝尊明詩綜絕不登其一字。況升身本元臣。曾膺爵祿。而賀平浙東賦序肆言醜詆。毫無故君舊國之思。是尤不可爲訓也。

【槎翁集八卷】兩淮馬裕家藏本。明劉崧撰。崧有槎翁詩集。已著錄。是編乃其文集。羅允升所校正。而吉安知府徐士元爲之刊版。其文頗傷流易。殊不及其詩。

【野莊集六卷】兩淮馬裕家藏本。明王鈿撰。鈿字士魯。太康人。元至正丙午進士。洪武初徵授禮部主事。歷官浙江布政使。建文中召爲戶部尙書。燕王篡立。仍故官。後以布政使勒致仕。事蹟具明史本傳。是集凡詩二卷。文四卷。皆未能入格。前有王崇慶序。謂嘉靖中其後裔曰朝獻者始謀梓之。蓋集中多稱建文爲今上皇帝。故靖難後懼觸語禁。久而不敢出也。

【滄浪櫂歌一卷】浙江范懋柱家天一閣藏本。明陶宗儀撰。宗儀有國風尊經。已著錄。是編詩詞合爲一卷。前有正德丁丑松江唐錦序。稱其集不傳。惟得此一卷。爲宗儀所自編。今考其中詩詞皆已載南村集中。惟題下莊子刺虎圖七言古詩一首。題岳王廟七言長律十四韻一首。爲南村集所未載耳。又對月七言律詩。甘旨未能娛綵侍句。南村集作娛綵服。疑此本爲誤。南浦詞序中一水竝九山。南過村外。以入於海句。南村集作一水兼九山。則南村集誤也。

【危學士全集十四卷】江西巡撫採進本。明危素撰。素有草廬年譜。已著錄。其原集本五十卷。世久無

傳明歸有光得其手藁。因編爲說學齋藁。凡一百三十餘篇。又所作詩名雲林集。乃納新所編。此本文十三卷。詩一卷。乃其鄉人取二集彙輯而成。雖名全集。實非原本。故今仍錄說學齋藁雲林集。以存其舊。此本則附存目焉。

【元釋集一卷】編修汪如藻家藏本

明釋克新撰。克新姓余氏。字仲銘。自號江左外史。又稱爲雪廬和

尙。鄱陽人。元末住嘉興水西寺。洪武初召至南京。嘗奉詔往西域。招諭吐番。所著有雪廬南詢藁。此本別題元釋集。僅古今體詩六十餘首。考賴良大雅集。載有克新詩四首。而此本皆無之。蓋後人於雪廬集中。摘錄鈔存。非其全藁也。

【愛禮集十卷】浙江巡撫採進本

明劉駟撰。駟字宗道。龍谿人。洪武初徵秀才。入試者八千人。駟爲第

一。授都御史。尋坐事徙滇卒。門人私謚愛禮先生。故以名集。凡文三卷。詩二卷。中庸說一卷。書啓三卷。附錄一卷。駟宗陳淳之學。詩文多涉性理。略似語錄之體。中庸說乃講授口義。亦無所發明。集爲宏治六年。浙江參政林進卿所刊。附錄慎獨翁行狀紀。駟父寶與駟平生行實頗具。乃其門人漳州陳拯所述。又附趙先生書一首。則駟之師趙彥進也。

【坦齋文集二卷】江蘇巡撫採進本

明劉三吾撰。三吾字如孫。自號坦坦翁。茶陵人。洪武中官翰林學

士。事蹟具明史本傳。案鄭曉雷禮王世貞竝謂三吾於洪武三十年。以罪誅死。蔣一葵又謂三吾以作大語漏言賜死。明史則稱以考試不實成邊。建文初召還。今集中有敕下御製大明一統賦。實建文時所撰。與史相合。是曉等所載皆不確。知其集在明代不甚傳。故以曉等熟於掌故者。亦未之見矣。此本乃成化

中桐江俞蓋官茶陵時所刊萬歷戊寅茶陵知州韓城賈緣又重刊之三吾於洪武中典司文章頗被恩遇然其文鉤棘而淺近未能凌轍一時也

【一齋集十六卷】福建巡撫採進本 明朱善撰善有詩解頤已著錄是集首載聶鉉所作墓誌稱名善

繼然集中自稱曰朱善而詩經解頤亦題曰朱善則繼字殆刊本誤也是編前集十卷後集五卷又廣遊集一卷附刊於後善以文章爲明太祖所知然核其品第究不能與宋濂諸人雁行

【甘白集六卷】浙江汪啓淑家藏本 明張適撰適字子宜蘇州人明初以儒士徵授水部郎中旋放歸見集中所作其妻沈氏壙志而其祭西平侯文則自署雲南滇池漁課司大使是洪武末又嘗官雲南故集中每自稱滇池老漁也集爲正統丁卯其子收所編文體修潔而未造深厚如在嘉隆以後則爲雅音在元明之間則未能與諸家壁壘相當也

【秣坡詩彙七卷附錄一卷】浙江孫仰曾家藏本 明黎貞撰貞字彥晦秣坡其自號也新會人洪武初舉邑訓導不就坐事戍遼東尋放歸明史文苑傳附見孫賈傳中是集初刻於嘉靖庚戌歲久散佚國朝康熙丙寅其後人搜輯重刊凡詩詞賦三卷雜文四卷卷八附以贈言貞少從孫賈學詩賈集即其所編次雖所造未深而風格尙爲適上惜此本掇拾於殘闕之餘其菁華已不槩見矣

【竹居集一卷】兩淮馬裕家藏本 明王珙撰珙字廷珪常熟人是集爲其曾孫仲申所輯其六世孫古

始刊版朱彝尊明詩綜不載其名蓋偶未見也其詩多用洪武正韻蓋當時功令使然大致出入於月泉吟社一派亦時有秀句而邊幅單窘興象未深數首之後語意略同觀卷中絕無古體其根柢可知矣

【別本袁海叟詩集四卷】江蘇巡撫探進本 明袁凱撰。凱有全集。已著錄。此本乃正德元年陸深同李夢陽所刪定。而何景明授其門人孫繼芳。刊於松江。深及夢陽景明各爲之序。其版久佚。今所存者傳鈔之本也。後有萬歷己丑王俞跋。已佚其前半。不能考見始末。惟篇終有偶續前刊。輒附數言之語。似乎俞又有所續入。然題下多註。選入詩綜字。又似朱彝尊以後之本。非其舊編矣。

【安分齋集十卷】江蘇巡撫探進本 明鄭本忠撰。本忠自號安分先生。鄞縣人。洪武癸丑舉明經不起。郡教授趙思盛薦授昌國訓導。尋陞秦府教授。是集乃永樂中其子復言永言所編。凡記三卷。序二卷。賦詩四卷。雜文一卷。寧波府志稱本忠少篤學。從鄉先生舒卓受尚書。方國珍據浙東三郡。擅爵祿人。本忠義不食其粟。杜門不仕。益務綜覽。涵濡淳蓄。爲文必中矩度。又稱同時有鄭恕者。字本忠。亦爲昌國訓導。建文四年靖難兵至。不屈死。事載遜國名臣傳。疑爲一人。然考是集詩文。有作於永樂閒者。姓字官爵。偶爾相同。未可合而爲一也。

【三畏齋集四卷】浙江汪啓淑家藏本 明朱吉撰。吉字季寧。吳縣人。洪武初官中書舍人。是集凡詩二卷。雜文二卷。據其後序。當時蓋嘗刊版。今印本久佚。惟鈔本存。元末明初作者林立。吉之所著。殊未能伯仲其閒。所以世不甚傳歟。

【新本白石山房彙五卷】浙江巡撫探進本 明張孟兼撰。孟兼有白石山房逸彙。已著錄。是編乃其十一世孫思煌所重編。思煌序稱孟兼舊有白石山房文彙二十卷。與蜀山遺集竝遭回祿。無片紙隻字之存。及觀焦茲國史經籍志。載孟兼集六卷。乃知萬歷初猶存文淵閣。案竝書雖名國史經籍志。實鈔合諸

史藝文志及諸家書目而成。非明文淵閣所貯之書。楊士奇張萱二目。可以互勘。思煌此語殆誤。謹附訂於此。然祕之內府。人閒不得而觀。茲不過殘編斷簡中採而輯之。僅存什一於千百云云。今計編中五言古詩九首。七言古詩三首。排律一首。五言律三首。七言律六首。七言絕句四首。樂歌八章。聯句二首。記四首。行狀二首。傳一首。雜文一首。皆掇拾他書而得者。附以諸家跋語。分爲二卷。其三卷至五卷。皆載同時投贈及後人詩文傳誌。卷帙雖增於舊本。而孟兼之著作。則無所增也。

【靜菴集一卷】兩淮馬裕家藏本。明張羽撰。羽有靜居集。已著錄。此本刪存原集四分之一。改名靜菴集。不知何人所選。其去取未爲精當。

【陳竹山文集四卷】江西巡撫採進本。明陳誠撰。誠有使西域記。已著錄。是集分內外二篇。內篇二卷。皆其奉使時所撰述。僅文十餘首。詩一百三十餘首。外篇二卷。則皆當時投贈詩文。并其先世諸狀也。

【退菴遺藁七卷】兩淮馬裕家藏本。明鄧林撰。林初名彝。又名觀善。字士齊。後成祖爲改今名。新會人。洪武丙子舉人。任潯州府貴縣教諭。秩滿入京。預修永樂大典。凡五年。出爲南昌教授。後又秩滿試高等。

遷吏部主事。宣宗時以事謫杭州。在杭多湖山之遊。倡和甚富。田汝成作西湖志多採之。此本乃太常寺少卿會稽陳贊爲廣東參議時掇拾遺藁而成也。

【尹訥菴遺藁八卷附錄二卷】江西巡撫採進本。明尹昌隆撰。昌隆字彥謙。泰和人。洪武丁丑進士。永樂二年擢左春坊右中允。改禮部主事。爲尙書。呂震誣構見殺。事蹟具明史本傳。昌隆死非其罪。史稱其爲厲鬼。以報震。然當燕王構逆之初。昌隆即勸惠帝以禪讓。其說甚謬。燕王篡立之後。獨以是奏得貸死。

則其人亦不甚可重。是集爲其八世孫應中所梓。鄒元標序之。附錄二卷。則載其詔敕行狀序傳之屬也。傳中稱爲中允。進講有穿楊集。仁宗命其家錄進。中途舟覆沒於水云云。朱彝尊明詩綜。祇稱有集。而不載其名。蓋未見此本。然所選送孟潛陽先生教授邵武府學五言古詩一首。是編亦不錄。蓋採自他書。編此集者。又未見也。

【黃介菴集十一卷】浙江汪啓淑家藏本。明黃淮撰。淮有省愆集。已著錄。案千頃堂書目。載淮所著有介菴集。歸田稟。均不著卷數。此本總名介菴集。而分退直入覲歸田三稟。疑黃虞稷未見此本。但據傳聞載入也。據目錄本十二卷。今第七卷已佚。故以十一卷著錄焉。

【冢宰文集一卷】浙江范懋柱家天一閣藏本。明張統撰。統有雲南機務鈔黃。已著錄。此集爲嘉靖中富平訓導王道所編。道序稱烽火之餘。僅存什一於千百。蓋其所遺者僅此也。卷首有道所纂宦績一篇。言統以永樂之故。勺水不入口。如是者七日。終於吏部後堂。考明史本傳。成祖咎建文之改官制者。乃令統解職務。月給半俸。居京師。統懼。自經於吏部後堂。妻子相牽投池中死。道所云云。固善善從長之意。然非其實也。

【王天游集十卷】兩江總督採進本。明王達撰。達有筆疇。已著錄。是集乃其門人王孚所編。卷末又有其門人翟厚跋。謂其館閣鉅製。及諸子辨等篇。咸未見錄。乃重爲增補。編次仍爲十卷云云。則厚所重定。非孚之舊本矣。據孚稱。達所著有天遊小稟。梅花百詠。古今孝子讚。俱已梓行。詩書二經心法。學者多傳之。又有耐軒雜錄五卷。問津集一卷。南歸集一卷。通書發明一卷。天遊詩集十卷。文集三十卷。今皆未見。

惟景仰撮書一卷。筆疇二卷。附於此集之末者。今尙有別本行世。蓋即從此集鈔出云。

【黃忠宣集八卷】兩淮馬裕家藏本。明黃福撰。福字如錫。號後樂翁。昌邑人。洪武甲子舉人。官至南京

戶部尙書。兼掌兵部。參贊留都機務。事蹟具明史本傳。是集爲其子琮所編。冠以奉使安南水程。殊乖體例。餘多手札公牘。皆不入格。蓋福本以政績傳也。

【坦菴文集八卷】江西巡撫探進本。明梁本之撰。本之名混。以字行。坦菴其別號也。泰和人。洪武中爲

瑞州府學訓導。遷溧陽教諭。改魯王府紀善。本之與其兄潛齋名蕭。鎡稱所作泓渟澄深。端重典則。蓋莊人學者之文。然規模與其兄相近。骨力根柢。則皆不及其兄也。

【桐嶼集四卷】浙江汪啓淑家藏本。明釋德祥撰。德祥字麟洲。號止菴。錢塘人。洪武中住持徑山。吳之

鯨武林梵刹志稱德祥以西園詩忤上意。今觀集中所載夏日西園一律。有熱時無處可乘涼。又有林木三年未得長諸句。語意頗近譏諷。之鯨說當有所據。都穆南濠詩話曰。國初詩僧稱宗泐來復。同時有德祥者。亦工於詩。其送僧東遊詩云。與雲秋別寺。同月夜行船。詠蟬云。玉貂名竝出。黃雀患相連。泐復不能道也。云云。今案送僧一聯。乃四靈之末派。詠蟬一聯。尤落滯相穆之所品。殊屬乖方。朱彝尊明詩綜於此集雖多所採錄。然氣格薄弱。終不能與泐等竝馳也。卷首有福建布政使富春姚肇序。稱詩集一卷。今本實四卷。又集外詩一首。其爲何人所分析。則不可考矣。

【松月集一卷】兩淮鹽政探進本。明釋睿略撰。睿略字道權。號簡菴。蘇州人。嘗以松月扁其軒。人呼爲松月翁。因以名集。前有洪武癸酉俞貞序。後載姚廣孝塔銘。稱其詩格高趣遠。絕肖唐人製作。無一點塵

俗氣。今觀其集，大致亦承九僧四靈之派，而陶冶之力，則不及古人。故邊幅淺狹，意言竝盡。五首以外，規模略同。廣孝之言，未爲篤論也。

【林公輔集二卷】編修汪如藻家藏本

明林右撰。右字公輔，臨海人。洪武中，官中書舍人，進春坊大學

士，輔導皇太孫，以事謫中都教授。是集多記序酬應之作，惟題後數則，閒及史事，亦無特識。至於故國舊君，動多詆斥，其視徐鉉撰李煜碑，但陳運數有歸者，用心之厚薄，尤相去遠矣。

【逃虛子集十一卷類彙補遺八卷】浙江范懋柱家天一閣藏本

明姚廣孝撰。廣孝，長洲人，初爲僧名

道衍，字斯道。洪武中，以僧宗泐薦，選侍燕邸。燕王謀逆，資其策力居多。篡立之後，乃使復姓，賜今名。爵至資善大夫，太子少師，封榮國公。然迄未改僧服，事蹟具明史本傳。廣孝爲高啓、北郭十友之一，所著初名獨菴集，沒後吳人合刻其詩文曰逃虛子集。後又掇拾放佚，謂之補遺。其詩清新婉約，頗存古調。然與嚴嵩、鈐山堂集同，爲儒者所羞稱，是非之公，終古不可掩也。附載道餘錄二卷，持論尤無忌憚。姑蘇志曰：姚榮國著道餘錄，專詆程朱。少師亡後，其友人張洪謂人曰：少師與我厚，今死矣，無以報之。但每見道餘錄，輒爲焚棄云云。是其書之妄謬，雖親暱者不能曲諱矣。

【光菴集二卷】兩淮馬裕家藏本

明王賓撰。賓字仲光，長洲人。博聞強記，尤精醫學，隱居奉母，以孝行

稱。少與姚廣孝相善，吳中往哲記稱廣孝既貴，歸訪賓。賓弗與見，方盥掩面而走。黃姬水貧士傳所記相同。明史廣孝傳中亦略載其事。然觀賓集有所作賑災記，稱廣孝爲少師，鋪陳功德甚至。賓沒後，廣孝爲之傳，亦極稱譽。是兩人交契終始如一。蓋流俗欲推尊賓者，造作此言，殊非事實。集凡文一卷，後附諸家

贊頌及吳中古蹟詩一卷。詩共一百三十七首。各有小序。其文務爲奇崛之語。閒傷冗贅。未能成家。詩詞亦頗傷流易。卷首記唐鉅林德暘二事。全錄舊文。而無所論斷。或賓嘗手書此二節。後人不考。誤編入集歟。

【別本東里文集二十五卷】江蘇巡撫探進本。明楊士奇撰。士奇有代言錄。已著錄。是集記二卷。序六

卷。題跋四卷。碑銘十卷。雜文三卷。末一卷題曰方外。凡爲二氏所作。悉別編焉。蓋用楊傑無爲集例。疑即懷麓堂詩話所謂士奇自定之本。以不及全集之完備。故附存其目焉。

【胡文穆集二十卷】江西巡撫探進本。明胡廣撰。廣有胡文穆雜著。已著錄。是集其裔孫張書等所刻。

凡詩八卷。應制詩文一卷。各體文七卷。題跋二卷。扈從詩及扈從北征日記一卷。其第十九卷。即所謂雜著也。朱彝尊明詩綜錄其楊白花一首。謂世傳袁景文賦此題。蓋緣讓皇遜國而作。不無故主之思。集中過顏平原文信國。余青陽祠。輒有弔古之作。其題宋思陵所書洛神賦詞意。悽惋不類。牧豬奴云云。似有意爲廣湔洗。又卷首米嘉績序。極論靖難之事。斥死節諸臣之非。而以廣之迎降爲是。然公論久定。要非可以他說解也。集中論漢高祖初入關。秦王子嬰獻傳國璽。王莽篡漢。亦從孺子嬰取傳國璽。其受傳相似。所謂天時非人力所致。又論李若水乃宋之賊。豈可以列之忠義。宋史失討賊之公云云。持論殊爲倒置。惟記高昌碑有裨史事。李元忠神道碑所載事蹟頗詳。亦足備唐史之闕耳。

【節菴集八卷續編一卷】浙江巡撫探進本。明高得暘撰。得暘字節菴。錢塘人。遷居臨安。洪武間。有司以文學薦。三爲校官。永樂初擢爲宗人府經歷。充永樂大典副總裁。是集首雜著一卷。次各體詩七卷。鄒

濟墓誌。謂其生平寡多不存。故所錄僅止於此。疑又稱得賜與修永樂大典。分掌三禮。編摩有方。今核所纂三禮諸條。於前人經說。去取尙爲精審。蓋亦博識之士。其詩文以清麗爲宗。如曲澗迴溪。瑩澈見底。而一往清激。尙少淳蓄之致。姚廣孝序。乃以江漢奔流。曲折千里。擬之。過其實矣。

【存軒集】無卷數

江蘇巡撫探進本

明趙友同撰。友同字彥如。浦江人。徙居長洲。洪武末。官華亭訓

導。永樂初。用薦授御醫。與修永樂大典。五經大全諸書。集首結銜。稱修職郎。太醫院御醫。兼文淵閣副總裁。蓋明初官制如此也。其集皆賦頌記序雜文。而無詩。共一百四十四篇。首雖標卷一。而書中實不分卷數。其文沿南宋餘習。頗爲平衍。在明初未爲作手。

【澹然集五卷】

兩江總督探進本

明陳敬宗撰。敬宗字光世。號澹然居士。慈谿人。永樂甲申進士。選庶

吉士。預修永樂大典。官至國子監祭酒。贈禮部侍郎。諡文定。事蹟具明史本傳。敬宗與李時勉同舉進士。同時爲南北祭酒。時勉立朝剛勁。而待諸生則平恕。敬宗亦立身端直。而待諸生則甚嚴。然同以德望爲士林師範。世不得而優劣之。惟文章質樸太甚。又遜於時勉耳。所著詩文集。明史藝文志作十八卷。此本乃萬歷四十四年。慈谿知縣吳門陳其柱所編。僅詩三卷。文二卷。亦非完本也。

【寅菴集三卷外集四卷附錄一卷】

兩淮馬裕家藏本

明羅肅撰。肅字汝敬。號寅菴。以字行。廬陵人。永

樂甲申進士官。至陝西巡撫。是集爲其元孫廷相所編。詩文無詭僻之習。亦無精深之致。外集四卷。皆詔敕像贊誄祭之詞。附錄一卷。爲桃林四景詩文。蓋羅氏聚族之地也。

【覺非集十卷】

浙江巡撫探進本

明羅亨信撰。亨信字用實。號樂素。東莞人。永樂甲申進士官。爲左副

都御史。亨信居諫垣。有直聲。其巡撫大同宣府。值英宗北狩。捍城有功。生平著述。每不留稿。是集乃其後人收拾散逸。而邱濬祁順爲之詮次。其中頌美中官之文。至十餘篇。編錄者略不刪汰。殊不可解也。

【西墅集十卷】浙江朱彝尊家曝書亭藏本。明曾棨撰。棨字子棨。永豐人。永樂甲申進士。第一官至少

詹事。棨文章捷敏。信筆千百言立就。劉昌懸笥瑣探。稱成祖嘗御試天馬歌。棨文先成。詞旨瀏亮。成祖賜以瑪瑙帶。其思速可見。然集中一題百首。往往才氣用事。而按切肌理。不耐推敲。是亦速成之過也。此本乃萬歷中永豐知縣德清吳期炤所選錄。雖頗爲簡汰。而菁華終鮮。鄭瑗并觀瑣言曰。曾子棨詩佳處不減崑體。曹安謫言長語亦曰。曾學士棨集。絕似唐人。殆未確焉。

【東墅詩集六卷】浙江范懋柱家天一閣藏本。明周述撰。述字崇述。東墅其別號也。吉水人。永樂甲申進士官。至左春坊左庶子。事蹟具明史本傳。述及第時與從弟孟簡同榜。成祖至比之二。蘇史亦稱其文章雅贍。然其詩不出當時臺閣之體也。

【質菴文集】無卷數。浙江汪啓淑家藏本。明章倬撰。倬字尙文。會稽人。永樂甲申進士。由庶吉士授刑部主事。官至禮部侍郎。嘗與修永樂大典。及五經四書性理大全。事蹟具明史本傳。其集本四十卷。其子瑾等所編。因倬亂散失。茲編所存不及十之二三。乃其裔孫元綸所蒐輯也。凡賦四篇。詩百餘首。文僅三篇。二篇爲記。一篇爲敍。又一篇併不標題。皆錯雜於詩中。殊無倫次。又明詩綜載倬長安雪夜歸興絕句。集中無之。則舛漏亦殊不少。末附錄祝壽詩一卷。亦非古法也。

【南齋摘藁十卷】浙江巡撫採進本。明魏驥撰。驥字仲房。號南齋。蕭山人。永樂乙酉舉人。以進士副榜

授松江訓導。召修永樂大典。擢太常寺博士。官至南京吏部尙書。諡文靖。事蹟具明史本傳。是編爲其孫增福建布政使錢塘洪鍾所編。前集四卷。兩京居官時所作。後集六卷。自景泰辛未歸田。至成化辛卯所作。蓋驥年九十八始卒。故身歷七朝。各有著述也。前有鍾序云。公爲文一本。諸性情所發。初不事雕刻。務奇巧。其彙具存。皆公親書。但其簡帙浩繁。未易徧刻。再閱原彙。凡題上有一點注者。皆公墨迹。玩其詞意。皆有益於事者也。因摘取以付諸梓。名曰摘彙。黃虞稷千頃堂書目。別載有驥前後集二十卷。蓋其未摘之全彙。今未見傳本。其存佚不可考矣。

【東岡集十卷】兩淮鹽政探進本。明柯暹撰。暹字啓暉。更字用晦。建德人。永樂乙酉領鄉薦。年僅十六。明年與修永樂大典。選入翰林。知機宜文字。進元兎詩。授戶科給事中。以三殿災。應詔陳言。謫交趾驩州知州。累遷雲南按察使。致仕歸。事蹟附見明史。鄒緝傳。是集乃暹晚年所手訂。劉定之序。稱其詩文奇崛。出人意表。今觀所作文。豪邁有餘。而落筆太快。少澀澗淳蓄之致。詩亦矢口即成。不耐咀詠。是亦登科太早。才高學淺之效歟。

【石潭存彙二卷】兩江總督探進本。明劉髦撰。髦有易傳撮要。已著錄。是編上卷爲詩。中卷即易傳撮要。下卷爲義方錄。義方錄者。皆寄其子定之之手札。而定之彙粹成編者也。

【若金集二卷】江西巡撫探進本。明彭百鍊撰。百鍊字若金。泰和人。永樂乙未進士。官至廣西道監察御史。是編前有任敬敏序。稱遺文分爲十四卷。而是編僅二卷。文三十九首。詩四首。後附他人所爲碑誌題詠而已。考其族孫敏求跋。蓋散佚之餘。後復重鈔成帙也。

【歲寒集二卷】浙江汪啓淑家藏本。明孫瑀撰。瑀字原貞，以字行。德興人。永樂乙未進士。官至兵部尚書。是編乃其孫孚吉等所編。凡文一卷，詩一卷。前有李東陽序，稱其詩平正通達，無鉤棘險怪之態。今觀諸作，大抵純任自然，不事結構。韓愈所謂此詩有何好有何惡也。

【芳洲集十卷】江西巡撫採進本。明陳循撰。循字德遵，泰和人。永樂乙未進士第一。官至戶部尚書。華蓋殿大學士。英宗復辟，謫戍鐵嶺。石亨敗後，循上疏自訟，詔放還。事蹟具明史本傳。是編其裔孫以躍所輯附錄一卷，則諭祭文、誌銘、祭文、輓詩、乞恩復官疏及祀鄉賢文移、首列奏對，而無章疏。其自訟疏本傳尙載其略，乃削而不存，未喻何故。殆久而佚其稟耶。

【東行百詠集句九卷附芳洲年譜一卷】浙江汪汝璫家藏本。明陳循撰。是編乃其被謫東行時集古人詩句以成七絕，初得三百首，復疊和其韻至千餘首。集句皆不著姓名，頗多竄易牽就和韻諸作，更多累句。後附年譜一卷，乃其門人王翔所錄。當時敕諭及循所進詩頌俱載入其中，亦非體例也。

【襪線集十五卷】江西巡撫採進本。明蕭儀撰。儀字德容，樂安人。永樂乙未進士。官吏部主事。以疏論遷都北京不便，忤旨見殺。明史附見。夏元吉傳中是集乃其子超進所編。據其原目，凡文十卷，詩十卷。此本僅十五卷，蓋詩佚其五卷矣。其文有紆徐曲折之致，而意境不深。其詩爲朱彝尊明詩綜所不錄，殆偶未見歟。

【半隱集十卷】浙江汪汝璫家藏本。明陳衡撰。衡字克平，淳安人。永樂丁酉舉人。官亳州學正。是集序四卷，記一卷，說一卷，詩四卷。附雜文於後，末有其甥方漢所撰行狀。詩文皆不入格。於明初諸人爲未能

方軌竝驚也。

【石溪文集七卷附錄一卷】江西巡撫採進本。明周敘撰。敘字功敘。吉水人。永樂戊戌進士。官至南京翰林院侍講學士。事蹟具明史本傳。是編詩三卷。賦頌詞一卷。文三卷。又以誥敕誌傳爲附錄一卷。史稱敘初選庶吉士。作黃鸚鵡賦。稱旨。得授編修。今觀所作。雖有春容宏敞之氣。而不免失之膚廓。蓋臺閣一派。至是漸成矣。其集編次無法。至以五言六句。別標一體。區之古詩之外。而五言長律。反入於古詩之中。殊乖體例。

【尋樂文集二十卷】江西巡撫採進本。明習經撰。經字嘉言。號寅清居士。晚自號尋樂翁。新喻人。永樂戊戌進士。官至詹事府詹事。經於成祖時。亦以試黃鸚鵡賦。稱旨。擢授編修。其賦今在集中。又有皇都大一統賦。朱彝尊撰。日下舊聞。未經收入。蓋未見此集也。集爲其子興化府同知襄所編。其文結構頗有法。而意境太狹。往往失於枯寂。未可云似淡而腴。詩則七言長句。清婉頗似東陽。而他體未能悉稱也。

【松臞集二十八卷】江西巡撫採進本。明曾鶴齡撰。鶴齡字延年。一字延之。泰和人。永樂辛丑進士。第一官。至侍講學士。詩多牽率之作。命意不深。而措詞結局。往往爲韻所窘。殆非所擅長。文則說理明暢。次序有法。大抵規撫歐陽。頗近王直抑菴集。而沈著則不及也。直爲作墓誌於其文章。亦無所稱譽云。

【河汾詩集八卷】浙江汪汝璉家藏本。明薛瑄撰。瑄有讀書錄。已著錄。是集第一卷。載賦五篇。餘皆古今體詩。其孫禕於成化間。裒拾遺藁而成。門人閻禹錫爲之序。今考所載詩賦。皆已編入全集中。此猶其初出別行之本也。

【嘯臺集二十卷木天清氣集十四卷】浙江汪汝璫家藏本。明高棟撰。棟一名廷禮，字彥恢，號漫士，福建長樂人。永樂間，自布衣徵爲翰林待詔，陸典籍。明史文苑傳附見。林鴻傳中閩中十子之一也。其山居時所作名嘯臺集，入京後所作名木天清氣集。棟嘗選唐詩品彙，專主唐音，實與閩縣林鴻共開首安一派。沿習既久，學者剽竊形似，日益膚廓，併剽始者受詬厲焉。今觀嘯臺集詩八百首，尙稍見風骨。至木天清氣集六百六十餘首，大率應酬冗長之作，清氣之云，殆名不副實。其初與林鴻齊名，日久論定，鴻集尙見傳錄，而棟集幾於覆瓿，蓋亦有由矣。

【道山集六卷】浙江汪汝璫家藏本。明鄭棠撰。棠字叔美，浦陽人。永樂中官翰林院檢討，是集編次猥雜。第一卷爲賦，二卷爲辭頌銘贊，四言五言古體詩，歌行樂府，七言絕句，填詞，而附以論二篇，三卷爲記序，而附以五七言律詩，五言絕句，後又附以雜文，殊漫無體例。卷四爲經筵講義，卷五卷六爲元史評，以雜著附入，則固唐以來例也。棠以文章選入翰林，由典籍至檢討，而於詩殊不擅長。朱彝尊作明詩綜，不登一字，蓋非疎漏矣。

【恆軒集六卷】浙江汪啓淑家藏本。明韓經撰。經字本常，山陰人。宋太尉琦之十二世孫，以行誼稱於鄉里，屢徵不出。家居教授以終，是集爲其子監察御史陽所編。凡古體詩二卷，近體詩四卷，語多質直，主於抒寫己意而止，非屑屑以文字求工者也。

【西澗文集十六卷】浙江巡撫探進本。明熊直撰。直字敬方，吉水人。永樂中舉人，以子槩貴，贈右都御史。是集詩二卷，文十四卷，有宣德五年楊士奇序，稱蘇明允父子一時皆有文名，而明允老成歸然，時號

老蘇其官位竟不顯。暨子貴乃進身後之命。敬方亦今之明允乎。今觀其文。視明初宋濂王禕去之尙遠。似未容上擬眉山也。

【鳳鳴後集十卷】浙江汪汝璵家藏本。明鄭楷選。楷字叔度。浦陽人。官蜀府左長史。是集第一卷中載近體詩數首。餘皆雜文。前後無序跋。其曰後集。當尙有前集也。朱彝尊明詩綜載義門鄭氏有梃杖榦桐四人。而不及楷。今觀其謝銀鈔箋中。稱家長兄榦。則楷爲榦弟。殆因不以詩名。故彝尊佚之。抑或偶未之見耶。

【貫珠編貝集五卷】兩淮鹽政採進本。明沈行撰。行字履德。錢塘人。是編前有魏驥序。則當在永樂宣德間也。是編皆集句之詩。兼取唐宋元人之作。貫珠言其聲之和。編貝言其材之富。然牽強湊合。在所不免。視後來香屑集之類。其工巧自然。百不及一矣。

【敵帚集二卷】江蘇巡撫採進本。明陳益撰。益字啓行。自號行素。高安人。永樂間以五經教授於其鄉。至景泰甲戌始卒。是集乃宏治乙未。其子揚所刊。後燬於火。萬歷中。其裔孫德又重刊之。所載皆古今體詩。雜文僅寥寥數篇。其意境頗清。而歉於深厚。文亦如之。末以同時諸人哀輓之作。別爲一卷。附於集末。則皆德所哀集也。

【草窻集一卷】浙江范懋柱家天一閣藏本。明劉溥撰。溥字原博。草窻其別號也。長洲人。宣德初授惠民局副使。後調太醫院吏目。事蹟具明史文苑傳。史稱溥恥以醫自名。日以吟詠爲事。其詩初擬西崑。晚更奇縱。與湯允勣蘇平蘇正沈愚王淮晏鐸鄒亮蔣忠王貞慶等稱景泰十才子。而溥爲之首。今九人之

集皆未見。惟溥集存。溥際土木之變。忠憤悱惻之意。時見於詩。亦頗有足取者。故朱彝尊靜志居詩話。謂其在彼法中。猶爲差勝。然溥嘗語客云。不讀二萬卷書。看溥詩不得。則虛僑太甚矣。宋人云。不讀萬卷書。不行萬里路。看杜詩不得。溥乃更加一倍乎。

【廖恭敏佚稟一卷附錄一卷】江西巡撫探進本 明廖莊撰。莊字安止。號東山。吉水人。宣德庚戌進士。

官至刑部左侍郎。諡恭敏。事蹟具明史本傳。莊爲給事中時。嘗劾輔臣楊士奇。繼子稷。恃勢稔惡。事下獄。士奇固良相。而溺愛其子。庇之實甚。當其權位嚴重之日。已爲言人所不敢言。景泰中。疏請同羣臣朝見上皇於南宮。又言皇姪猶子也。宜令親儒臣誦經書。以繫人心。回天意。疏上。廷杖貶官。定羌驛丞。常新故嫌疑之際。尤爲言人所難言。其勁節孤忠。足以震動一世。而文章則非所專門。所著有東山居士集。日久散佚。惟自序尙存。千頃堂書目。則載莊漁梁集二卷。今亦惟存其自序。是兩集皆亡。黃虞稷特據所徵各家書目載之耳。此本爲莊裔孫仲蔚及其里人李日東所輯。僅奏疏五篇。其大要已見於本傳。雜文二十篇。詩五首。則又草草應酬之作。莊固不必藉是以傳。附錄一卷。皆祭文碑誌之屬。莊亦不必藉是爲重也。

【澹軒集七卷】浙江巡撫探進本 明馬愉撰。愉字性和。臨朐人。宣德丁未進士。第一。正統五年。以侍講學士入直文淵閣。官至禮部右侍郎。事蹟附見明史。楊溥傳。愉沒後。詩文散佚。成化庚子。山東參政邢居正。命青州知府劉時勉。哀集遺亡而刊之。凡詩賦四卷。雜文三卷。第六卷。又有歌詩錯雜。其中蓋隨得隨編。故先後無序。詩多酬應之作。或佳者多佚耶。然史稱愉端重簡默。門無私謁。論事務寬厚。又載其清理滯獄及善處蕃使二事。絕不稱及其著作。蓋不以文采見也。

【別本澹軒集八卷】兩淮鹽政探進本。明馬愉撰。愉集散佚之後。其鄉人都御史遲翔鳳購得殘本。更於愉家掇拾逸作。補葺刻之。故題曰續刻。目中註續刻字者。皆翔鳳所增也。

【尚約居士集】無卷數。江西巡撫探進本。明蕭鑑撰。鑑字孟勤。泰和人。宣德丁未進士。官至戶部尚書。文淵閣大學士。兼翰林院學士。事蹟附見明史。陳循傳。案鑑爲蕭鵬舉之子。鵬舉學詩於劉崧。鑑不墜其家法。史稱其學問該博。文章爾雅。其門人邱濬序稱其文正大。光明不爲浮誕奇崛。蓋洪宣間臺閣之體。大率如是也。

【淡軒臺】十一卷。補遺一卷。福建巡撫探進本。明林文撰。文字恆簡。莆田人。宣德庚戌進士。官至太常寺少卿。兼翰林院學士。謚襄敏。是集詩三卷。文七卷。其十一十二兩卷。乃附錄誥敕及行狀神道碑。補遺一卷。則又其詩文雜著。凡有二本。初刻者爲其孫岳州同知希範。重刻者爲其曾孫南京大理寺寺正炳章。此本即炳章所校也。

【吳竹坡文集五卷詩集二十八卷】江西巡撫探進本。明吳節撰。節字與儉。竹坡其號也。安成人。宣德庚戌進士。官至太常寺卿。兼侍讀學士。是集爲其七世孫琦所刊。後附彭華所作行狀。稱其爲文章援筆即就多至數千言。滔滔不竭。無刻苦艱窘態。於詩五七言古今體。隨題命意。開合起伏。不拘拘摹擬。而自合矩度。云云。今觀其詩文。皆直抒胸臆。縱筆所如。無不自達之意。華所論頗得其真。而淳蓄深厚。亦遂不及古人所謂不踐迹亦不入室者歟。

【雲川文集六卷附恭愍遺文一卷】江西巡撫探進本。明鍾復撰。復字彥彰。雲川其號也。永豐人。宣德

癸丑進士官至翰林院侍講其詩文不出當時臺閣之體末附其子同遺文四篇一曰直言安國疏二曰送叔祖士傑之任序三曰送伯氏世楨南歸序四曰友蘭軒詩跋同字世京號待時景泰辛未進士官至貴州道監察御史以疏爭建儲下詔獄一時獻媚求榮者欲借以傾動英宗鍛鍊炮烙備極慘毒而同義不負故主卒無一語連南內竟拷斃於獄天下悲之事蹟具明史本傳卷末又附墓誌一篇章綸爲撰文廖莊爲書丹皆與同時建言受禍幸而未死者也誌稱同在獄所作詩文彙綸藏於枕畔爲獄卒竊去故所存止此忠臣著作理宜甄錄以寥寥不成卷帙故附存其目於此示表章焉

【松岡集十一卷】浙江汪汝璥家藏本 明姜洪撰洪字啓洪號松岡江西樂安人宣德癸丑進士改庶吉士除檢討陞修撰以疾乞歸是集序二卷記一卷歌詩二卷賦頌銘贊表一卷近體詩五卷文頗平淡詩亦妥適而步趨東里得其形似格律未能適上也

【畏菴集十卷】兩淮馬裕家藏本 明周旋撰旋字中規別號畏菴永嘉人正統丙辰進士第一官至左春坊左庶子是集凡詩賦五卷雜文五卷樂清章綸爲之序稱其典雅閒淡然在當時猶馳驅於流輩之中未能自闢蹊徑

【桐山詩集十卷】浙江汪汝璥家藏本 明王偉撰偉字士英攸縣人正統丙辰進士官至兵部侍郎事蹟附見明史于謙傳偉所著有詩學正蒙久已散佚其桐山文集繁昌吳琛序刻之今亦未見此集凡詩九卷又以偉引疾告歸疏及贈行之作爲附錄一卷乃其弟傑所錄其子添楨所重刊也史稱偉喜任智術旣爲于謙所引恐人目己爲朋附乃密奏謙短冀以自異然卒以謙黨罷官蓋反覆不常之士又稱其

年十四隨父戍宣府。宣宗巡邊，獻安邊頌，得補安州學生。則亦雋才。然詩多率意，酬應乏研鍊之功。蓋才士之文，往往如斯矣。

【呆齋集四十五卷】浙江巡撫探進本。明劉定之撰。定之有易經圖釋，已著錄。是集前稟十六卷，存稟二十四卷，皆分類編錄。如代祀錄、永新人物錄、經筵講章策略，皆在其中。而鄉會三場試卷，亦皆附列。續稟五卷，則成化乙酉以後所作，不復分類，以一歲爲一卷焉。明史本傳稱定之以文學名，一時嘗有中旨命製元宵詩，內使卻立以俟。據案伸紙，立成絕句百首。又嘗一日草九制，筆不停書。有質宋人名字者，就列其世次，若譜系然。人服其敏博。然其榛槁勿翦，亦由於此。李東陽懷麓堂詩話曰：劉文安公不甚喜爲詩，縱其學力，往往有出語奇崛，用事精當者。如英廟輓歌、石鍾山歌等篇，皆可傳誦。讀者擇而觀之可也。其言可謂婉而章矣。

【完菴詩集一卷】江蘇巡撫探進本。不著撰人名氏。惟篇首有吳寬序，稱完菴先生。劉公少爲刑部屬，出僉山西按察司事，居三載，棄官歸吳中，所與倡和者武功徐公、參政祝公及隱士沈石田數人。考江南通志人物文苑類中，載劉珏字廷美，長洲人。正統三年舉人，官至山西按察司僉事，老而好學，工於唐律。時人稱爲劉八句。所敘仕履與寬序合。又藝文類中載完菴詩集，長洲劉珏撰，與書名亦合。則此集蓋珏所作。然其詩有亮節而乏微情，不能如志所稱也。

【劉文介公集三十卷】兩淮鹽政探進本。明劉儼撰。儼字宣化，吉水人。正統壬戌進士第一，累官太常寺少卿，春坊大學士、掌院事。明史附見周敘傳，稱其景泰中典順天鄉試，力持公道。黜大學士陳循、王文

之子。幾得危禍。蓋剛正不撓之士也。是集策表講章一卷。記四卷。序十四卷。雜著六卷。五七言古今體詩五卷。尙沿臺閣舊體。無疵累之可摘。亦無精華之可挹。

【姚文敏集八卷】浙江汪汝璫家藏本。明姚夔撰。夔字大章。桐廬人。正統壬戌進士。官至吏部尙書。諡文敏。事蹟具明史本傳。是集本名蠡蠹堆。後其子璽刊版。改題此名。夔一代名臣。風裁嶽嶽。不愧古人。而詩文乃直抒胸臆。不中繩度。如寄弟詩云。嫩韭蒸來香滿口。一滄午膳倍尋常。太不以詞藻爲工矣。此所謂人各有能有不能也。

【蘭軒集四卷】浙江汪汝璫家藏本。明沈彬撰。彬字原質。武康人。正統壬戌進士。官至刑部郎中。其居官以強幹著。不以詩文自鳴。遺藁亦多散佚。沒後百有餘年。至隆慶己巳。其鄉人周維新始序而刻之。以墓誌墓表諸篇附於後。

【靜軒集十三卷】浙江汪汝璫家藏本。明陳宜撰。宜字公宜。靜軒其號也。泰和人。正統壬戌進士。官至兵部侍郎。路壁所作宜小傳。稱有金臺集。金陵集。滇南集。金臺晚集存於家。此本其季子佩所編錄。累朝誥敕家譜序與搢紳投贈之作。共爲七卷。冠於前。併以爲佩而作者。附載卷內。自第八卷以後。始爲宜所著詩文。編次殊無體例。

【商文毅公集十卷】浙江巡撫探進本。一名素菴集。明商輅撰。輅有商文毅疏藁略。已著錄。是編爲萬歷中淳安知縣漢陽劉體元所編。凡文九卷。詩一卷。多館閣應酬之作。不出當時擘綬之體。

【慕竹堂藁八卷】兩淮鹽政探進本。明葉盛撰。盛有葉文莊奏議。已著錄。是集乃盛所自訂。凡詩詞四

卷文四卷詩詞皆非所長。文有勁直之氣，稍勝於詩。然亦無傑構，惟碑誌諸篇，尙頗整飭有法耳。

【卞郎中詩集七卷】浙江汪汝璫家藏本。

明卞榮撰。榮字華伯，江陰人。正統乙丑進士，官至戶部郎中。

榮在景泰間，盛有詩名。居郎署二十年，朝騎甫歸，持牘乞詩者擁塞戶限。日應百篇，湯沐公餘，日錄盛稱其狀元。自是渴睡漢，宰相須用讀書人，一聯以爲雖有翦裁，渾無痕迹。蓋亦傷才。然所作大半皆酬贈哀輓之章，亦多淺率。蓋得之太易也。是集爲其門人無錫吳鍵所刊，附以雜文十餘首，亦非所長。李東陽懷麓堂詩話曰：詩在卷冊中易看，入集便難看。古人詩集，非大家數，除選出者，鮮有可觀。卞戶部華伯在景泰間，盛有詩名，對客揮翰，敏捷無比。近刻爲全集，殆不逮所聞。是當時已有公論矣。

【白沙詩教解十卷附詩教外傳五卷】安徽巡撫探進本。

明陳獻章撰。

湛若水註。獻章有白沙集，若水

有二禮經傳測，皆已著錄。白沙詩教凡一百六十六篇，皆闡發性理之作。詩教外傳則皆獻章語錄之類。足與詩相發明者。若水以類排纂，各爲之標目。獻章於詩家爲別調，不妨存備一格。若水務尊師說，必以爲風雅正宗。至別撰此書以行，言之似乎成理，而實則不然。王士禎居易錄曰：如欲講學，何不竟作語錄，可謂要言不煩矣。

【彭文憲集四卷】江西巡撫探進本。

明彭時撰。時有可齋雜記，已著錄。其集原本十卷，歲久散佚。此本

乃其六世從孫篤福所刊，掇拾殘賸，取盈卷帙，不足見所長矣。

【劉古直集十六卷】浙江汪汝璫家藏本。

明劉翊撰。翊字叔溫，號古直，壽光人。正統戊辰進士，官至戶

部尙書。謹身殿大學士，謚文和。事蹟具明史本傳。是集乃其子太常寺卿鈞所編。凡詩五卷，文十一卷，志

表祭文附於末。珣當萬安劉吉等朋比亂政之時。頗能持正。故本傳稱安貪狡。吉陰刻。珣爲稍優。顧喜談論。人目爲狂躁。又萬安傳稱在內閣者劉吉劉珣。安爲首輔。與南人相黨。附珣與尙書尹旻王越。又以北人爲黨。互相傾軋。然珣疎淺。而安深鷲。故珣卒不能勝。則珣亦一客氣用事。輕率不檢者耳。朱彝尊明詩綜。謂其詩率意塗寫。不事剪裁。蓋肖其爲人也。彝尊又引李東陽語。謂公於詩興之所到。筆不能閣。而無毫髮點綴。呻吟之病云云。考東陽序中無此語。其語乃在王承裕序中。考此本二序皆五頁。版心號數相同。裝緝者互易其末頁。彝尊以仁裕語爲東陽語。知所見之本。二序亦互易末頁矣。

【王端毅文集九卷】江蘇巡撫採進本。明王恕撰。恕有玩易意見。已著錄。是集乃嘉靖壬子。祥符李濂所編。前六卷爲文集。平實淺顯。無所雕飾。如其爲人。喬世寧序稱當時以爲其文無假英藻。而質厚有餘。不務以閎辨。而歸準於躬行。又最稱其答劉太保書。第七卷即玩易意見。八卷曰石渠意見。九卷曰意見拾遺。皆說經之語。各有別本。單行。濂用李石方舟集例。又編入集中也。

【鳴秋集二卷】兩淮鹽政採進本。明趙迪撰。迪字景哲。懷安人。自號白湖小隱。朱彝尊靜志居詩話。謂余憲百家詩。以迪爲山人。徐庸湖海耆英集。載其元夕應制詩。徐泰明風雅。則云迪宜陽人。官吏部侍郎。然鳴秋集。有景泰五年迪仲子壯後序。中云先人值時多故。投老林泉。而同時閩人。均有輓鳴秋山人詩。則二徐所云。自是別一人矣。是集即其仲子壯所編。前載林志序。稱其古詩不下魏晉。而諸作則醇乎唐。今考其詩。古體頗爲薄弱。誌說殊誣。律詩諸暢。差有唐音。然亦晉安一派也。

【王文肅集十一卷】浙江孫仰曾家藏本。明王慎撰。慎有毘陵志。已著錄。此集亦名思軒稟。卷首載李

東陽所作傳。謂其官吏部尙書時。上疏陳八事。多見採納。今其疏不見集中。止存經筵進講文華進講二卷。殆有所避。而不載歟。抑東陽溢美也。

【王太傅集二卷】浙江汪汝璫家藏本。明王越撰。越字世昌。濬縣人。景泰辛未進士。官至兵部尙書。以功封威寧伯。諡襄敏。此集稱王太傅者。其贈官也。考明史。越本傳。功名頗有可觀。惟以前結汪直。後依李廣。爲士論所輕。是集分體編輯。附錄雜文。前有嘉靖九年吳江吳洪序。稱其遺藁散佚不傳。有郢人高德崇。錄所見聞。刻之於學舍。乃行於世。後越曾孫紹思。別輯全集。其跋中所稱在楚。有太傅詩文集者。即此本也。

【王襄敏集二卷續集一卷】浙江汪汝璫家藏本。明王越撰。是編即其曾孫紹思所輯。第一卷爲疏議。皆處置邊務。及奏報捷音。第二卷爲雜文。續集一卷爲詩及詩餘。而以李東陽所作墓誌。崔銑所作神道碑。附錄於末。越本魁傑之才。其詩文有河朔激壯之音。而往往傷於粗率。

【野菴文集十卷】江西巡撫採進本。明吳宣撰。宣字師尼。野菴其別號也。崇仁人。景泰癸酉舉人。授左軍督府經歷。坐劾長官不法。繫獄十年。始得釋。改中府陞鎮遠府知府。道病卒。其文落落有氣。而格律未嚴。是集乃其門人王君謨等所編。未經刊行。其元孫道南。復訂正藏於家。前有道南自述顛末一篇。

【奉使錄二卷】兩江總督採進本。明張寧撰。寧有方洲集。已著錄。是集乃寧天順四年。出使朝鮮所作。已編入方洲集內。此其初出別行之本也。上卷首敘奉使召對。及奏稟數篇。餘皆途中留題之作。下卷則至朝鮮以後篇什。題曰皇華集。註云。朝鮮刻本。前有崔恆序。乃奉國王李瑒命。編次而序之者也。朱彝尊

靜志居詩話載寧兩使朝鮮水館星郵留題殆遍館伴朴元亨詩篇唱和殊不相下及偕登太平館樓寧成七律六十韻元亨誦至溪流殘白春前雪柳折新黃夜半風之句乃閣筆曰不敢屬和矣然其詩從調騁情才思雖捷而少沈思故王世貞謂寧詩如小權急流一瞬而過無復雅觀也

【彭文思集六卷】江西巡撫探進本 明彭華撰華字彥實安福人景泰甲戌進士官至吏部侍郎入內閣逾年以風疾去卒諡文思事蹟附見明史萬安傳所著有素菴集九卷李東陽序稱其文嚴整峭潔力追古作者今未見傳本此本爲其六世孫篤福所編視原集僅十之三矣

【恥菴集十卷】浙江汪汝璪家藏本 明陳煒撰煒字文曜別號恥菴閩縣人天順庚辰進士官至浙江左布政使煒風裁峻整爲御史時劾罷錦衣指揮門達在江西平反疑獄爲民興利除弊具有實績詩文非所注意是集乃正德初其從子墀爲東莞知縣時所刊嘉靖中其孫全之復補輯之而以贊輓諸詩附於其末

【禮庭吟二卷】衍聖公孔昭煥家藏本 明孔承慶撰承慶字永祚曲阜人至聖六十代孫也年三十一未及襲封而卒其外祖王惟善爲哀其遺詩以成此集有景泰閒同郡許彬序又有天順丁丑長洲劉鉉序歲久散佚康熙庚辰衍聖公孔毓圻檢校先世遺藁又得而重刊之

【耕石齋石田集九卷】兩江總督探進本 明沈周撰周有石田雜記已著錄是集乃瞿式耜所刪定凡詩八卷文一卷其詩與華汝德本互有出入文則華本所未收然周詩猶以天趣勝文則更非所長徒爲贅疣矣

【桂坡集十五卷】浙江汪汝璫家藏本。明左贊撰。贊字時翊，南城人。天順丁丑進士。官至廣東布政使。是編凡前集五卷，後集八卷，皆詩賦雜文，而以所作方外諸篇別爲一卷，附於末。蓋用楊傑無爲集例。至於樂府一卷之中，如關山月、楊白華之類，皆古題，而忽以詞曲續其後，則從來無此體例。殆以宋人詞曲亦標樂府之名，故合爲一。不知源流遞變，格律各殊，不可以宋之樂府，竟當古樂府也。贊嘗刪定李觀集，蓋亦頗留心詩古文者。然所作質朴而不能健，清淺而不能腴，其於古格，僅僅具體云爾。

【別本彭惠安公文集七卷附錄一卷】兩江總督探進本。明彭韶撰。韶有政訓，已著錄。所著詩文，名從吾滯，藁已散佚不存。是集乃御史陳時周所重編，已多所刊削，非盡精要。附錄一卷，則楊守陳、陳獻章等贈言及府志傳論也。

【餘力藁十二卷】副都御史黃登賢家藏本。明徐貫撰。貫字元一，淳安人。天順丁丑進士。官至工部尙書。諡康懿。是集乃貫所自定。前有宏治己未自序。其子頤初刊於舒城，間有遺佚。嘉靖壬子，其次子健，倅歸州時，復增訂梓行。詩文皆平實，然大半應酬之作也。

【栗菴遺藁二卷】浙江汪汝璫家藏本。明鄭環撰。環字瑤夫，號栗菴，仁和人。天順庚辰進士。官至太常寺少卿。是集有其子孟繩跋。稱環集本十卷，不戒於火。茲集乃其搜輯另編者。楊守陳作環墓碑，稱其文章典雅贍密。今此本所存無多，體亦不備，不足以見其全。守陳所論難遽定其確否也。

【東白集二十四卷】浙江孫仰曾家藏本。明張元禎撰。元禎五歲能詩。寧靖王召見，名之曰元徵。巡撫韓雍爲改今名。字廷祥，南昌人。天順庚辰進士。官至吏部左侍郎，兼翰林院學士，掌詹事府。天啓初，追諡

文裕事蹟具明史本傳。是集凡詩文二十三卷。末卷則附錄事實祭文。元禎以講學爲事。其在講筵。請增講太極圖西銘通書。夫帝王之學與儒者異。詎可舍治亂興亡之戒。而談理氣之本原。史稱後輩姍笑其迂闊。殆非無因矣。其詩文樸遯無華。亦刻意摹擬宋儒。得其形似也。

【定菴集五卷】兩淮鹽政採進本

明張悅撰。悅字時敏。華亭人。天順庚辰進士。官至南京兵部尙書。諡莊簡。事蹟具明史本傳。是集凡詩一卷。文四卷。大抵流易有餘。而頗乏雋永之味。

【巽川集十六卷附錄二卷】浙江孫仰曾家藏本

明祁順撰。順字致和。巽川其號也。東莞人。天順庚辰進士。官至江西左布政使。其集前載有韻之文。次爲詩詞。次爲散體。末附張元正所作墓誌。賈宏所作墓表。各爲一卷。

【東園詩集續編八卷】浙江范懋柱家天一閣藏本

明鄭紀撰。紀有東園文集。已著錄。是編其詩集也。初紀子主一。主敬嘗編其詩爲十二卷。今未見傳本。此本乃其少子忠。蒐輯遺篇。故題曰續集。集中如古塹斜連江樹沒。飢鳥恆傍野人飛。橋頭雨歇徑初溜。天際雲收山漸多等句。亦頗有南宋風格。然亦止於如此耳。

【東瀧遺藁四卷】江西巡撫採進本

明彭敷撰。敷字敷五。號東瀧。吉水人。天順甲申進士第一。官至翰林院侍講。集中詩文類多應酬之作。李東陽序云。敷五年僅四十餘。編摩考校之外。無由自試。而文又不盡其蘊。蓋亦微詞也。

【閔莊懿集八卷】浙江巡撫採進本

明閔珪撰。珪字朝英。烏程人。天順甲申進士。官至南京刑部尙書。

左都御史事蹟具明史本傳是編乃其詩集集中七言律詩多至六卷大抵皆酬贈之作蓋珪老成持重治獄平允爲當代名臣後以不阿劉瑾告歸其立身自有本末吟咏則非所留意云

【桃溪淨稟八十四卷】江蘇巡撫採進本 明謝鐸撰鐸有赤城論諫錄已著錄是集凡詩四十五卷文三十九卷蓋李東陽因其舊本再取而芟之故以桃溪淨稟爲名然瑕瑜參半猶不能悉爲刊除也

【滄洲集十卷續集二卷】浙江汪汝璣家藏本 明張泰撰泰字亨父太倉人天順甲申進士官至翰林院修撰事蹟具明史文苑傳泰爲人恬淡獨喜爲詩初與李東陽齊名後東陽久持文柄所學彌老彌深而泰不幸早終未及成就故聲華銷歇世不復稱今觀是集大抵圓轉流便而短於含蓄正如清水半灣洸洸易盡視東陽懷麓堂集實相去逕庭故東陽作序亦云將極於古人而不意其遽止云

【西山類彙五卷】兩淮馬裕家藏本 明謝復撰復字一陽祁門人少從吳與弼游與陳獻章爲同門友而篤實勝於獻章故集中有書獻章詩後一篇頗詆其晚涉於佛老其宗旨可見然其詩文則不出講學之門徑與談藝家又別論云

【陳剩夫集四卷】福建巡撫採進本 明陳真晟撰真晟字晦德改字剩夫又自號曰布衣家本泉州以父隸鎮海衛戍籍遂爲漳州人天順中嘗詣闕上書獻所撰程朱正學纂要兼上書執政均不見收又上書當路獻所撰正教正考會通亦不見省而罷又作學校正教文廟配享疏擬詣闕再上未及行而卒事蹟具明史儒林傳是集乃真晟卒後其鄉人林祺所編康熙己丑儀封張伯行官福建巡撫乃爲序而刻之所獻二書今皆載集中其程朱正學纂要首爲程氏學制次爲推明朱子兼補之法次爲心學圖說其

圖凡二。一爲六十四卦圓圖。圖下大書一心字。一爲太極圖。圖下亦大書心字。次爲立師說補正。學輔皇儲。隆教本振風教五條。其正教正考會要。首列朱子學校貢舉私議。次敕諭大略。次程氏學制。次呂氏鄉約。次德業過違二條。次立師考德考文三條。大意以爲天下之事。莫大乎此。故次卷載所上當路書曰。朱子抱哭其書四百年矣。曾無一人憐而省之者。此魏鶴山真西山許魯齋吳草廬諸儒。不能無大罪也。既讀其書。宗其道。則實吾師也。父也。豈有視父師之哭。而弟子能愬然耶。又謂宋元兩朝。皆以不用程朱之學。故上干天怒。奪其命。以與明持論頗僻。又題玉堂賞花集後。詆譏執政。謂不賞其程朱纂要。而羣聚賞花。後世不免謂之俗相。尤爲褊激。林雍作真晟行實。稱其既無所遇。每四顧徬徨。不能自釋。亦異乎尋孔顏之樂者矣。

【履坦幽懷集二卷】編修祝德麟家藏本 明祝淇撰。淇字汝淵。號夢窻。海寧人。以子萃貴。封刑部主事。明詩綜作祝祺。云或作淇。此本乃其家刻。明作淇字。則詩綜誤也。是集爲餘姚胡培所編。凡文一卷。詩一卷。

【思元集十六卷】浙江汪啓淑家藏本 明桑悅撰。悅有桑子庸言。已著錄。是編賦一卷。文八卷。詩六卷。詩餘一卷。附刻一卷。則悅之志傳也。史稱悅爲人怪妄。敢爲大言。以欺人。朱彝尊靜志居詩話。稱悅在長沙。著庸言自詡。窮究天人之際。非儒者所知。又自稱其詩根於太極。則史所云怪妄不虛也。所作兩都賦。有名於時。然去班固張衡。實不可道里計。而誇誕如是。淺之乎其爲人矣。

【涑水集二卷】兩淮鹽政探進本 明文洪撰。洪字功大。號希素。長洲人。成化乙酉舉人。官涑水縣教諭。

故以名集。洪爲待詔徵明之祖。故朱彝尊靜志居詩話云。長洲文氏世載其德。希素先生實始之。詩饒有恬淡之致。是集案洪自序。稱檢前後所作。汰之得百篇。蓋所自編。然此本末附遺文七篇。則後來又有增入。非手定之舊藁矣。

【龍臯文集十九卷】浙江孫仰曾家藏本。明陸簡撰。簡字伯廉。號治齋。龍臯其別號也。武進人。成化丙戌進士。官至詹事府少詹事。是集有文無詩。冠以日講直解。及經筵講章。李東陽爲撰墓誌。稱其文縝密。峻潔。力追古作。而不輕應接。有求之經歲而不得者。又云所著已累百數十卷。今所存者僅若此。則知其佚者多也。其文義蘊未深。而平正樸實。於長沙一派爲近。蓋何李未出之前。文格大率如是也。

【東海文集五卷】兩江總督採進本。明張弼撰。弼字汝弼。華亭人。成化丙戌進士。官至南安府知府。事蹟具明史文苑傳。是集前四卷皆雜文。後一卷皆附錄弼字汝弼華亭人成化丙戌進士官至南安府知府事。卷則其文原與詩合刻。此本偶佚其半也。弼工草書。爲世所重。其文則直抒胸臆。不事鍛鍊。李東陽懷麓堂詩話載弼自評其書不如詩。詩不如文。以爲英雄斯人之語。誠篤論云。

【東臯文集十三卷附錄一卷】浙江巡撫採進本。明陸淵之撰。淵之字克深。上虞人。成化丙戌進士。官至河南布政使。是集爲其門人王汝鄰所刻。前有其門人劉瑞序曰。讀先生之文者。知其大可也。乃若較聲律。評矩矱。區區於文字家者。亦淺之乎。知先生矣。殆微詞歟。

【張文僖公文集十四卷詩集二十二卷】浙江巡撫採進本。明張昇撰。昇字啓昭。南城人。成化己丑進士。第一官至禮部尙書。事蹟具明史本傳。是編乃其子浙江布政使元錫所刊。前有嘉靖元年邵寶序。謂

此書本名柏崖集。刻成而賜諡之命適至。遂以名之。然本傳不言有諡。或偶漏歟。昇立朝頗著風節。而其文多應酬之作。末附瀛涯勝覽及北行錄西行錄。皆縷述見聞。無所考證。詩則近體多於古體。而七言近體尤多於五言。是足驗其所得矣。

【使東日錄一卷】浙江巡撫探進本。明董越撰。越有朝鮮賦。已著錄。是集乃宏治元年。越爲朝鮮頒詔。

正使途中紀行之詩。考越奉使時官庶子。而刻本首行結銜。乃作儒林郎大理寺寺字。以下刊版刊滅。不可辨其姓名。疑或校刊者所題歟。

【太和堂集六卷】浙江汪汝璩家藏本。明屠勳撰。勳字元勳。平湖人。成化己丑進士。官至刑部尙書。諡康僖。是編詩四卷。文二卷。以神道碑墓誌附於末。陳懿典序。稱合刻屠氏家藏二集。蓋其子應垓有蘭暉堂集。當日合爲一編耳。

【交石類彙二卷】兩淮鹽政探進本。明吳文度撰。文度字憲之。應天人。成化壬辰進士。官至南京戶部尙書。事蹟附見明史。張泰傳。是集詩一卷。文二卷。皆詞旨樸儻。蓋文度官汀州知府時。有惠政。汀州人爲之刊行。以誌遺愛。是固不以詞采論也。

【文溫州集十二卷】浙江巡撫探進本。明文林撰。林有瑯琊漫鈔。已著錄。林嘗爲溫州府知府。故其集以溫州名。其中陳馬政諸篇。皆官南京太僕寺丞時作。總題以溫州。從所終也。

【孫清簡公集二卷】兩江總督探進本。明孫需撰。需字孚吉。別號冰檠翁。德興人。成化壬辰進士。官至南京吏部尙書。諡清簡。事蹟附見明史。孫原貞傳。需初爲南京御史。以劾妖僧繼曉。廷杖調外。爲禮部尙

書。又忤劉瑾罷官。以風節著。巡撫河南陝西鄆陽。抑權貴。綏流亡。尤具有循績。詩文則非所長。是集初名冰檠藁。其孫世良改今名。末有隆慶庚午世良記曰。壬戌循例至京師。奉遺藁請瞿昆湖姜晉齋摘其尤者得四帙。丁卯過常郡。謀諸王百穀。更爲分門別類。釐爲上下二卷。是刻豈欲上匹大方。持示海內。第俾子孫異日有所取以承藉云耳。其言篤實。想見需之家法。王世貞序。謂其詩文沖然而不爲藻采。淡然而若無深思。亦有微詞焉。

【石淙藁十九卷】安徽巡撫探進本

明楊一清撰。一清有關中奏題藁。已著錄。考明史藝文志。載一清

奏議三十卷。石淙類藁四十五卷。詩二十卷。今所傳關中奏題藁。已與三十卷之數不符。此本有詩無文。首鳳池藁。次省幕藁。次禫後藁。次西巡藁。次北行藁。次容臺藁。次行臺藁。次歸田前藁。次自訟藁。次制府藁。次吏部藁。次玉堂藁。次歸田後藁。次督府藁。次玉堂後藁。各以類分。止十九卷。與藝文志卷目亦不合。惟督府藁後別附簡札一卷。常爲文集中一種。褻緝誤入於此。史志或併此數之歟。

【東溪藁十卷】兩淮鹽政探進本

明鄧庠撰。庠字宗周。宜章人。成化壬辰進士。官至南京戶部尙書。終

蘇州巡撫。是編乃其詩集。凡吟藁五卷。入覲聯句錄一卷。續藁三卷。別藁一卷。而以石琚所作小傳附焉。【梅巖小藁二十卷】浙江汪汝璦家藏本

明張旭撰。旭字廷曙。休寧人。成化甲午舉人。歷官孝豐伊陽

高明三縣知縣。是集凡詩二十二卷。文八卷。其詩長於集句。採撫成語。位置聯絡。往往如出自然。其所自作。則雖律調工整。而傷於剽利。蓋學長慶集而不至者也。散體諸文。大抵應俗之作矣。

【東田漫藁六卷】直隸總督探進本

明馬中錫撰。中錫字天祿。別號東田。故城人。成化乙未進士。官至

左都御史事蹟具明史本傳。是集爲其子師言所編。同邑孫緒序之。稱其詩卑者亦邁許渾。高者當在劉長卿陸龜蒙之列。而其末力詆竊片語。辯數字。規規於聲韻步驟。摹仿愈工。背馳愈遠。蓋爲李夢陽而發。其排斥北地。未爲不當。然中錫詩格實出入於劍南集中。精神魄力。尙不能逮夢陽也。

【別本東田集十五卷】直隸總督採進本。明馬中錫撰。是集爲國朝康熙丁亥。中錫鄉人賈棠所刊。凡文五卷。詩十卷。案嵩陽雜識曰。李空同與韓貫道草疏。劉瑾切齒。必欲置之死。賴康濟西營救而脫。後濟西得罪。空同議論稍過嚴。人作中山狼傳以詆之。王士禛居易錄亦稱中錫中山狼傳爲刺李夢陽負康海而作。今其文在第五卷中。然海以救夢陽坐累。夢陽特未營救之耳。未嘗逞凶反噬。如傳所云云也。疑中錫別有所指。而好事者以康李爲同時之人。又有相負一事。附會其說也。

【滇南行臺四卷附錄一卷】江西巡撫採進本。明蘇章撰。章字文簡。號雲崖。餘干人。成化乙未進士。官至延平府知府。初章官兵部主事時。因星變事劾妖僧繼曉。方士李孜省。謫姚安通判。因哀其所作。共爲一集。故以滇南行臺爲名。末附詞四闋。祭胡敬齋文一首。附錄一卷。則其行實及諸家題跋。與入祀鄉賢文卷也。章少問學於陳獻章之門。嘗出胡居仁於獄。與吳與弼亦友善。蓋亦刻意講學者。故所作皆率意而成。不能入格云。

【七星詩文存十二卷】江西巡撫採進本。明劉鴻撰。鴻字雲表。泰和人。以居七星坳。自號七星居士。成化丁酉舉人。屢上公車不第。遂放游山水以終。是集爲泰和知縣區時行所編。前有正德五年羅欽順序。其文風格疎暢。多自抒抑塞磊落之懷。詩則率意而成。興寄頗淺。五言絕句中。西州詞第一首。乃全錄西

州古詞四句。殊不可解。疑或手書是詞。其後人不考而誤收也。

【碧川文選四卷】兩江總督探進本。明楊守陟撰。守陟字惟立。號碧川。鄞縣人。成化戊戌進士。官至南京吏部左侍郎。加尙書銜致仕。事蹟附見明史。楊守陳傳。案明分省人物考云。碧川文鈔二十九卷。雜文儲彙。又若干卷。此本爲其外孫陸錡所刻。前有陳琳序。曰。楊公自摘手彙。凡一百五十三篇。藏於家。陸君釐爲四卷。云云。則此爲守陟手定之本矣。明人物考。又云。守陟嘗書數語於遺彙。曰。學文師韓吏部。學道師程伊川。然其文才力萎弱。不能規撫韓筆也。

【西征集】無卷數。浙江汪汝璫家藏本。明林俊撰。俊有見素文集。已著錄。是集皆其正德四年。再起官四川巡撫。平定巴夔。土寇時作。故以西征爲名。凡詩歌一百二篇。跋二篇。賦一篇。書二十三篇。祭文二十四篇。序四篇。記五篇。末附戴錦所撰西征傳。述靖亂始末。頗詳。

【半江集十五卷】兩淮馬裕家藏本。明趙寬撰。寬字栗夫。號半江。吳江人。成化辛丑進士。官至廣東按察使。是集初爲其邑人王思誠所刊。王守仁費宏皆爲之序。守仁序不載卷數。但惜其遺彙散佚。宏序稱詩六卷。文如之。此本凡詩八卷。文七卷。蓋其仲子禴掇拾補緝。又增三卷也。

【柴墟齋集十五卷】兩江總督探進本。明儲懔撰。懔字靜夫。號柴墟。泰州人。成化甲辰進士。官至戶部侍郎。劉瑾用事。引疾歸。瑾誅復起。調南京吏部侍郎。卒諡文懿。事蹟具明史文苑傳。是集爲其曾孫耀所刊。詩五卷。序文三卷。墓誌一卷。雜著二卷。奏疏一卷。書簡三卷。懔嘗與李夢陽何景明徐禎卿相倡和。其詩規仿陶韋。文亦恬雅。至於才力富健。則不及夢陽等也。

【虛齋先生遺集十卷】編修祝德麟家藏本 明祝萃撰。萃字維真，海寧人。成化甲辰進士，官至廣東布政司參政。是集文五卷，詩五卷，文頗舂容，詩亦妥帖。蓋成宏閒臺閣之體也。

【蔡文莊集八卷】浙江巡撫採進本 明蔡清撰。清有易經蒙引，已著錄。其集凡有二本，一爲石崖葛氏

所刊，即明史藝文志所載五卷之本。一即此本。乾隆壬戌，其族孫廷魁所重刊也。自一卷至五卷，仍其舊文，而重訂其目。又搜輯墨蹟遺藁爲補遺一卷，附以其孫邦駒所集事蹟及志書傳序爲附錄二卷。集中有與孫九峯書，述寧王宸濠譏其不能詩文，廷魁序中因反覆辨論，歷詆古來文士，而以清之詩文爲著作之極軌。夫文以載道，不易之論也。然自戰國以下，即已岐爲二途，或以義理傳，或以詞藻見，如珍錯之於菽粟，錦繡之於布帛，勢不能偏廢其一。故謂清之著作，主於講學明道，不必以聲偶爲詩，以彫繪爲文。此公論也。謂文章必以清爲正軌，而漢以來作者皆不足以爲詩文，則主持太過矣。廷魁序又稱以家藏密箴善本太極圖說河洛私見三種附焉，而此本無之。蓋本各自爲書，故或附載或別行也。

【雪洲文集十四卷】浙江巡撫採進本 明黃瓚撰。瓚字公獻，儀真人。成化甲辰進士，官至南京兵部侍郎。是集乃其子襄所刊，自一卷至六卷爲詩，自七卷至十二卷爲文，十三、十四兩卷題曰續集。詩文竝列，蓋補遺也。詩多伉厲之響，文亦意境未深。集中載爲山東巡撫時薦劾方面各官疏，於所糾之人俱闕其名，殆不欲暴人之短耶。

【雨村集四卷】直隸總督採進本 明周東撰。東字伯震，號雨村，阜城人。成化甲辰進士，官至大理寺少卿。以伉直忤劉瑾，時寘鐺將變，乃使勘事陝西，會亂作死之。是集詩一卷，雜文一卷，其後二卷爲正論八

篇蓋東子所著之書編以入集詩文皆不甚留意正論多刺時之語蓋亦發憤而著書然東之足不朽者終在氣節也。

【松壽堂集十二卷】兩淮鹽政採進本 明楊循吉撰循吉有蘇州府纂修識異已著錄其平生詩文雜著幾及千卷蕪累頗甚是集雖經別裁尙多俗體蓋循吉任誕不羈故其詞往往近俳云。

【都下贈僧詩一卷】浙江汪汝璫家藏本 明楊循吉撰循吉好與方外遊成化丙午大給祠牒吳僧多集京師其所識縉流時或往訪比其還也各賦詩以送之因錄爲一通吳寬跋其後後二年循吉復募寬書刻之持定塔院。

【菊花百詠一卷】浙江汪汝璫家藏本 明楊循吉撰以菊花種類各案其名系以七言絕句分爲十一類天文類自滿天星以下三首地理類自岳州紅以下三首人物類自狀元紅以下二十一首宮室類金樓子一首珍寶類自銀絞絲以下七首時令類自海棠春以下六首花木類自白牡丹以下三十二首身體類自金寶相以下三首鳥獸類自金鳳仙以下十三首衣服類自黃疊羅以下十四首器用類自醮金香以下十八首。

【齋中拙咏一卷】浙江汪汝璫家藏本 明楊循吉撰凡古今體詩二十一首皆循吉官禮部主事以病乞歸將發京師及至家後所作又以成化甲辰丙午至宏治戊申所作聯句詩六首附於末徐景鳳彙刻循吉所著爲南峯逸藁此其一種也。

【燈窻末藝一卷攢眉集一卷】浙江汪汝璫家藏本 明楊循吉撰皆所作古文合兩集僅四十餘首頗

宕逸有奇氣。而縱橫曼衍。亦多不入格。徐景鳳亦嘗刻入南峯逸藁中。

【東所文集十三卷】浙江汪汝璫家藏本。明張翀撰。翀有白沙遺言已著錄。是集凡雜文十卷。詩三卷。其學出於新會。故所爲白沙文集。序白沙遺言纂要序。周禮重言重意互註序。及學記。與友人往復諸書。大抵皆本陳氏之說。

【南海雜詠十卷】浙江汪汝璫家藏本。明張翀撰。是集雜詠廣州古蹟。分爲九門。每題之下。各列小序。皆撫志乘爲之。無所糾正。詩亦罕逢新語。

【李大厓集二十卷附錄一卷】浙江孫仰曾家藏本。明李承箕撰。承箕字世卿。嘉魚人。讀書大厓山。自號大厓居士。成化丙午舉人。嘗徒步至嶺南。從陳獻章游。及歸。遂隱居黃公山。不復仕進。明史儒林傳附載於獻章傳末。是編乃其弟立卿所刻。明史藝文志載大厓集二十卷。與此本合。前十二卷爲詩。後八卷爲雜文。附錄一卷。則墓表行狀。及陳獻章所贈詩文。前有其兄承芳所作采菊藁引。采菊藁者。即獻章所贈古詩。凡十三首。瘞潰成卷。以其首句有采菊二字。因以名焉。然此宜入附錄。乃以冠諸簡端。蓋欲假獻章以重承箕。殊非體例。且重不重。繫乎其人。亦不繫乎其師也。

【費文憲集選要七卷】兩江總督探進本。明費宏撰。宏字子充。鉛山人。成化丁未進士第一。官至吏部尚書。華蓋殿大學士。諡文憲。事蹟具明史本傳。所著鵝湖摘藁本二十卷。此本乃徐階劉同升所選錄。非全帙也。

【湘臯集三十三卷】浙江孫仰曾家藏本。明蔣冕撰。冕字敬所。案明史本傳。冕字敬之。然編首王宗沐

黃佐陳邦僊呂調陽四序俱稱敬所同時之人不應有誤疑明史乃刊本之訛全州人成化丁未進士官至戶部尙書謹身殿大學士諡文定事蹟具明史本傳是集分奏對四卷奏疏三卷附錄召對及經筵講章敕諭等藁一卷詩八卷詞一卷序記等雜文十六卷冕當正德之末主昏政怠獨持正不撓凡所建白俱切時務嘉靖初大禮議起冕固執爲人後之說卒齟齬以去丰裁嶽嶽在當時不愧名臣其詩文則未能挺出也

【別本熊峰集四卷】浙江汪汝璫家藏本 明石瑤撰瑤有全集十卷已著錄案朱彝尊明詩綜稱瑤所著名恆陽集曲周令皇甫昉刪定爲四卷詩僅一百九十餘首今此集題作熊峰先生集前後無序跋詩亦一百九十餘言而詩綜所錄惟春日雜言秋蓮曲會昌宮詞三首在集中其送邵國賢芟田行春渡滹沱諸篇皆未之載疑此爲初刊別行之本非昉所選故集名亦各不同然卷數篇數又合殊不可解今未見原刻其同異莫能詳也以此雖舊本而不及康熙中所刻新本之賅備故錄其新本而此本附存目焉

【堇山集十五卷】浙江孫仰曾家藏本 明李堂撰堂字時升鄞縣人成化丁未進士官至工部右侍郎總理漕河鄞有赤堇山即越絕書所謂赤堇之溪澗而出銅者堂居其側故以名集其文根據未深持論頗多臆斷

【西軒效唐集錄十二卷】浙江孫仰曾家藏本 明丁養浩撰養浩字師孟別號西軒仁和人成化丁未進士官至雲南布政使是集詩八卷文四卷其名效唐者蓋取法唐人之意然殊不類唐音也

【鼇峰類藁二十六卷】浙江巡撫採進本 明毛紀撰紀有密勿藁已著錄是集乃紀致仕後所手定前

十八卷爲文。後八卷爲詩。朱彝尊明詩綜載紀有鼇頭類彙。蓋即此編。校刊偶疎。誤以峰字爲頭字也。

【赤城集二十三卷】兩淮馬裕家藏本

明夏鏞撰。鏞字德樹。天台人。成化丁未進士。官至南京大理寺

左評事。事蹟附見明史。夏燠傳。其詩欲爲別調。而轉乖雅。則文亦惟意所如。不可繩以古法。史稱鏞宏治四年謁選時。疏請復李文祥羅倫官。併請罷大學士劉吉。忤旨下獄。後官評事時。又疏論賦斂徭役馬政鹽課利弊。及宗藩戚里侵漁狀。蓋亦讜正之士。非專意於詞章者也。

【西巡類彙八卷】浙江范懋柱家天一閣藏本

明吳廷舉撰。廷舉字獻臣。梧州人。成化丁未進士。官至

南京工部尚書。諡清惠。事蹟具明史本傳。此集乃其正德初官廣東按察司副使時。巡歷省治。以西諸郡所上奏疏。及往來文牘詩詞之類。故曰西巡類彙。明史言其發中官潘忠罪爲忠反。訐下詔獄。劉瑾矯詔枷之。幾死。今觀此編。廷舉所上凡十疏。內有劾岷王府內監陳鶴。稱令旨差往廣東。違法乘驛騷擾。又奏各省鹽務。差內監查盤者。因斂銀內進。又有人事銀以賄各衙門。賀禮銀以賄司禮監。此三者竝科擾百姓。請敕御史體察。而盤查廣東鹽庫之內監韋霧。將鹽課盡解京。令廣東無以充軍餉。其事不可行。其關涉於內官者。不過如此。無發潘忠罪事。編首有劉瑞序云。逆瑾切齒於君。其黨探望風旨。誣奏即械下錦衣衛獄。枷吏部門左。垂死而後釋之。瑞廷舉同時人。其言必得實。然則史傳疑誤也。

【月湖集四十八卷】浙江巡撫採進本

明楊廉撰。廉字方震。豐城人。成化丁未進士。官至南京禮部尚

書。諡文恪。事蹟具明史儒林傳。是編凡分六集。以所作歲月核之。月湖淨彙十九卷。續彙二卷。遺彙一卷。當在前。月湖四彙十卷。五彙七卷。六彙七卷。當在後。原本次序顛倒。蓋編次偶誤也。廉以氣節稱。而其父

崇嘗從吳與弼游。因亦喜講學。請頒薛瑄讀書錄於同朝。請躋周程張朱於漢唐諸儒上。皆其所奏。故其詩多涉理路。其文亦概似語錄云。

【程念齋集十卷】江西巡撫採進本。明程楷撰。楷字念齋。饒州人。成化丁未進士。改庶吉士。是集未上方。冀跋稱其家居時所著有東樓南樓日錄。遊太學時有屏嵐書屋臺。官翰林時有來英亭臺。皆散落不存。此本乃其郡人史簡所摘鈔。凡文七卷。詩詞八卷。古文具。有閒架。而醞釀未深。詩詞亦多率意之作。不留心於陶鍊。

虹口法院移交
陳公博案內圖書

上海图书馆藏书



A541 212 0003 4390B

上海圖書館

